



A handwritten signature in black ink, written in a fluid, cursive script. The signature appears to begin with the letters 'Z' and 'J', followed by other stylized characters.

**УСМОН АЗИМ**

# **ЮРАК**

*Шеърлар*



Фафур Фулом номидаги нашиёт-матбаа ижодий уйи  
Тошкент – 2009



## КҮНГЛИМ БОГЛАРИ

\* \* \*

Юрак тортилди таранг –  
Етишиб келар нола.  
Тифнинг устидан яланг  
Яшаш – бизга ҳавола.

Рұхим – дардвашилик күйда  
Яшамоқнинг чораси...  
Узилар юрак бўйлаб  
Тўқималар толаси.

Узилар бир-бир, нохос –  
Узилган каби чақмоқ.  
Ёришиб кетар мумтоз  
Тўрт фасл қоришган боғ.

Дунё. Айқашиб ётар,  
Қанча куз, қанча баҳор.  
Минг ҳаёт тонгдай отар,  
Минг ҳаёт бўлар бекор.

Кўксимни кирап йириб,  
Бу ваҳшатли жараён...  
Мендан қолар қичқириқ –  
Ва ҳаяжон... Ҳаяжон.

2000



\* \* \*

Бу дунёнинг боғларида  
шовуллади шамоллар.  
Кетаётган заволларми –  
келаётган камоллар?

Ё тескари тартиботда  
тескари бир талошми?  
Сезаяпман, гулу хазон –  
ҳаёт-мамот қалашди.

Юрагимда аралашди  
сонсиз шамол шиддати –  
эркалиги, ёвузлиги,  
фазилату иллати.

Ташқарига чиқсан ҳозир  
(қўймас руҳнинг фужури),  
баҳорми, куз – қайси фасл  
кетар жисмим учирив?

Бу аралаш Вақт кафтида  
қайга боргум саросар?..  
Юрагимга дард қуйилар –  
бесон фасл баробар.

О, Оляҳнинг фасли бисёр,  
Етажақман борига.

Бугун жоним дуннинг ботин  
Чексиз фаслзорида.

Учта фаслим эса – ошкор,  
бунга ўзинг ҳам гувоҳ.  
Бошимда – қиш, қалбда – баҳор,  
тақдиримда – тийрамоҳ.

2001





\* \* \*

Дунёда айланар иш.  
Дунёда ёз-у баҳор.  
Фақат бошим узра қишиш —  
Бошим узра ёғар қор.

Қарасам, шўрлик бошим  
Ўхшар курраи арзга.  
Оқариб борар сочим  
Худди Арктика тарзда.

Кўнгил этмагай парво  
Аммо қишиш равишига.  
Тангрим, қанча аср бор  
Қонимнинг совишига.

Дунёда айланар иш,  
Айланар, учар елга.  
Менинг кўнглимда тиниш —  
Менгзайди сокин селга.

Лабимга майин тутди  
Илоҳнинг хумигача.  
Кўнглим оқиб боради,  
Дунёнинг тубигача.

Нима учун -- сўрама,  
Кўшиғимда нолиш бор...  
Бул дунёнинг тубида  
Ёлғизгина қолиш бор.

1999



\* \* \*

Баҳор кунларининг сўзлари тоза.  
Гаплашдик. Дилларда қолмади губор.  
Уч ойни сайр этдик – солмай овоза,  
Ёнма-ён кўкардик, гулладик ошкор.

Вақтга оидлиқда – муқаррар ҳижрон.  
Баҳор қайғусини аммо яширди.  
– Менга дўст бўлади... Бу одам – Усмон...  
Жазира кунларга мени топширди.

– Қара, қандай гўзал қолмофинг ёзда,  
Сувларда эпкин-у, боғларда салқин... –  
Баҳор хайрлашди бардам овозда,  
Кўз ёшда тўлиқиб бораркан ҳалкум.

Қандай чидаб бўлар бундай ҳижронга:  
Қичқирдим – етарми юракнинг уни.  
– Бу ёзга ишонма, баҳор, ишонма!  
Кузга топширади мени бир куни!

1999





\* \* \*

Шох отиб таралди сувлар далага,  
Миннатдор туйфуда энтиқди полиз.  
Капалак ўйнади сўзсиз яллада,  
Пақирсиз сув ташир ариқлар – каниз.  
Қуёш нурларининг вазни сезилди,  
Елкага тафт кўчди, пешонага тер.  
Жўяқда помилдор қатор тизилди,  
Сатрлаб юракдан узилгандай шеър.  
Қорая бошлади сув инган тупроқ,  
Илдизлар – роҳатда: этдим тасаввур.  
Кўкатлар кўнглиниң баёни бу чоф  
Тилимда: – Худойим, ўзингга шукур!  
Шукур! Одамларинг (уларни кечир!)  
Баҳор сухбатимдан юз ўғирган дам,  
Мажхул ҳаётимниң тугунин ечиб,  
Мени кўкатларга айладинг ҳамдам.  
О, жимжит сухбатлар!.. Англадим аён  
Яшил дўстларимниң нозик тилини.  
Улар вужудимга этишди ниҳон  
Митти қиёқларниң улкан дилини.  
...Одамлар билан ҳам муомалам соз:  
Хато-ю камлари ўтар – кўнглим тўқ.  
Албатта, ҳаётга рағбатлари оз,  
Чунки кўкатлардан қалбошлари йўқ.

2002



\* \* \*

Чорбогни қийнади довул бу кеча –  
Тун бўйи дарахтлар изиллаб турди.  
Чироқлар айвонда ёна ва ўча  
Тебранди. Ишкомлар – талvasа – турли.  
Тераклар оёғин қучганча маҳкам  
Тўлғонди, узала йиқилди йўлка –  
Дароз вужудига урилди мубҳам  
Шамолнинг зарбидан сочилган кўлка.  
Тарақлаган томдан ўзини отиб,  
Гулларнинг баргини сочиб ҳар тараф,  
Елдирим шовқинга кемадай ботиб –  
Хавотир югурди зулматга қараб.  
Тўрт тараф шамолдан соchlари чигал,  
Аксулбирбалони айлаб таржима,  
Узун уввосларни чалди мукаммал  
Бўғзига минг қўшнай солган ажина.  
Баргдай учеб юрди боғлар ичида,  
Тўполон тўрига чўқди беғулу,  
Норози тикилди довул ишига –  
Кўзга кўнолмаган саргардон уйқу.  
Бу дайр қарамади маним ройимга!  
Алғовга овора бўлганда борлик,  
Жонимнинг оғриқдан адо жойига  
Қанотли ханжардай қўнди бедорлик.  
Бедорлик!  
Бошимда бу нечук савдо?  
Келдингми кўнгилнинг дунёдан ранжи...  
Тонг отар. Қарайман: парвардигор-о,  
Манглайимда яна иккита ажин!

Боғда эса... Боғда хомуш шевалар –  
Наволар дардларин ичига ютган.  
Бандидан айрилган noctor мевалар  
Армони дунёни лиммо-лим тутган.

2004





\* \* \*

Сувланган боғчада майсалар кўм-кўқ,  
Елларнинг белига ўтлар эшилган.  
Қуёшнинг бу ёздан ўзга иши йўқ –  
Кўкда тураверар – кетмас пешиндан.  
Навода жимирилар саратон барқи –  
Бундай ўртанишда чилла эскирмас.  
Сен билан тўлгандир бу боғлар... балки  
Сенинг йўқлигингни ҳеч ким сездирмас.  
Умидни – столда очиқ китобни  
Неча бор ўқиди ўрик сояси?  
Сенинг кетишингдан қолган саробни  
Дараҳтлар сир тутди жим – ҳикоясиз.  
Юрак дардин энди шеърга ёради –  
“Оҳ”и мангуликка қолди етишиб.  
Ортига умидвор қараб боради  
Дунёдан улканроқ сенинг кетишинг.  
– Мен нима қиласман? – Жоним югурап,  
Ҳаёт қайдা ўзи – шартнома тусса?..  
Фалакни негадир кўтариб турар –  
Мени ерга урган бир инжа фусса.

2003





\* \* \*

Тошкентнинг кенг бошидан  
ёз олови қуйилди.  
Кўчаларнинг четида  
тарвузларнинг уюми.

Арzon-гаров савдога  
энди инон-ихтиёр –  
ранг-баранг мева-чева  
қадамда тузди бозор.

Пештахтада уюлди –  
донаси узун-узун –  
хонимлар бармоғидан  
нусха кўчирган узум.

Дастурхон тўкин-сочин –  
саҳий фаслнинг тўйи.  
Шаҳар тўлиб анқиди  
олмаларнинг хуш бўйи.

Эвоҳ! Капалак ўтди!  
Бунчалар инжа парвоз!..  
Мендан хабар олгани  
келди дала-боғдан ёз.

Кундузи мунавардир,  
Кечалари – муанбар...  
Насиб бўлса, бу ёзни,  
куз енголмас – муқаррар.

2004

15



\* \* \*

Бу тонгнинг салқини  
ўзгача.  
Неча кун қолди, вақт,  
кузгача?  
Эй, менинг ям-яшил  
чорбоғим,  
неча кун юракнинг  
доғларин  
оласан? Неча кун  
саратон  
кўзимдан оққан бу  
фаровон  
ёшимни артади?  
Ўзгача  
оғриқ кўп, азизим!..  
Кузгача  
(дўст бўлсанг) уз, қани,  
буз, қани –  
Бу ёзни куз қилган  
ғуссани.

2004



\* \* \*

Шамол мажнунтолда чалар арганун.  
Анҳорни бир майин тор каби эшиб,  
Қүёш – кенг бастакор – нур тортар узун,  
Улкан фижжагига оташни қўшиб.  
Серавж мусиқадир – ёзниң дамлари.  
Авжига – во, ажаб! – етмас товушим.  
Юракнинг жунунвор соғинч жанглари,  
Мувозанат сари борар оғишиб.  
Ёзниң кунларида баҳтиёрлик бор –  
Хусусан, шаффофлик энса кунларга,  
Хусусан, дарёлар оқса беғубор,  
Хусусан, дил лаззат олса мунглардан.  
Азизим, шу қишки ғамларни унут,  
Эрит юрагингда қолган музларни.  
Бу иссиқ оғушда кезайлик кулиб,  
Эслайлик йўқолган қайноқ сўзларни.  
Навқирон йилларнинг тошқини ўтди,  
Буқун боғларимда оромли салқин.  
Бугун бошим узра қүёш ҳам етди,  
Дунё – тиниқликка кўмилган ёлқин.  
Гулларга қарагин, йифламоқ мумкин  
Термулиб мўъжиза камолларига.  
Меҳринг соясида қолайми турғун,  
Кечиб учқур Вақтнинг шамолларидан?  
Эркалик дамлари ўтди-ку бирок,  
Тикилсак кўринар умр поёни.

«Оҳ» урсам, сенга ҳам бўлмагай жумбок,  
Қучиб бартлар аро сизган зиёни.  
Лиҳорнинг четида чиқардик ҳордиқ –  
Баҳордан ҳориган иккита майса.  
Сув бир ямлаганди – «Яшилмиз», дедик,  
Баҳона борми, айт, сув яна қайтса...

1999



---



## АНҲОР БЎЙЛАБ САЙР

Боғларга куз келди бунчалар эрта!  
Аммо ям-яшилдир ҳануз бу дараҳт –  
Хазонрез туради қошида караҳт:  
Демак, у Оллоҳнинг олдидага эрка,  
Демак, уни севар ёз аталмиш баҳт.

Дунёда шамолга қолмиш ихтиёр –  
Хазоннинг беилинж учмоғи ғамдир,  
Вужуди соғ шабнам ёшларда намдир...  
Аммо бир дараҳтким ёзда барқарор –  
Унда ёз юқиннинг тоқати жамдир.

Бу кечада не тушар унинг бошига?  
Ана, изғиринлар етди – беаёв,  
Кузак ёмон ёвдир, ёзга ёмон ёв...  
Бу кечада қолайми дараҳт қошида –  
Бундай пайт керак-ку меҳрибон бирор.

2001





## ОҚШОМ

Кун чўкиб боради. Шаклланар тун.  
Чироқлар ёнган йўқ ҳали чарақлаб.  
Аммо самовотда бесабр учқун –  
Бир юлдуз бўшлиқни ўтди чавақлаб.

Ошхона дарчасин очиб ташлади,  
Навога тарапди овқатнинг бўйи.  
Саришта дараҳтлар мудрай бошлади –  
Шомнинг елкасига бошини қўйиб.

Кундуздан – йиртқичдан ажратган ризқин  
Тўрхалтага жойлаб ўтди йўловчи...  
Бир ҳазин ёлғизлик тўлдирди жисмим –  
Бормикан дунёда мени сўровчи?

Юрагим оғзимдан чиққудай учиб  
(Оғриган чоғида – ўйида учиш),  
Уни асрармоққа етарми кучим,  
Етарлими қўксим чангальда қучиш.

Чорбоққа қарайман. Кўринар аён:  
Чиройли дараҳтлар – неча-ю неча.  
Агар учиб кетса юрагим шу он,  
Қайси бир дараҳтда ухлар бу кеча?!

1999



\* \* \*

Эртага куз келар аниқ. Изирин  
Плаш-у чопонлар кийдирди ёзга.  
Боғлар фалак тўккан ёш ичра тўзғин,  
Шабнамнинг тушгани ўхшади ростга.  
Аммо.. Мадор йўқми қўзғалонга ҳам —  
Куёш нурларини ногоҳ аяди.  
Тийрамоҳи олма — барча шохи ҳам —  
Дунёга термулди ҳасса таяниб.  
“Куз етди!..” — ўйландим тикилиб боқقا —  
Жунжикиб, хўрсиниб, сўниб, ториниб.  
Шохидা ўзини отди ҳар ёққа,  
Ичи қон анорлар кетди ёрилиб.  
Безовта ўлтирдинг қаршимда. Менинг  
Суйганим қарагин, куз келди, кузак...  
Йўталиб ўтмоқда сентябрь ели —  
Нечун? Оғриётган юрак-ку, юрак!  
Кўзинг дараҳтдаги илк ҳазонбаргда,  
Юзингда қийноқнинг шарпаси зоҳир.  
Айланиб боряпман бу дам юракка  
Буни кўрмоқ оғир!.. Кечиргин, оғир...

1999





## СЕНТЯБРЬ

Гар кунлар кўйлакчан,  
Тунлар – қунишди.  
Тобора юракда  
Дунё тўлишди.

Тўлишди армонлар,  
Фуссалар – эзфин;  
Руҳ – ёлғиз ғампарвар  
Боғларни кезди.

Гарчи барглар кўм-кўк,  
Илдизлар – ҳушёр...  
Оташ кунларинг йўқ,  
О, парвардигор!

Чорбоғ – ғофил иним  
Майидан сузган...  
Сентябрь, тушингин,  
Сен – кузсан, кузсан.

Қисмат етди, ахир,  
Йиқилди равнақ!  
Ёш бола – сентябрь –  
Бепарво гўдак...

Воҳ, оғир гўдагим,  
Охир гўдагим,  
Сафирлигин сезмас –  
Сафир гўдагим.

2000



\* \* \*

Кузак етди —  
мунг сўзларга  
келди навбат,

Юрак-бағри  
хун сўзларга  
келди навбат.

Талвасада  
қулоғингни  
бекитмагин,

жим сўзларга...  
чин сўзларга  
келди навбат.

*1999*





\* \* \*

Ям-яшил боғ ичра  
Япроқ сарғайди.  
Кўнглимда бир нозик  
Титроқ сарғайди.

— Кўзингни юм, юрак,  
Ухлагин, десам,  
Бари бир бир «оҳ»и —  
Уйгоқ сарғайди.

Чидамим зўр эрди  
Ситамга... э, воҳ,  
Бир япроқ дардига  
Узоқ сарғайди.

Мени ўлдургуси  
Ўзганинг ғами —  
Оҳ, кўзим сарғайди,  
Тирноқ сарғайди.

Мени бемор йўйма,  
Бир барг дардига  
Жону жисмим ўртаб  
Қийноқ сарғайди.

Шамол узиб ўтди  
Баргни бандидан,  
Барг-у кўнгил аро  
Фироқ сарғайди.

Кўз ташламай айтгин –  
Кўзинг ёшланур –  
Ҳолатим ичида  
Чироқ сарғайди.

Эй, дунё, не учун  
Жим-у лолдирсан?  
Инсон бир сўзингга  
Муштоқ сарғайди.

Ўлим-у яшашнинг  
Сирин айтмайсан –  
Воҳ, жавоб сарғайди,  
Сўроқ сарғайди.

1999





\* \* \*

Уззукун ёмғир.  
Совиди ҳаво.  
Кетди бетақдир,  
Мозийга танҳо  
Қайноқбадан ёз.  
Видо – юракда...  
Кирап кузакка,  
Умр – бепарвоз.  
Яшилликни боғ  
Жунжикиб ечди.  
Ёзни севардим...  
У мендан кечди.

1999





\* \* \*

Қандай соз, кун ёзилди  
Тангрининг девонида...  
Кузги мевалар бўйи  
Ошди боғ деворидан.

Офтоб нури ийманиб,  
Тушди учган япроқقا.  
Йироққа кетгим келди,  
Қайтгим келди йироқдан.

Рұхга айланмоқ учун  
Шунчалар сўлмоқ шартми?  
Юракни шарт очаман  
Кутиб олгани дардни.

Ва куйлайман ҳар баргнинг –  
Келтириб иззатини.  
Шеърга раво кўрди куз  
Ўзининг қисматини.

Дунё тубига етди  
Ногаҳон сокин ўйим...  
Девордан ошиб тушди  
Кузги мевалар бўйи.

1999

---

\* \* \*

Анҳорнинг ранги – синик,  
Осмон баланд-у тиник.  
Гўдак куз боғда хомуш.  
Август билмайми-билиб,  
Ёзги шаробга тўйиб,  
Чоҳга тушган Алпомиш.

Зар тортади илк барглар,  
Тўлиб боради дардлар,  
Юрагим – ярадор ғоз.  
– Қайдасан? – Бу шўр жарчи  
Эҳтимол Барчин?  
– Барчин!  
Йўқотмоқ – кузакка хос...

Тобора сўзим манзур,  
Тобора кўшиқ машхур –  
Кузак – тобора бекам.  
Тобора юрак мастур,  
Тобора ярам чуқур,  
Тобора зиндан теран...

2000



---

## ОКТЯБРЬ

Ёмғирли бу кунлар – тотли оғриқдир,  
Хазонли бу дамлар – қўшиқдир ҳазин.  
Эҳтимол қўшиқдан бироз ортиқдир,  
Юрак барполовчи ҳолга боғлиқдир –  
Одатда фуссага айтгувчи арзин  
Доғли дам сўнгида келган соғлиқдир.

Ёмғирли бу кунлар – сокин интилиш,  
Хазонли бу дамлар – мўмин-қобил ғам:  
Ёруғ тубсизликка чексиз йиқилиш,  
Армонлар ичидан кўкка тикилиш,  
Ҳамма тилакларинг тумандай мубҳам –  
Вужудда титраниш, дилда энтикиш.

Йўқолган баҳтларнинг сояси бунда,  
Келмас толеларнинг – лайли шарпаси.  
Яшайсан қандайдир сергак уйқуда,  
Аммо руҳ-у жисминг босиқ туйфуда,  
Тарқ этмиш ҳолингни дунё ғалваси –  
Ўраб вужудингни сирли барқуга.

Дорга остирмайди, ўтга солмайди –  
«Оҳ»инг шабнамидан фақат кўзинг нам.  
Тобора ингичка кўнгилнинг майли,  
Изҳорга, масалан, сўроқлар найни...

Ёшингни кўзингда ушлайсан маҳкам –  
Йиқилса, бу дунё кўтаролмайди.

1999



## ХАЗОНРЕЗ

Япроқ ёғди ҳовлига,  
Бошимдан ёғди япроқ,  
Ҳавода учиб узок,  
Япроқ ёғди бовримга –  
Ҳасратларда оғриган  
Вужудим бўлди чок-чок.

Тўкилди чорбоғ – зар-зар,  
Тўкилди чорбоғ – қирмиз...  
Ҳазонрез – сочқин аждар –  
Мени ҳам ютди илкис...  
О, йиғлашга мұяссар  
Боғларда қанча илдиз!

Мен турибман оламнинг  
Ҳазон боғида якка.  
Кузга ўраб ситамни  
Вақт уради фалакка.  
Тишда тишлаб ноламни  
Айланаман юракка...

Япроқ ёғди оламга  
Гоҳ имиллаб, гоҳо тез.  
Бегона бир одамга  
Ҳолимни айтдим бу кез.  
Мени таниб у одам,  
Даҳшатта тушди бир дам –  
Шивирлади:  
– Ҳазонрез...

1999

---

\* \* \*

Чорбоғнинг қучоғида  
Шамол ётар тўлғона...  
Дарахтлар япроғида  
Ҳаёт тинмай уйғонар.  
Боғда – соя. Боғда – нур.  
Мевалар ларзон-ларзон.  
Шамол эсади ҳур-ҳур,  
Тўкилмоқ – арzon-арzon.  
Саватлар тўлар. Бу чоғ  
Қозонда шинни лим-лим...  
Ҳувиллаб қолар чорбоғ,  
Ненидир кутар ғамгин.  
Яшиллик ҳайрон-у лол –  
Узилади зар япроқ...  
Юзтубан ётар шамол –  
Елкасида жим титроқ.

2000



\* \* \*

Хазонли боғларнинг адоги йўқдир,  
Қочмоққа – дунёда кенгликлар абас.  
Кўнглимнинг бир яшил япроғи йўқдир,  
Сарғайган – сўзим-у, ўт олган – нафас.  
Токларнинг барглари қон ичди – қирмиз,  
Тераклар учқунлаб ёнаётир – шам.  
Кузакка урилиб англадим илкис:  
Ўтган куним кўпdir, қолган оним – кам.

Ана, ёмғирлар ҳам кирди боғларга,  
Сирқирағ-сирқирағ сочдилар ғамни.  
Руҳим – бу жувонмарг гўзал доғларда –  
Бир ҳафиғ оғриққа кўчирди танни.  
Ассалом алайкум, эй, тотли оғриқ,  
Ассалом алайкум, бешафқат кузак!  
Гарчи хазондирман – кўзларим ёруғ,  
Юрагим... Юрагим ўсмоқда!.. Юрак...

2000





\* \* \*

Ҳаво майинлашди... Кечалар – салқин,  
Дунё ҳушёр тортди – шиддатдан кечиб.  
Кирди юракларга бир ёруғ ёлқин –  
Сирларнинг туманли либосин ечиб.

Ўзига кўмилиб тинч тортди кўнглим!  
Армонлар олисда – зирқирап – нафис.  
О, кузак келдими? – Бечора сўнгим!  
Ёшин тиёлмасдан куйловчи ҳофиз.

Дунё кетгунича – «Талқини ироқ»,  
Не тонг, бу талқинда мажнунвор эрсам...  
Кузак ўртасида турибман – яйдоқ,  
Юрагим етмайди – куйлашай десам.

2000





\* \* \*

Менинг кеч кузак куним,  
Келиб кетишинг – тез,  
Гуссанг жуда кўпдир.  
Чорбоғларнинг эса хазонрези узун –  
Чегараси йўқдир.

Баъзан қуёшингнинг илиқ бармоқлари,  
Ёмғириңгнинг ҳўл қўллари баъзан –  
Юрагимга етган чоғлари  
Ёшларимни  
пинҳон артаман.

Айниқса, хазонрез...  
Оҳ, бу хазонрез!..  
Баргларга кўчириб, учирар зиёни.  
Шундан – чидай олмай – кетасанми тез,  
Ёлғиз менга  
ташлаб дунёни.

Сен кетдинг.  
Совуқ шамол урилди бошга.  
Қоронғилик кўнглимга ваҳима солди.  
Менинг кеч кузак куним,  
хеч кимим йўқ сендан бошқа,  
Сендан бошқа,  
Фақат узун тунларим қолди.

2000



\* \* \*

Узун ёмғир ёғди. Кун бўйи.  
Кун бўйидан узун бир ёмғир.  
Кузга таслим бўлгани кўйи  
Боғларга тинч сочилди ёнғин.

На бир қушнинг овози келди,  
На шамолнинг безовта саси –  
Фақат соғинч парвози келди  
Ва ҳаётнинг мушкул нафаси.

Деразамга қараб жим қотди,  
Баргдан айро иккита терак.  
Қисқа умр кўриб кун ботди,  
Қисқа умр сўради юрак.

Ўмганимни тешди-ку бетин  
Қисматнинг қўз ёши-ю тоши.  
Мен висолга бормоқчи эдим,  
Ўтолмадим бу куздан ошиб.

Ёш келдими бу сўқир кўзга,  
Ё киприкка илашди туман?  
Ёмғирнинг кенг кўксига бўзлаб,  
Куз ва аёл ётар юзтубан.

2000



\* \* \*

Кузак...  
Бунча тез?

Юрак –  
хазонрез.

Оҳ, шамол,  
Шамол!..

Алвидо!..  
Завол.

Йиглама,  
чорбоғ.  
Мен энди  
тупроқ.

Жонга бериб тин,  
Баҳорингга қайт,  
Мени симирсин,  
Илдизингта айт.

1997





\* \* \*

Худойим,  
даф ахтлар бунчалар баргиз,  
буғчалар кимсасиз қўнглим боғлари.  
Бекор қаҳратонда ёлғизлик ҳадсиз...  
... Энди қайтмайдими баҳор чоғлари?

Теграмда ипакдай тилсимин ёймиш  
дуиёни сипқорган ҳарир туманлар.  
Худойим,  
бошинга тушди ёмон иш –  
ҳеч кимим йўқ, деган оғир гумонлар.

Ўзимдан ҳолимни сўрашга қўрқдим,  
ғай бдан ҳам инмади садо:  
– Қалайсан?  
Куздан қолган барғдай ер қадар чўқдим –  
сем ҳам, тангirim,  
мени  
унутгандайсан.

Бул узун умримда узун уйғондим –  
Бу қишида етишди  
ҳолимнинг шарҳи.  
...Ҳозир  
боғ ичинда  
қолса шу ҳолим,  
Баргиз дараҳтлардан бўлмагай фарқи.



\* \* \*

Совуқ тегиб ўтди – гуллар қорайди,  
Булатлар пасайди – дунё торайди,  
Уфқлар кўринмас – ўради туман.  
Йўқ бўлиб кетайми, ёхуд борайми,  
Боғларим сарғайиб кетмоқда, айни  
Кузларим уйғонди уйқудан.

Мен умр кўрдимми? Беканот парвоз  
Толдирди. Соғинчнинг дард юки оғир.  
Олисдан сен қанча қилма эътиroz,  
Ернинг тортиш кучин сезди эҳтирос,  
Бугун ерга кириб кетаман охир –  
Учган юлдузларнинг вужудига хос.

Боғ эса сочилиди. Боғ – бурда-бурда.  
Бироқ яхшилаб боқ – ким кўпроқ вайрон?  
Кун кўриб бўлмагай соғинч туйфуда,  
Нажотли онларнинг бари уйқуда –  
Куз чоғи сенсизлик – ўлимдан ёмон.

Алвидо! Олисим, жоним, алвидо!  
Турибман айрилиқ дамларига тахт,  
Таққос учун айтсан, ҳозир баргман, барг –  
Яшагим келмоқда, яшагим... аммо  
Мени кўтаролмас бирор-бир дараҳт.

2001



## КЕЧ КУЗ

Боғлар билан таранди  
Печкаларнинг тутуни.  
Қуёш сокин тарапалди:  
Ёруғ бир куз яралди,  
Олис баҳтдай уриниб.

Боғда кезаман танҳо —  
Нур-у хазон чулғамиш,  
Руҳимни дард тўлғамиш,  
Сўзга етар тавалло —  
Оҳанглари нотаниш.

Ёруғ хазонрез бу дам  
Нени қилмоқда ташвиқ?  
Ёшликми? Ўтди ёшлик!  
Ундан сўнг қанча кўклам...  
Дилда қолмади тошлиқ,  
Барча ўйларим кўркам!

Маним юракдош кузим!  
Ёруғ туришинг теран...  
Ихтиёр берса эгам,  
Ўлимни кутмай, ўзим  
Кетар эдим сен билан...

2006



## БОЙСУНДА КУЗ

1

Турналар жанубга учиб ўтдилар,  
Шимолда қўзғалган кузакдан қочиб.  
Тоғлар бу дамларни узоқ кутдилар —  
Дараларга тўлган кўзлари очик.

Турналар уфққа бўзлаб ботдилар,  
”Кур-қур” сайроқ ила дунёни эзиб.  
Тоғлар сукунатда йиғлаб ётдилар,  
Парвозсиз қисматнинг залворин сезиб...

2

Узумлар шифтларга  
илиб қўйилди.  
Олмалар токчага  
терилди қатор.  
Кўзада шиннилар  
обдон қуйилди,  
майиз-у жийдага  
лиқ тўлди омбор.  
Эшиклар бекилди,  
тушар-тушмас шом.  
Жунжикиб кечалар  
қолди бир ўзи —  
тун ичра фалакка  
термулди беком  
барг каби сарғайган  
дераза кўзи.

Воҳ!  
Ана, юлдузлар  
экилган осмон...  
Юракка... Юракка  
нурлар тарагар:  
фақат тангри бўлса,  
оламга посбон,  
не гўзал дунёлар  
ҳали яралар.  
Ў-хў!.. Не эртаклар  
хазон боғларда!  
Дилларга парвозлар  
улашар бедор...  
Куз эса бу кеча  
ўтди... Тоғлардан  
арчазор оралаб  
келаётир қор.

2003

\* \* \*

Не кечди? Нечун хўл,  
Яна ёстиғим –  
Юрак ўқидими  
Қисмат ёздини.

Куз кетди. Боз нечун  
Юрак ўксиган?..  
Сен ҳануз йўқмисан,  
Ҳануз йўқмисан?

2003



\* \* \*

Олча – шафақранг. Ўрик –  
Сариқ, қизил... Худойим!  
Бу куз бунчалар тиник,  
Бу кун бунча мулойим!

Шамол қўзғалмай турар –  
Баргни учирмоқ нега?  
Фақат суқунат юрар,  
Йўлкаларда беэга.

Кўксимни чиқмас ёриб –  
Юрак яшар безавол!  
Қуёшли куз – ёп-ёруғ,  
Оҳиста учар хаёл.

Боғдан чиқиб жўнайман –  
Таъсирланиб, тўлиқиб.  
Хаёлим қолар... Эгам!  
Ҳайратгами йўлиқиб!

...Дилни босиб ихтилол,  
Тарқ этганда эранлик,  
Бир кун қайтар у хаёл –  
Ва келтирас теранлик.

2003



\* \* \*

Ёмғир торларини тун бўйи чалди,  
Уст-боши ҳўл наво йиғлади гирён.  
Мени жанг қиласдан асирга олди  
"Дугоҳи кузак"ми,  
"Сегоҳи хазон".  
Кўзини очмасдан камончи шамол,  
Оғир пардаларни топиб бехато,  
Бир чексиз чолғуда – дарди баркамол,  
Узун мақомларни айлади барпо.  
Дунёга сеҳрли шовқинлар тараб,  
Шовуллаб,  
учқунлаб расо қомати,  
Деразам тагида куйлади терак –  
Фалакка ундалган ернинг даъвати.  
Тун қучган боғларнинг сийналарини  
Йиртиб гувилларкан куйчи долгалар –  
Шохларга ботириб панжаларини  
Эшитди зофчалар,  
чумчук,  
қарғалар.  
Булутлар томларнинг устига чўқди,  
Шамолда минг қўйта бўларкан бунёд,  
Ҳар битта тобушни тўзиниб уқди –  
Ҳамма қочириқни тўлиқ олди ёд.  
... О, тонгда нақадар гўзал ярақлар  
Тунги куй синги ан ўйчан оламлар!  
Кўчага чиқади кўзи чараклаб,  
Негадир юксалган босиқ одамлар...

2003



\* \* \*

Кундуз... Кеча... Кундуз... Кеча... –  
Неча тун? Неча кундуз? –  
Ёмғир ёғди узун, ўжар –  
Хоки туроб бўлди куз.  
Қизил, сориф рақслар қайда –  
Баргларнинг сўнг ўйини?  
Ер тагига ёмғир ҳайдар  
Боғнинг сочқин рўйини.  
Кезинаман ҳўл ҳавода,  
Елкаларим ивиган –  
Хабар топгим келар ернинг  
Кузни ютган тубидан.  
Ахир, қатъий якунларга  
Чиқди юрак пиёда –  
Алвидо куз!.. Кетаверсам  
Бўлмайдими дунёдан?  
О, қай сирни пинҳон тутдинг,  
Не қисматни яширдинг?..  
Нега мени яна қишига –  
Яна музга топширдинг...

2003





## БАРГЛАР ЁДИМГА ТУШДИ

Ол шафақ жон узади,  
Кўкаар гардун...  
Боғларда тинч сузади  
Туман ва тутун.

Сузади жунжуккан Вақт  
Хазон наҳрда.  
Юрагим куйлашга тахт –  
Ўксик баҳрда.

Не учун хаёл учди,  
Ҳўл бўлди ёқам?..  
Барглар ёдимга тушди –  
Тутунга боқсам.

2002





\* \* \*

Ёмғир кечиб келар,  
Түкилиб келар,  
Үкиниб келади –  
Юрагимга куз.  
Билмайман, кимгадир  
Юкиниб келар –  
Бебарг қўлчалари  
Қалтирайди – муз.  
Куз! Соғинч! Дардларда адо бўлдим мен –  
Шеърга кўчирапкан шеърсиз дунёни,  
Мангу видо ичра гадо бўлдим мен:  
Бенажот суҳбатнинг борми поёни?  
Япроқларга томган ёшиңгни артай,  
Кел, хазон танингта кўмай ўзимни.  
Қалбимни ҳақ сендан яратди атай –  
Ки, тангри даъвати боссин сўзимни.  
Йифлат! Ана, ”оҳ”дан бўлмақда барпо  
Азал қураётган тақдирнинг буржи.  
Изиллаб жўнасам ундан (худо-ё!)

Арши аълогача борар бир учи.  
Ана, капалакдай учар бевазн  
Сатрларга кўчган оғир тафсилот:  
Мен шундай чиздимки дунёning расмин –  
Кўргиси келмоқда у ўзин озод...

Ёмғирда ювилган  
Вужуди тоза,  
Тўкилиб киради  
Кўнглимга кузак.

Хайрият, юрагим очиқ дарвоза,  
Хайрият, у ҳануз юракдир,  
юрак...

2003

\* \* \*

Жоним зулмат ичра  
Бир ўжар шамдир.  
Теграсида жъами  
Шамоллар жамдир.  
Мени йўқ этажак  
Улар бегумон,  
Аммо ўчгунимча  
тун камдир, камдир...

2003





\* \* \*

Тийрамоҳ бу оқшом май ичди,  
Девона бўлдилар неchalар.  
Севгилим, ҳолингиз не кечди  
Хазонлар гуллаган кечалар?

Тийрамоҳ бу кеча рақс тушди,  
Хазонрез беллари чулғаниб.  
Севгилим, япроқдай рух учди,  
Сиз йўқсиз, қараса, уйгониб...

Тийрамоҳ бу кеча базм тузди,  
Жилмайди, ёшини артмасдан.  
Севгилим, баҳтингиз ким бузди,  
О, ҳануз кетяпсиз қайтмасдан?

Тийрамоҳ, тийра оҳ не учун?  
Куйладим юракнинг борича!  
Севгилим, қайтсангиз –  
бу кўнглим  
Баҳорга дарича, дарича...

2002



---

\* \* \*

## 1

Ноябрь қаерда?..  
Ҳалқоб – юпқа муз.  
Шохдан кўчиб, ерга  
Тўшалгандир куз.

Кузликнинг сўнг они –  
Дарахтлар бебарг.  
Фамга йўқдир моне –  
Дунни босди дард.

Дард босди... Жону тан  
Қимирламас... Жим...  
Тангри, тош кўнглимдан  
”Оҳ“ яратган ким?

Ноябрь қаерда?  
Майли, алвидо!..  
Охир “оҳ”га кўчдим,  
Парвардигор-о...

## 2

Охир “оҳ”га кўчдим.  
Оғир “оҳ”га кўчдим.  
Сарғайди дунё,  
Парвардигор-о!..

Тикилдим “оҳ”имдан  
Дунёнинг чоҳига:

Юксалди бу чоҳ,  
Парвардигор-о!

“Оҳ”нинг дунёларга  
Акси тарапди...  
Аён, қайдадир бир  
Юлдуз яралди –  
Кенгайди само,  
Парвардигор-о!

Қават-қават дунё  
Бир “оҳ”дан барпо...  
Парвардигор-о!

2002





\* \* \*

Менсизлик бу боғнинг кузлари – ёвуз,  
Суҳбати – бешафқат, сукути – фарёд.  
Ёнингга келгандаи сўнг нафас олис,  
Ёнингдан кетгандаи сўнг мадад ҳаёт.

Кузакни жонга жам этмоққа сен ҳам  
Ўргандинг. Куйлайвер. Йиглаган – юрак!..  
Сенсизлик бир боғда хазонман мен ҳам,  
Мехрсиз шамоллар юрибди судраб.

Келётган қиши оша баҳорга боқгум:  
Чайқалар шамолда гулшанлар – тенгсиз...  
“Оҳ” ургум, ўзимни батамом ёқгум –  
Баҳор ҳам сенсиздир,  
баҳор ҳам сенсиз.

2002





\* \* \*

Куз шамоли қоқди майин.  
Хазонбоғнинг эгнини.  
Куйлаб қолди кимдир – тайин!  
“Абдураҳмонбеки”ни.

Абдураҳмон! Абдураҳмон!  
Раҳмоннинг қули! Қули!...  
Қайси дардда ўртанса жон,  
Куйлар юракнинг қули?

Куйла, нола! Куйла, фарёд!  
Сенинг авжларинг – асл.  
Сенда,  
Менда йиглар озод  
Вақт асири – бу фасл.

Абдураҳмон! Абдураҳмон!  
Кўнгилнинг қули! Қули...  
Сен – кузакнинг мангуликка  
Яширган ўлмас гули.

2002





\* \* \*

Чин хазонрез.  
Боғларда тез  
Шамол сайри —  
Тўполон.

Жоним — бир барг...  
Азиз дарахт,  
Видога ҳам  
Йўқ имкон.

Кетаяпман.  
Етаяпман...  
Дарахт,  
Тушунтириб боқ —

Ерга ботиб  
Борган сайин  
Қандай бўлар  
Кўкармоқ?

2002





\* \* \*

Кузги шаҳар чорбоғларин  
айланиб юрар анҳор.  
Соҳилларда кезар – шамол  
етаклаган хазонрез.  
Парвардигор! Бор чинларим  
бекор бўлмоқда,bekor.  
Парвардигор! Сени излаб,  
кетгим келмоқда бу кез.

Ёлғиз баргта термулганча,  
ана, серраймиш кимдир –  
Ул донишманд хазон баргда  
уқдими дун равишин?  
Қиши-у баҳор, ёз оҳангি  
дилдан оққани чиндир,  
Энди дилга оқар – кузнинг  
кўз ёшдан хўл товуши...

2002





\* \* \*

Дарз кетади – айтолмайсан шарҳ –  
Дунё нафис – хитойи идиш.  
Бир қарагин, дараҳтлар бебарг –  
Куз тугади – бошланади қишиш.

Мен ёнгинрез севгимни айтдим,  
Куз яратдим – этмадинг парво,  
Энди қишининг қорида қайтгум –  
Бевазн оқ руҳида пайдо.

Музладингми? Сўрама мадад,  
Йўқ, қўлимдан келмайди ёниш...  
Бир қарагин, дараҳтлар бебарг –  
Куз тугади. Қиш бошланди... Қиш!

2000





\* \* \*

Мен қувониб гул узатгандим,  
Ким юзимга итқитди хасни?  
Сигинганим, суйганим маним,  
Бахти бўлиш мумкин эмасми?  
Тоғ бўлмоқни орзу этгандим,  
Бошимга қор ёғди – аломат.  
Тизимгача етди хазоним,  
Руҳимгача – ўтли каломат.  
Бу бешафқат кузда мен – якка,  
Баҳор кирап тушларимга кўп.  
Шовуллайди тирик юракда,  
Кўкармоқни соғинган бир чўп.  
Вақт етди! О, кўксимни ўйсам,  
Ниҳол, сени кетсам ўтқазиб!..  
Жоним сени кузатиб кўйса,  
Бу беомон қишдан ўтказиб.

2000



---



\* \* \*

Баланд тоғларга тушди қор,  
Юрак түлди.  
Сен ҳам кетасанми, куз?  
Мен руҳимдан бир қүш ясай,  
Баҳоргача учсин уйқусиз.

Қаҳратонда зор қуйласин,  
Йиғлаб-йиғлаб,  
Бузиб барча қўнгил торин...  
Қайтиб келсин уни тинглаб,  
Қайтмас бўлиб кетган баҳорим.

1999





\* \* \*

Неча кунки тузалмайди  
Ҳавонинг бузилиши...  
Аммо бугун ўзга эрур  
Кузакнинг тузилиши.

Хазонрезга авж бермасдан,  
Сочқиламай бемиқдор —  
Минг қўл саркор — куз шамоли  
Ёмғирда ётар бекор.

Елкалари ним титрайди,  
Ўзин унуган, ўзин...  
Токчадаги қулф очилган  
Гулда беғубор кўзи.

1997





\* \* \*

Етдимми сўнгимга,  
Ҳамма дардим тинч.  
Фақат куз кўнглимда  
Улгайди соғинч.

Фақат руҳ садоси –  
Сокин соз – нидо –  
Соғинчнинг сатоси –  
Зирқирап танҳо.

Нуқтага етилган –  
Тугагандир баҳс.  
Кўз ёшдан ўтилган –  
Фақат соғинч дарс.

Хазон ёмғирига  
Кўмилиб йўлим,  
Сенга – тақдиримга  
Бораман, гулим.

Гулим, кузги гулим.  
Қодир гулимсан,  
Сенга нима ўлим! –  
Ботир гулимсан.

Ич, менинг лабимдан  
Тирикликни ич...  
Тириклик соғинчдир,  
Тириклик – соғинч.

1998

\* \* \*

Кундуз-кундуз қордир,  
Кеча-кеча қор;  
Юлдуз-юлдуз қордир,  
Кўча-кўча қор.

Тоқатда – танаффус,  
Софинч – бепарвоз.  
Тақдирлар – тақир муз,  
Кўнгиллар – аёз.

Терлаган дераза –  
Саккиз кўз аждар –  
Жонни – беовоза  
Ютару ютар.

Сен ҳақда шеър ёзмоқ –  
Хатарли бу дам –  
Кўзимдан ёш оқса,  
Тўхтатолмайман.

2004





\* \* \*

Қишининг илдам шоми бирпасда тушди.  
Ҳаммага тушдими, бир касга тушди?  
Симёғочлар тутди нурдан гулдаста –  
Ҳамма нур дасталар тунги қафасда...  
Гулим, соғинч сўнгги нафасга тушди.

Жон – қушдай учмоққа ёзди қанотин,  
Тумандай узилиб умр қолмоқда.  
Менинг ҳаётимдан азиз ҳаётим,  
Барча йўлдан кечиб топган работим –  
Сўнгги нафасим ҳам сен деб ёнмоқда.

Кўчада сўнг лаҳза ногоҳ ушлади,  
Ногоҳ симёғочга суюнди елкам.  
Лабимни жонҳолат оғриқ тишлади,  
«Нима гап?» – юрагим кўксим муштлади...  
Сенга интиқликни кўммоққа ер кам!

Бу кўчадан ўтма... Яшайсан бекас –  
О, умринг мен каби ўтар зориқиб...  
Бекат. Автобусга чиқолмайсан, бас,  
Ўлтириб қоласан – шундоқ толиқиб.

Соғинган қўзингда тебранар бесас  
Симёғоч. Тагида чироқ ёруғи...

2000

---



## ДЕКАБРЬ

Бир тутам кунни Вақт учар тутамлаб,  
Беқор қишиш – ҳовлида ўлтирадар беиш.  
Юрак бу дунёнинг равишин англаб,  
Беяпроқ фаслга билдирад ройиш...  
Покиза бу ойнинг ҳар они мактаб –  
Мумкинми дарсларин оламга ёйиш?

Куним қисқа бўлди, тунларим узун...  
Аслида янгилик эмасдир бу ҳол:  
Аммо табиатнинг иши безуғум –  
Жавоб ҳам бермайди, бермайди савол,  
Бу қисқа кунларим – бир тиник афсун –  
Бу афсун ичида йўқдайин завол.

Куним қисқа бўлди... Қорсиз боғларнинг  
Беяпроқ туриши негадир аянч,  
Аммо бу аянчдан дил топар таянч,  
Тузалиб боради дилда доғларим –  
Қисқа кундузларнинг мунги бир суюнч,  
Кучсам, порлагандай тим чироғларим.

Кун – қисқа... Узайди туннинг парвози,  
Бу узун кечалар бироқ руҳнисор,  
Умрингни этмайди бекорга бекор...  
Тонгда ўтолмайсан бўсаға босиб,  
Кулиб шивирлайсан: “Қор ёғипти!.. Қор...”  
Ва кечган кунлардан бўласан рози.

1999



\* \* \*

Сирғанади музда шўх шамол,  
Йиқилади қорга юзтубан.  
Мен совуқда ёнаман ҳамон,  
Уйғонаман барча уйқудан.

Деразамдан тушган парча нур,  
Тешиб ўтар тим қоронгуни.  
Қай бир ёлғиз чархда тафаккур –  
Ногоҳ тутиб олади уни.

Юрагимга нохос урилган –  
Шу қиши туни – кимнинг фармони?  
Ҳамма довон, наҳот, сурилган –  
Келди Ҳақ-ла сўзлашмоқ они?

Лайлакқордай учади сўзлар –  
Бу дунёдан улар қадимдир.  
Бир аниқ сўз тополсам агар,  
Икки дунё – икки қадамдир.

Ойна каби ёруғланди дил!  
Дил – чексизми, чексизлик акси?  
Жон берайми?.. Қани, Азройил?  
Битсин Чин ва Риёнинг баҳси.

Юракдаги ханжар бу – олам,  
Жароҳатдан ўсмоқда сабот...  
Ё қўяйми энг сўнгги қадам?  
Яшайнми?... Қаерда Ҳаёт?

1998

---



## ҚОРНИНГ ЁҒИШИНИ ТАСВИРЛАШГА УЧ УРИНИШ

### 1

Хаёлларми сўзлашар  
Пичир-пичир, беозор?..  
Учқунлаган зиёга  
(Аммо рақси зиёда)  
Менгзаб ёғаяпти қор.

Ёғмоқда суза-суза,  
Гоҳ айланаб, гоҳ учиб.  
Қишдан кўнгилга кўчиб,  
Минг шакл тузатуза  
Кўнгилни олар кўшиб.

Қандай оппоқдир олам —  
Тоза, гўзал, мукаррам.  
Эшикни очиб бу чоқ,  
Тўхтаб қоламан узоқ —  
Корга кўёлмай қадам.

### 2

Қор ёғди йирик-йирик,  
Қор ёғди лайлак-лайлак,  
Қор ёғди тирик-тирик —  
Бунча тириқдир, кўриб —  
Чидай олмайди юрак...

Навони кесиб-кесиб,  
Деразага урилар

Чархнинг узилган тори.  
Юрак-бағримни эзиб,  
Кўкрагимда уринар  
Бу оқ чолғунинг зори.

Қор ёғар учиб-учиб,  
Қор ёғар аста-аста,  
Қор ёғар кўчиб-кўчиб,  
Қор ёғар ўчиб-ўчиб –  
Мен маст бўлдим бирпасда!

Дунё қўшиққа тўлди!  
Ундан бир ун олишга  
Парвардигор, журъат бер...  
Таслимман!... Тамом қўндим  
Музларингда ёнишга!..

Оқариб бормоқда ер.  
Оқариб бормоқда ер...

### 3

Қор ёғади уззукун,  
Қор ёғади узун тун,  
Қор ёғади – узун мунг,  
Ёғади маҳзун-маҳзун –  
Менинг ҳушиму ўнгим,  
Менинг бечора қўнглим –  
Учади учқун-учқун.

Нонимга-ю ошимга,  
Биттагина бошимга,  
Тупрогимга, тошимга,  
Тентираган лошимга,  
Сифмай фамгин нисбатга,  
Қор ёғади қисматга –  
Энг яширин ёшимга.

Йўқотгандай эсини,  
Қор ёғади эзилиб.  
Кўзёш қаби узилиб,  
Кўнглим борар бузилиб.  
Борлигу йўқсизликка,  
Ёғар йўл-йўлсизликка –  
Бор умримга чўзилиб.

Қунларимга ёғар қор,  
Йилларимга ёғар қор.  
Юракларимни йиртган –  
Унларимга ёғар қор.  
Руҳим дунёни тутган –  
Гарчи баҳорим бекор.

Куз чоғи мезон бўлган,  
Тўкилган, хазон бўлган,  
Хокликка равон бўлган,  
Бир умр армон бўлган –  
Сўзларимга ёғар қор,  
Ўзларимга ёғар қор...  
Жисму жон қорга тўлган –  
Мадад бер, парвардигор!..

Қор ёғар, дунё оқар,  
Вақт ошкор қанот қоқар...  
Мен ҳам қордай эрийман –  
Қисмат жимгина боқар.  
Анов, печда эринмай  
Дунё умримни ёқар.

1998





\* \* \*

Омон қолдирмайди бошпанасизларни  
бу қаҳратон.  
Чумоли қаердасан?

Күшларнинг қаноти бор –  
учиб кетдилар. Кўраларда кавшанар –  
сомонга тўйган сигирлар. Кўршапалаклар  
зулмат тарқатувчи чироқлардай  
форнинг шифтларига осилган. Одамлар иссиқ  
уйларида  
телевизор кўрарлар.

Чумоли қаердасан?  
Етти қават ер остидан овозчанг келар.  
Тирикмисан? Кимдан ўрганай  
бу қаҳратондан омон қолмоқни?  
Күшданми?  
Мана, бу молларданми?  
Кўршапалақданми?  
Ёхуд... сен каби  
Етти қават ер тагига кириб кетсаммикан  
бу қиш ўтиб кетгунча?

Ёхуд мана бу дараҳт каби  
қорга кўмилиб, қиш ўртасида турмоқ  
маъқулдир?

Ёки баҳор бўлайми шу қишда –  
бемаҳал баҳор?

Ҳамма қарғайдиган баҳор бўлайми?

1999

---



## ҚИШ

### 1

Иқлим авзосида ўзга тариқат:  
Янги либосларга ўради боғни.  
Ёздан сўнг бошланган хазон ҳаракат  
Сўнгигига етдими охир? Қор ёғди.

Зинада турибди одам. Ҳовли, боғ,  
Ундан нари – дала: нақадар равшан!  
Мусаффо кенг оқлик дилга кўчган чоғ,  
Узилиб боряпти негадир тандан.

– Менга бахш этгани яралмоқ бир ҳол,  
Келдингми, азиз қиши – оқтан фаришта?!

Қорга қадам босмоқ негадир увол,  
Учиб ўтмоқ эса шунчаки ишдай...

### 2

Оппоқ тўшакларда  
олади ором,  
Ўсишдан таътилга  
чиққан боғу роғ.  
Руҳимга ҳаяжон  
этгани инъом,  
Сўзга муздай лабин  
босган бу илҳом –  
Нечун барча шеъркор  
дамдан ёруғроқ?

Эй, қиши! Англаганга сен ҳам бир мактаб!  
Кумуш дарсхонангга боқдим — суюндим.  
Ҳайрат юрагимга майдай қуилди...  
Сенинг ишқингда маст учгани сабаб,  
Қарға ҳам кўзимга ажиб туйилди.

2007

### ҚИШДАГИ СОФИНЧ

Қишига қамал иссиқ бир уйдан  
(Деразада оғир пардалар),  
Мақом ўксиси бўзлаган куйга,  
Жўр бўлганча, товшинг тараалар.  
Тувакларда гуллар очилган,  
Токчаларда терилган қатор.  
Севгимиздан сен олиб қолган  
Ёдгор шуми — бир парча баҳор?  
Кўз ёшинг ҳам тамом ўзгача:  
Оғир!.. Қайдан артмоққа мадор?  
(Fam — тақдирдан токи кўзгача  
Дунё қадар топади залвор).  
Сен асрайсан парча баҳорни,  
Fусса тўла хонанинга қамаб —  
Умримизни гулга тўлдирган  
Кўклам мангу кетганин англаб.  
Мен-чи, сени соғиниб бу дам  
(Сўнгги нафас олган тариқа),  
Шеър ёзаман — уйга қамалган  
Маҳбусгина баҳор ҳақида.

2008

\* \* \*

Эркин-эркин ёғди қор (уникими бу олам?),  
Бу дунёда факат қишиш борлигига ишониб,  
Оппоқ софлик ичраким тегра-атроф муҳташам,  
Негадир учмоқ учун шайланар беқанот ғам —  
Рұхға қишидай мададкор ёрлигига ишониб.

Негадир тақдир билан бошланған хушбаҳт суҳбат,  
Аллақандай хотирга юраклар чўкар зим-зим —  
Дилни тамом очмоққа дунёнинг бори хилват.  
Негадир бу кечаси сенга охир ёзсам ҳат,  
Унинг ҳар бир сўзига ишонасан, азизим...

2008

### ҚИШДА ЁЗИЛГАН ХАТ

Чирсиллади кўқда юлдузлар —  
Аёз туннинг исканжасида.  
Үйлар, боғлар, дала-ю тузлар  
Қаҳратоннинг муз панжасида.

Қишиш — баҳайбат, даҳшат йиртқич қуш —  
Чангалида тош қотган олам...  
Сен тарафда эридими муз,  
Ё қишимисан ҳали-ҳали ҳам?

Бунда битган озоринг ранжи —  
Томчи ёшдай баҳтдан узилиб,  
Сени эслаб яшаяпман жим,  
Хотиралар билан исиниб.

2008

## ҚИШДА ДАРАХТГА ЁЗИЛГАН ШЕҮР

Ухла, қорда – ҳордифинг,  
Ухла, роҳатда музлаб.  
Чарчагансан – борлифинг  
Баҳорлаб, ёзлаб, кузлаб.  
Уриниб ер тагида,  
Тупроққа сингиб бот-бот,  
Зич зулматнинг захидан  
Томириң топган ҳаёт.  
Илоҳий бир дастурнинг  
Ўсмоқлик шевасида –  
Йилинг кечган заҳматнинг  
Баргу гул, мевасида.  
Ухла, роҳатда музлаб,  
Ухла... Нечун хавотир?  
Нимадан бегам сўзлар  
Бошингда нодон тақдир:  
– Ухлагин!  
Ташвиш бекор!  
Етса уйғониш рўзи,  
Уйғотарми, ёки йўқ –  
Билар қаро ер ўзи...

2006



---



## МАРТ

Күёш балқди осмон бетида,  
Шамолларга булутлар талош.  
Қор эриди. Кўча четида  
(Тахминимча, соат иккида)  
Қатор томлар қатор тўқди ёш.

Ер тагидан илоҳий соғинч –  
Шиддат солиб илдизлар аро –  
Куртакларга етишди нотинч:  
– Кўкар! Тезроқ бўлсанг-чи барпо!

О, қаердан озодлик тушди,  
О, очилди кимнинг қафаси,  
О, қай зарбнинг эрка нафаси? –  
Йўлаклардан қушлардай учди  
Баланд пошна туфлилар саси.

Ҳаёт билан май ичдим бугун,  
Энг чиройли қўшиқлар бошлаб.  
У мен билан куйлади узун,  
Кўчаларда кезаркан, мажнун  
Қўлларини елкамга ташлаб...

2003





\* \* \*

Шамол соchlарида майсанинг бўйи,  
Қуёш ёғдусида гуллар ҳиди бор.  
Гуллаган бошини елкамга қўйиб,  
Бу шеърни мен билан ёзишди баҳор.  
Санқиган булутлар кезди фалакда,  
Гоҳ қуёш бекинди, гоҳ сочди ёғду.  
Ҳар сўзни битталаб узди юракдан,  
Теграмни ўраган ям-яшил туйғу.  
Миямнинг тош-метин зирҳини чақди –  
Илиқ зиёларга ўралди онгим.  
Нозик тўлғонишда кўзимга бокди...  
Ишондим, баҳорим, сенга ишондим!  
Ишондим, саратон асир олган пайт,  
Мен сени чорласам армонда ўлиб,  
Сувсиз чўлларимга борасанми, айт,  
Ям-яшил, маст-аласт дунёга тўлиб?  
Гуллаган бошини елкамдан олди,  
Бир дам шеър ёзишдан тўхтади баҳор.  
Зумрад оловларга қучоғи ёнди:  
– У пайт соғинмайсан – саволинг бекор...  
Не учун бекинди оламдан қуёш!  
Ё кун тугадими – уфққа ботди?  
О! Менинг елкамга тушган томчи ёш,  
Юрагимга оқди... юракка оқди...

1997



\* \* \*

Бу нафасдан кўрқма, томоғим...  
Ҳа, ўпкамни тўлдирган баҳор!  
Қани, менинг яшил япрогим? —  
Қишиш бекордир,  
Ахир, қишиш бекор.

Аммо сўзлар келмагай қайтиб,  
Тилларимнинг ботин онгига.  
Гўё бор сўз бўлинган айтиб,  
Шу қишиш билан видо онида...

Жим тураман. Елкамдан ёмғир  
Сизиб борар юракка қараб...  
Бу — дараҳтмас...  
Бу — менман, ахир!..  
Битта сўзим гуллади, қара!..

1998





\* \* \*

Қандай атир бўю  
Қандай сиймбар –  
Ёмғирга тун бўйи  
Чўмилган саҳар.

Танига етди жо  
Қанчалар яшин,  
Баҳорги бу дунё  
Порлар – ям-яшил.

Гуллаган боғларнинг  
Ранги оқ, пушти...  
Дараҳт, тонг чоғлари  
Гулларинг учди.

Учди фидо гуллар –  
Енгил, беовоз:  
Шундай тирик улар –  
Тилга келмас роз.

Учди... Дунё боғи  
Топмади озор.  
Холбуки, тонг чоғи,  
Холбуки, баҳор...

2001

---



## БОЙСУНДА ТУМАН

### 1

Кофурун устида тахланди булут,  
Булутга жон кирди – булутлар ўсди.  
Ҳар ёндан уфқлар жүнади юриб,  
Қирларни ютди-ю боғларни түсди.

Булутлар барига келди эргашиб,  
Теграни ўради – йўқолди йироқ –  
Тўрт тараф бошларга қолди энгашиб,  
Торлик барпо бўлди – ипакдай юмшоқ.

Ноаниқ фикрдай дунё тўзиди –  
Қайга руҳинг тушса унарми сеҳр?  
Асрорларга кўмиб янги рўзини,  
Тангри ушбу тарзда кўрсатар меҳр!

Инсон туман ичра кезади танҳо,  
Шабнамли майсалар теграсида тинч.  
Руҳида уйғониб келади аммо,  
Йўқолган йироқлар ҳақида соғинч.

Дунё адашиб кетди  
 Туманларнинг ичида.  
 Арвоҳлар каби кезар  
 Даражатларнинг сояси.  
 Осмон шарпаси тегди  
 Сочларингнинг учига,  
 Юрагингни забт этди  
 Сирларнинг ҳикояси.

Эҳтимол шу атрофда  
 Туман оралар юлдуз,  
 Фаришталар тегрангда  
 Жимжит қоқмоқда қанот...  
 Мўъжизавор ҳолларга  
 Чўлғонса пари кундуз –  
 Тушдагидай нозикдир  
 Беҳол тўзғинган ҳаёт.

Бу онларда руҳингнинг  
 Чексизлигин сезасан,  
 Аммо қафасга солди  
 Уни қайси доимот?  
 Туманларга айқашиб,  
 Дунё каби кезасан –  
 Парвардигор яратган  
 Энг асрорли коинот.

Туман тарқар. Олисда  
Аниқ қўринар тоғлар,  
Зумрад даштнинг устида –  
Товланар ҳасан-хусан.  
Боғларда ёрқин балқир  
Япроғлар-у бутоғлар...  
Ёлғиз ўзинг бир ҳовуч  
Туман каби турасан.

2002





\* \* \*

Қатор-қатор гуллади  
Қатор-қатор гилослар,  
Ҳар гулида дараҳтнинг  
Қайта яралмоғи жо.  
Дунёга хўб ярашди  
Бу дам тирик либослар –  
Бир юраквор ҳолатда  
Ҳаёт бўлмоқда барпо.

Ҳаётга чиқ, азизим,  
Сен ҳам телба очилгин,  
Мен боғда кезаяпман  
Шабодалик шаклимда,  
Мастона мавжларимда  
Бўйлар каби сочилгин,  
Бунёдликни расм эт  
Бу мусаффо ёлқинда.

Дунёни селдай босди  
Баҳорнинг гул босқини,  
Севгининг титроғлари  
Рұҳга нурдай тарағдиди.  
Не учун кўзларингда  
Яна кўзёш тошқини?  
Яна соғинч яралдими?..

...Яна соғинч яралди.

2002

79



\* \* \*

Кунлар – илиқ,  
кунлар – тиниқ,  
кунлар – тирик,  
тирик куй.

Апрель,  
даврон қурмагимга –  
гуллаётган  
юрагимга –  
ўсаётган  
руҳинг қуй.

Дунё сўл-у  
соғларида,  
Ҳаёт ели  
елмоқда –  
дараҳтларнинг  
шохларида  
мева бўлгим  
келмоқда.

Адо этдим  
юракликни –  
етишди  
эзгу қарор:  
мева ичра  
данакликни  
Кўнглим этди  
ихтиёр.

Данак бўлсам,  
Ердан мадор –  
Қудрат олиб  
кўкарсан.  
Бу ҳаётни  
ўсиш қадар,  
гуллаш қадар  
кўтарсан...

Юрагимдан  
қувват олиб,  
руҳ мавжланар  
кўкламда –  
худди Ҳаёт  
яратгудай  
қудратим бор  
бу дамда.

*2000*





\* \* \*

Боқقا баҳор қайтар...  
Кипригингми ҳўл?  
Азизим, баҳт қайдა?  
Азизим, баҳт қайдা?..  
О, фақат сарғайма –  
Гулламоққа кўн!  
Гул каби уйғон-у  
Гулларга чулғон.  
Дунё – гулкор чолғу,  
Дунё – гулхор ёҳу,  
Сен билан тўлғон у,  
Сен билан тўлғон.

Қишиш ўтди – баҳорнинг  
Кузга видоси...  
Боқقا гул тақар ким?  
Ёмғирда оқар ким?  
Осмонни ёқар ким? –  
Кимнинг нидоси?

Жонингни шаробдай  
Ўртади дунё –  
Бу қизғин гуллашда  
Ифтихоринг йўқ.  
Сен билан яралгим  
Келмоқда, ёр-о,  
Танингда тараалгим  
Келмоқда, аммо –  
Энди кўкармоққа  
Ихтиёrim йўқ.

Алвидо!.. Алвидо!  
Жондан азизим!  
Нега бунча мушкул  
Бу мангу завол?  
Мен сени гулларга  
Яширдим девдим,  
Мен сени ҳаётга  
Топширдим девдим –  
Аммо баҳор ичра  
Турибсан мавзун  
Куздан учеб келган  
Япроқдай беҳол.

Кам юрак бўлдимми,  
Кам армон бўлдим –  
Тангрига етгувчи  
Фарёдим йўқдир.  
Кам хазон бўлдимми,  
Кам тамом бўлдим,  
Балки куздан бадтар  
Бир замон бўлдим –  
Биргина севгимнинг  
Бунёди йўқдир.

Боққа баҳор қайтар –  
Қандай тирик ҳол!  
Азизим, баҳт қайда?  
Азизим, баҳт қайда?..

...Баҳт йўғ-у бу дунё  
Гуллар бемалол!

2002





## МАЙ. ЁМФИР

Баҳор камалакни қўйди қўндириб  
Дунё манглайига – етти асил ранг.  
Бошидан чеълаклаб ёмғир қуйдириб,  
Боғ эса овора чўмилиш билан.

Булутли бағрида оловлар униб,  
Қарсиллаб ненидир сўзларкан фалак –  
Тангрининг мукаммал ишидан тўлиб,  
Тарбият олади бу маҳал юрак.

Юборган ҳар лаҳзанг – нақадар гўзал!  
Юрак сўз топмоққа лол қолган бу дам,  
Ёмғирли оламга боқиб муфассал,  
Майлими, номингни такрорлаб турсам?

Тангirim! Баҳорингнинг ҳусни зиёда,  
Термулсам, кўкарап танимда ғайрат!  
Оқибат не қолар мендан дунёда? –  
Сенинг ижодингдан нурланган ҳайрат...

2007



---



## ЖАВЗОДА ЮЗ БЕРГАН БИР БАХТ ХУСУСИДА

Боғларда айқашди соя ва зиё —  
Шамол қадамида ором юришлар.  
Дарахтлар бағрида серсевинч ғавғо —  
Бетартиб куйлади бетартиб қушлар.

Шохидა қизарди гилослар — фуж-фуж,  
Үрик довчасига кирди ранг-у таъм.  
Боғлар вужудида тўлиб-тошди куч,  
Ҳар навда — шижаат, ҳар бир барг — кўклам.

Нима бўлди менга? Қувончим беҳуд —  
Не учун ҳаётга боқиб тўлиқдим?  
Ахир, қандай бахтга ногоҳ йўлиқдим:  
Юрагим кўксимдан тошдими, ёхуд  
Умр ўтишига охир кўниқдим?

2000





## СОФИНЧ ЙЎЛИ

\* \* \*

Юракда узун оғриқ.

Хатлар  
ёзилмай ўлмоқда.  
Унсиз фарёдга  
айланганман.

Учрашолмаймиз.

Оғриқ бесарҳад –  
яшаганим билан  
умрим етмайди.

Гап шундай.

Софинчинг  
ўлдиргани қадар  
гап шундай,

азизим...

2007



\* \* \*

Эй, ўзини ишга берган,  
ҳасратга берган,  
турмушга берган,  
фақат соғинчинг қолди менга,  
ўзингдан чиройли соғинчинг.

Сенга қарай десам,  
кўз ололмайман соғинчингдан,  
Излаб борай десам,  
қўймайди соғинчинг...

2008





\* \* \*

Ҳар лаҳза  
қоғозсиз  
хат ёзаман сенга.

Сен билан сўзлашаман.

Суқунатларим  
хатлар билан  
тўлиб-тошган.

Хатларим –  
ҳижрон лаҳзаларидаи  
узун;  
айрилиққа тўладир  
кунларимдай;  
умримдай  
соғинчда  
қоврилган...

Мен  
жавобсиз хатман.  
Фарёдларим беун.

Негадир  
сендан ўзганинг  
жавоби  
керакмас  
менга...

2007



\* \* \*

Умр шомга етиб келган чоқ,  
Менга бу баҳт нечун берилган?..  
Оқ бўйнингга бир шода мунчоқ  
Икки ўрам қилиб терилган.  
Бўлингансан мингта (қайдасан?):  
Бири ҳазин, боз бири ҳарбли...  
Дарднок-дарднок сўзлар айтасан –  
Дард ичинда барчаси қалбли.  
Супуринди ташвиш қаъридан,  
Бўй таратар атиргул – кўнглинг.  
Сен қувончдан жуда нарисан,  
Фожиага туташган сўнгинг.  
Барчага шоҳ қисмат зайлини  
Шаҳд етасан қўлда тутмоққа...  
Мунчоғингни ечсан, майлимӣ,  
Айланмасдан туриб сиртмоққа?

2007





## СУРАТИНГНИ ЧИЗИШ

Аввало руҳимдан пок гуллар уздим,  
Сенинг юрагингни гуллардан чиздим.

“Кўзи қайда”, – дедим, фалакка боқдим,  
Энг ғамгин юлдузни ахийри топдим.

Умринг эса чарчоқ қушнинг парвози:  
Бемадад ҳавога парвознинг рози.

Вужудинг – мукаммал ажиг иморат:  
Тасвири – ёғду-ю нурдан иборат.

Сўзларинг – бетуман – чўғ каби аниқ,  
Гулхан қисматингдан тушмоқда ёниб.

Аён кўринсин деб сен яшар дунё,  
Армон суратин ҳам айладим барпо.

Барини бир қатра ёшга жойладим,  
– Худди унинг ўзи! – нола айладим...

2007





\* \* \*

Бу хазон дам теграмни  
Қамраб олди рутубат:  
Мени сенга зор этган  
Айрилиқнинг кузаги.  
Хозир ихтиро этдим  
(О, сўзга етди рағбат!),  
“Яралиш”нинг аслида  
“Яра” эрур ўзаги.  
Софинч эса бепоён!  
Танга тўлди уқубат:  
“Қайдасан” деб йиғласам,  
Жавобсизлик бемиқдор!  
Бурда-бурда дардларнинг  
Қайси бири талофат,  
Қай бирининг қатида  
Сен яширган қуёш бор?  
Ёшни ортиқ тутолмас,  
Тошдан эмас-ку кўзлар,  
Рұхга тўфондай урди  
Азобнинг тарагалиши.  
Мен “оҳ” урсам, “оҳ”имдан  
Тўкилди изҳор сўзлар...  
Нега бир зум тўхтамас  
Севгининг ярагалиши?

2007



\* \* \*

Айрилиқхоним,  
бунчалар айрилиқсан!

Юмушинг айри эди,  
ташвишиңг айри эди,  
фарзандларинг айри эди,  
оиланг айри эди... —

энди кўзёшларимиз ҳам айри-  
айридир...

Айрилиқхоним,  
жондан жабр ўтди,  
азобларда самар йўқ;  
ҳижрон — аждарҳо  
тўхтамай  
ютар мени,  
дарё бўлсам ҳам,  
тугаб боряпман...

Йўлимиз айри бўлди,  
ўйимиз айри бўлди,  
сўзимиз айри бўлди,  
сиrimиз айри бўлди —

бор дунёмиз иккига бўлинган.

Айрилиқхоним,  
айрилиқсан?

Бундан ортиқ  
яна қанча  
айрилиш мумкин?

Мұхаббатни эса  
ақратиб бўлмаяпти  
иккига,

Айрилиқхоним...

2007





\* \* \*

Йўқ, жон каби менга кераксан!  
Гар умримни айладинг туроб...  
Хозир... Хозир ўтади азоб!  
Сен азалдан кечар юраксан,  
Нур “ялт” этса, этгучи хароб.

Ранжи фироқ! Жабрингда ундин:  
Теранликка тортди бедодинг,  
Юксакликка отди барбодинг...  
Қандай гўзал зулматга тўлди  
Бўм-бўш қолган менинг ҳаётим!

2007

### ТУНГИ БАЛЛАДА

“Воҳ, сенинг ишқингда ўртаниб кетдим!” –  
Кечами, соғинчми бошлади ялла...  
Мен сенинг йўғингга ўрганиб кетдим,  
Аммо ашуладан тўлғониб кетдим,  
Ой кўкда кўзёшдай осилган палла.

“Воҳ, сенинг ишқингда ўртаниб кетдим!” –  
Бирорнинг “оҳ”ига чулғониб кетдим:  
Ўзим айтай десам, баётим йўқдир,  
Сенсиз яшай десам, ҳаётим йўқдир –  
Ҳаётсиз умрга ўрганиб кетдим...

2007



\* \* \*

Кўнглим бир балони сезиб юрибди.  
Теграмда хавотир кезиб юрибди...  
Келар кунларимда нима? Ёнгинми?  
Жоним вужудимдан безиб юрибди,  
Гумонлар бағримни эзиб юрибди –  
Ўзи нима бўлди? Сенсиз қолдимми?

Тақдир бисотида эса аломат  
Ўша қадим сандиқ: ичида қат-қат  
Туҳфаси тахланган – ҳижрон-у ҳижрон...  
Қайтариб бўлмайди туҳфасин, инон!  
Кетсанг, армонга ҳам кўнаман. Фақат  
Унута олмайман сени ҳеч қачон.

Куёш чарақлаган ажиб қаҳратон  
Оралаб кезаман Тошкентда якка.  
Оғир савдо тушди бошга, юракка...  
Сени топмоқ?.. Осон!.. Мана, телефон!..  
Аммо ҳаёт ўхшар даҳшат эртакка –  
Воҳ, сени сендан ҳам топмоқ даргумон...

Тепамда бир бало кезиб юрибди.  
Теграмда хавотир айланар ёмон.  
Мантиқа мантиқлар бойланар ёмон –  
Кўнглим мантиқлардан безиб юрибди:  
– Унута олмайман сени ҳеч қачон!..  
Унута олмайман сени ҳеч қачон!.. –  
Фақат шу мантиқни сезиб юрибди.

2007

---

\* \* \*

Қандай довон  
тушди ўртамизга?

Ёнма-ён ўтирибмиз:

суҳбат зўриқар –  
сўзлар майда-чўйда,  
юзларда бежон табассум,  
мени чекиб,  
тутайди сигарет...

Етиб бўлмаяпти  
бир-биримизга.

Ҳазин ғашлик  
юракка соя ташлар.  
Кетаверсанк бўладими  
икки тарафга?..

Аммо бармоқларингга  
тегар бармоғим:  
– Сени севаман!  
(Сукунатни шивирлайди у).

– Мен ҳам...  
(Бармоқчаларинг изҳори  
сукунатдан ҳам наридан).

Бармоқларингни (кафтларингга)  
шошиб  
яширасан...

Кўйиб берсанг,  
бу ўнта оққуш  
(учиб келиб),  
елкамга қўнгусидир.

2007





\* \* \*

Кўнглим қолди сендан.  
Қолди.  
Ўтиб кетавер.  
Ёхуд орқага қайт –  
барибир қолди:  
автобусдан тушиб қолган йўловчидай  
қолди.

Жуда фуссалидир  
қолган кўнгил:  
ҳамма нарсани билади у,  
ҳамма нарсани англайди –  
ҳатто  
вақтида қолиш шартлигин ҳам  
фаҳмлаган...

Хуллас,  
кўнглим қолди.

Қайтиб келсанг,  
тополмайсан уни.  
Иккаламиз изласак ҳам  
тополмаймиз:  
У – яланг бир рух:  
қаро ер қаърига чўккан,  
ё фалакка учгандир –  
юлдуз бўлгани...  
Хуллас,  
кўнглим йўқ.

Сен нечун йиғлаяпсан?  
Ахир, күнгилсиз қолган  
менман,  
азизим...

2007





\* \* \*

Ҳар лаҳзам  
юзма-юз сўроқ —  
оғриққа тоқат етмас.

— Бу муҳаббатни танимайман, — дейман.

Қийноқ.

— Бу муҳаббатни танимайман, — дейман.

Азоб.

— Бу муҳаббатни танимайман, — дейман.

Ўлим.

— Бу муҳаббатни танимайман, — дейман  
барибир.

Чунки  
ўлимдан  
минг карра даҳшатлидир  
сенинг бу лаънати  
муҳаббатинг...

2004

\* \* \*

Мен сени олисдан севиб яшадим,  
Дилни айтмоқликка топмадим журъат.  
Бетақдир йўлларни тамом ташладим,  
Англадим, юракка подшоҳдир қисмат.  
Йўқ, ҳеч ҳам керакмас ортиқ сийловлар,  
Кўздаги ёшимни артаман ўзим.  
Тунги бедорликлар, шеърий қийновлар –  
Фақат менга тегиш пинҳона рўзим.  
Гоҳо узоқлардан келар овозинг,  
Кўриниш бергайсан гоҳо бир лаҳза...  
Сен – менинг ҳаётда ёлғиз парвозим,  
Сен – менинг қалбимда умрбод ларза.  
Сен менинг бетўхтов яралишимсан,  
Сенсан – сўзга тушса, ёнган инқироз.  
Сен менинг дунёга таралишимсан –  
Кераксиз умримдан ортиқ эҳтирос.  
Не қилай? Кўмакми? Хўш, нима фойда? –  
Осон қилолмагай оғир йўлимни.  
Юракни узатмоқ зарурат жойда  
Сен мудом узатдинг нозик қўлингни.  
Қара, ўифлаяпман... - Қайси томонга  
Телба хоҳиш билан қадам ташладим –  
Алмашсам бўлурми лаҳзангни жонга?..

Мен сени олисдан севиб яшадим.

2000



\* \* \*

Умримнинг ҳар турфа фаслларида  
(Улар гоҳо аср, гоҳида бир он),  
Тушибми тақдирнинг таъсирларига,  
Ўзгартиб туради ўз шаклини жон:  
Сен даҳшат оғриқнинг занжирларида...  
Жон – сенми, телефон?

Мен кутдим... Аҳволинг қалай, ташқари,  
Нега оғирлашди енгилфеъл зумлар?  
Дунёни тўфонкор қисмат бошқариб,  
Узилиб кетдими ҳаволар, симлар...  
Титилиб бормоқда, қара, бошларим,  
Телефон, бўғзингни ушлаган кимлар?

Севгилим! Ишқ аро сеҳринг беадад –  
Машъум телефонга жонни кўчирдинг,  
У эса ўлимдай жим турар фақат,  
Дилингдан меними тамом ўчирединг?  
Тўфони дунёдан оғир сукунат  
Ҳаётни теграмдан чангдай учирди.

Софиндим... Ноилож йиғляяпсанми,  
Бурч-у ишқ ўтида ўртангандай аёл,  
Қандай йўл борлигин билмаяпсанми,  
Кўз ёшдай тўкилиб тинмаяпсанми,  
Телефон дастагин тутиб, эҳтимол  
Тақдирнинг ваҳийисин тингляяпсанми?

Тириклик маҳолдир!.. Ҳаво! О, ҳаво!..  
Менга содиқмассан, телефон – жоним,  
Ахир, яшаяпсан сукунат аро –  
Ўлгандир дунёнинг магнит майдони...  
Оlamга айтаман бепарво видо:  
– Бу – бир телефоннинг фамгин достони.

2000





\* \* \*

Энди тун бўлмайди.  
Тунларим ёп-ёруғ.

Дунёдаги Энг Гўзал Аёл,  
хаёлимни тарқ этма.  
Хаёлимда уйимга ташриф буюргин,  
гўё ишдан чиқиб келаётгандай,  
ошхонага кириб овқатлар пишир,  
телефонда қургин узоқ сухбатлар –  
қолдирма дунёнинг фийбатларини.  
Менга фарзандлар туғ –  
уч ўғил,  
уч қиз.

Ҳар куни энг янги қўйлаклар тиктирилар,  
Сочингни бўягин турфа рангларга –  
фашимни келтиргин,  
рашкимни келтириш.

Мусиқа қўйгин-да, кўз юмиб ўйна,  
телевизор кўргин тонгдан кечгача,  
ўқсиб йигла, ўқиб «Ўтган кунлар»ни...

Дунёдаги Энг Гўзал Аёл,  
фақат хаёлимни тарқ этма.

Мен эса  
бу тунсиз кунларда  
эртаклар тўқий сенинг ҳақингда,  
дунё мангу ўқийдиган эртаклар.

2000



\* \* \*

Дардинг мени еди,  
Дардинг ямлади...  
Рух-у юрагимни  
Сенга жамладим.

Қара, ўнта гулдир  
Ўнта бармоғим.  
«Оҳ» урсам, гулдаста –  
Ҳофиз томоғим.

Лайли баҳорингда  
Кузлар янчилди.  
Лабимда атиргул  
Лабинг очилди.

Селларинг оқдилар,  
Ютиб тошларни –  
Майдалаб андиша  
Тўла бошларни.

Нажот – минг бенажот  
Оқмоқ, англадим...  
Сенинг баҳорларинг  
Мени ямлади.

2000



\* \* \*

Иккимиз ўртандик  
Софинчда, юлдуз.  
Армонда тўлғондик –  
Куз келдими? Куз...

Олислардан майин  
Ёндирма, эй, чўғ.  
Сени суйган сайин  
Армонларим кўп.

Бироқ ғам – беҳуда,  
Айрилиқ – бекор.  
Кузда – чин туйфу-ла –  
Дийдор кўрмоқ бор.

Аммо бу висолнинг  
Армони кўпдир –  
Дийдор бор ва лекин  
Тўймоқлик йўқдир.

*2000*



\* \* \*

Фамингда тўлғондим — жон бергусиман.  
Ичгин, майдир жоним — жом бергусиман.

Тирик сақла фақат бу муҳаббатни —  
Иста — юрак, иста — қон бергусиман.

Жонингга тегдиму маним кундузим,  
Қүёш керакмасму? — шом бергусиман.

Англа, ҳеч қачон ишқ беёруғ ўлмас,  
Тунни қўй, шуълали тонг бергусиман.

Бир юрак очгайман — адо бўлмағай,  
Боқсанг — сир, изласанг — кон бергусиман.

Фақат ёр деб ўлмак бизга ҳалолдир —  
Ҳатто ҳалолликка онг бергусиман.

Дардим бўл, шоирлар — дардла муҳташам,  
Муҳташам «оҳ» ила — шон бергусиман.

2000



\* \* \*

Маним ёмғирпааст севгилим, қара,  
Бу ёмғир – девона – қузга кетади.  
Хазонга етади,  
Жонга етади,  
Ой ўтмай, юз очгай ғарип манзара –  
Севгини куздан ҳам нари элтади.

Сен асли адашдинг – баҳор чоғларда  
Ёғарди у ёмғир – гулкор, чақинкор.  
Барча йўқотишни айларди инкор,  
Ҳаёт гуркирарди мангубоғларда –  
Ё шундай ўйлашга эдик сазовор.

«Йўқ» дейсан – шамолда тебрангандай гул,  
«Йўқ, дейсан, атрофга қарагин – баҳор»...  
Сенинг шу туришинг – энг баҳорли кун,  
Сенинг шу туришинг – гуллаган афсун –  
Кузнинг йўқлигига энг гўзал иқрор.

Бир ёмғир ёғади дунёда – соҳир! –  
Айланиб энг одил шикорларида –  
Бу ёмғир сеҳрга жуда ҳам моҳир:  
У менинг кузимга тўкилар оғир,  
Севалар сенинг-да баҳорларингга.

2000



\* \* \*

Йўлларни танимай тунда бораман,  
юлдузлар чўккандир  
чўккан кўзимга.  
Гарчи армонингда юлдузпораман –  
сенсиз бир пора нур йўқдир ўзимда.

Бу тунда рўй берган, оҳ, қандай корлар –  
ундан на сўз келар,  
на оқади куй.  
Деразасин нурга тўлдириб порлар,  
менинг ёруғимни ўғирлаган уй.

*2000*

\* \* \*

Сен – чоғир,  
Симирсам – тугамас чоғир,  
Сен – сароб, югурсам – етиб бўлмайди.  
Сен – ҳаёт, меҳрингни кўтармоқ оғир,  
Ўлмасдан дунёнгдан кетиб бўлмайди.

Сен – дўзах, ёнаман йўқ гуноҳ учун,  
Сен – беҳишт, гуноҳим учун бу лаззат.  
Сендан айрилмоқча етмайди кучим –  
Сен – тангрим йўқлаган сўнгим – охират...

*2000*



\* \* \*

Ярақлаб очилди ёвуз туманлар,  
Мовий коинотдан келди нурли сас:  
— Сизни баҳтсиз қилди, руҳи ёмонлар!..  
Мен — ёлғиз баҳтдирман — икковга етмас,  
Маслаҳат қилмасдан айтинг шу нафас,  
Қайсингизга тегсин баҳтли давронлар?

Бебаҳтлик ичида биз бебаҳт эдик —  
Қисматнинг қўлида баробар асир  
Ва кўкка тикилиб чин дилдан дедик:  
— Бу таклиф ичида даҳшатли таҳқир —  
Магар биримизнинг бошимиз эгик,  
Баҳтли бўлолмаймиз биримиз, ахир...

Аммо эзгуликка қилган эди жаҳд,  
Фалакдан ёғилди меҳрибон хабар:  
— Гарчи севгингизга ҳижрон мангутахт,  
Сизнинг азобингиз чиндан мўтабар...  
Бироқ қийноқда ҳам йўлдошдир зафар —  
Олинг, иккингизга, мана, икки баҳт.

Калхатдай айланди бир баҳт бошингда,  
Кўксим чангллади ўзга бир баҳт — даст...  
Ялиндинг: — Шафқат қил кўзда ёшимга!  
Ёлвордим: — Бекорга айламагин қасд,  
Гуноҳкор қилсанг ҳам Оллоҳ қошида —  
Иккимизга икки баҳт керак емас...

Фалакнинг ҳолида мавжланди бир ғаш,  
Ҳатто бир муддатга тушди сукунат:

— Англадим, «оҳ»ингиз чиндані ҳам оташ,  
Шу сабаб, чексиздир бизнинг мурувват.  
Адолатли кечсин мардона яраш —  
Марҳамат олинглар... Мана, мингта баҳт!

Минг баҳт тутқазилди менинг дастимга,  
Минг бир баҳт тўкилди бошингдан — алвон,  
Қунишиб турибмиз бу юк остида,  
Ва ўтар умрнинг қисмати аён:  
Бу фалак содикдир ғаюр касбига —  
Иккимизга бир баҳт бермас ҳеч қачон.

2000





\* \* \*

Севишингни сезди ёмғир,  
Деразанг тагидан кетмади.  
Қайдадир  
оқиб кетди Тоҳир,  
Зуҳранинг қўли етмади.

Софинчингни сезди ёмғир,  
Деразангнинг тагида сайли.  
Оқиб кетолмади  
Мажнун қайгадир –  
Йиғлади Лайли.

Армонингни ёмғир сезаяпти,  
Дилёrap пардада мақоми.  
Дунёда эса...  
юрак яланг кезаяпти –  
Йўқ бўлгур севгининг  
янги бир достони.

2000





\* \* \*

Юрагимга ботди беогох,  
Қүёшнинг зар найзасин учи.  
Капалакка айландим ногоҳ,  
Гулим, сени ҳидламоқ учун.

Наволарда мавжланиб учдим,  
Қанотимдан тўкилди қутлар,  
Юксагида – йўқотиб хушни –  
Менга ҳавас қилди бургутлар.

Гулим, бунча бўйларинг яхши!  
Гулим, бунча парвозим мастдир –  
Қара, баланд осмоннинг арши  
Юрагимдан бир қават пастдир.

Пирпирайди осмон яғринда,  
Тиканингнинг учи кўздадир...  
Ҳеч оғринма, гулим, оғринма,  
Капалакнинг умри қисқадир.

2000





\* \* \*

Софинч йўли – қоронгу...  
Юрак...  
Софинди юрак.  
Вужудим – нафис чолғу.  
Азоб куйи – муборак...

Кел, қўшиққа айландим –  
Бир узлуксиз нидога.  
Сени сўраб ўртандим  
Бандасидан,  
Худодан.

Ҳеч ким қўёлмас девор  
Сўнг қадам ташлашимга...  
Сен ва  
Парвардигор бор  
Софинчда яшашимда.

Куйлайман – жигарим хун –  
Узилар ҳамма торим.  
Мен торларсиз ясад ун,  
Мунграяпман,  
Баҳорим.

Қисматимиз яралган  
Одил, бешафқат, ҳадсиз...  
Сенинг исминг таралган  
Руҳим подшоҳдир – тахтсиз.

2001



\* \* \*

Сен келмадинг. Қор ёғди. Узун.  
Қор оралаб ўтди кун... Кеча...  
Юрагимда титроқ бир тузум.  
Сен келмадинг. Совуқ. Жон – кўча.

Сен келмадинг. Шамоллар учди,  
Қор умримда изғиди маҳсус.  
Бор изғирин дунёга тушди,  
Сен келмадинг. Совуқ. Кўнглим – муз.

Сен келмадинг. Увлади олам.  
Бўғзимга тиш ботирди қайфу.  
Бир томчи ёш дунё. Музлаган.  
Сен келмадинг. Эримайди у.

2001





\* \* \*

Айрилиқнинг фуссаси  
ҳаддан зиёда, ёлғизим.  
Бул азобнинг даштида  
қолдик пиёда, ёлғизим.

Юрдим-у етолмагаймен –  
бу ҳажр сўнгсиз эрур,  
Воҳ, сабр боргай қуриб,  
етмас ирода, ёлғизим.

Танҳоликнинг даштида  
жимлик илиа хуш дўст ўл,  
Шару ғавғо этмагай  
ишқни ифода, ёлғизим.

Қўй, фалакнинг чархини  
ҳар дам маломат айлама,  
Англагин – ул гоҳ зиёда,  
гоҳ риёда, ёлғизим.

Менглайимга бул кеча  
«ёлғиз» сўзин бот-бот ўяр,  
Қисмат эрса тўлфонур, оҳ,  
зим-зиёда, ёлғизим.

Ишқпаратсан – не керак  
оламга бу тийрак назар,  
Кўзни юмгин, тушда кезким –  
vasl риёда, ёлғизим.

Чархи дуннинг кўксига,  
кўзёш каби оқдик мудом,  
Не фарид бўлдик безак –  
афтода шода, ёлғизим?

2000



\* \* \*

Товуш ҳам, юрак ҳам сенга етмагай,  
Магарким, ҳар оним соғинчда — чорлов.  
Ўзимга ошкора ўт бердим,

токай

Пинҳон ёнғинларда қийнайди олов?  
Яширин гулханда тўлғонмоқ нечун —  
Гўзал ёнишларни елга совуриш?  
Сен учун ёнмоқлик умримнинг бурчи —  
Қара, насиб этди севги — оғир иш.  
Алангам ўртади олти тарафни —  
Ўзга тараф йўқдир оташдан тонсам.  
Жоним, менинг умрим Қақнусталабли,  
Қайта тирилади сен учун ёнсам.  
Ажиб шовуллайсан ўйимда... Майин  
Ёмғирим, ўрин йўқ, ахир, кўрқувга.  
Тасалли бир гапни охир айтайин —  
Кўришмоқ йўқ эмиш ўт билан сувга.

2001





\* \* \*

Унсиз фарёдимда – о, фақат сен бор...  
Юрак – тарс ёрилган... Умр – сўнгсиз ғам –  
Баёни йўқ эрур – бешарҳ, сўзсиз ғам –  
Яшаши тарзида – оғриқда – бедор  
Йўлсиз ғам... Юракни босган кўзсиз ғам.

Бу ғамни асрайман даҳшатлар аро,  
Дўзахларим аро – бўларкан ҳалок,  
Жаннатимдан жоним кетса-да йироқ,  
Тунлардан кечса-да кундузим қаро –  
Бу ғамда сен борсан – ғамли ҳолим пок.

Мен сени қалбимда ҳар кун қураман –  
Энг юксак ҳолимда этаман бунёд.  
Сенинг ҳар бир зарранг юрагимга ёд.  
Ўзимни бир ҷоҳда – сенда кўраман,  
Ва сени кўраман ҳаммадан озод.

Бу қишки оқшомда танҳо кезаман.  
Аёз. Чирсиллайди юлдузлар кўкда.  
Менинг юрагимга чексизлик чўккан...  
Сенинг нафасингни ногоҳ сезаман...  
Сен – борсан. Сен – борсан. Сен борсан –  
Йўқда...

1997



\* \* \*

Қизғин ҳаётимда  
Холим маълудир,  
Нечун маълудирман –  
Сенга маълумдир.

Оҳ, бу маълулликда  
Ошкорлик малол.  
Сени севдим пинҳон,  
Бенажот, ҳалол.

Дилимда бетўхтов  
Ёниш бўлдинг сен,  
Олис юлдузлардан  
Олис бўлдинг сен.

“Оҳ” урсам, “оҳ”имнинг  
Товуши ўчди.  
Товушдан дард ўтди,  
Жимликка кўчди.

Мени сезмоқ эрсанг,  
Бир зум тингла жим:  
Умрингда сукунат  
Борми, азизим?

Ҳа, ўша – чексиз-у  
Бешафқат хилват –  
Фарёддан фожели  
Танҳо сукунат.

Ўша – томуғазоб –  
Азроил рўё –  
Тиллари кесилган  
Қўшиқчи дунё.

2001





\* \* \*

Албатта. Албатта, унутмоқ лозим.  
Үлгандай кетмоқ шарт. Мутлақо. Абад.  
Ёнмасин. Ёнмасин энди овозим.  
Кул бўлсин. Соврилсин. Ўчсин. Беадад.

Албатта. Албатта, керакмас гап-сўз.  
Йўқликка кетмоқ шарт. Лаҳзада. Ботиб.  
Муҳими, албатта, қуруқ турсин кўз,  
Фожеа бораркан юракни ёриб.

Бу дунё кўрмади бизни ёнма-ён,  
Дилма-дил яшадик аммо. Соғиниб.  
Фақат менга бергин, менга, ёрижон,  
Тақиқ муҳаббатнинг сўнгсиз доғини.

Албатта. Албатта, ғамда сўласан,  
Қўшиқлар битасан – юракдай нафис.  
Йифлама. Албатта, унут бўласан –  
Хотирда неки бор – баридан азиз.

Албатта. Бу машъум қарорда ҳақсан.  
Үлгандай кетмоқ шарт. Беаёв. Ҳалол.  
Йифлама, сен шундай ғам бўлажаксан –  
Исмин ҳадя этар Лайли. Бемалол.

Албатта. Шу ҳол ҳам эртақдагидай.  
Осмоннинг нечаси қулади бошга?  
Азизим, ортимга нечун қарамай,  
Азизим, не учун айланмай тошга?

2001

\* \* \*

1

Тун-у кунни тўзғиб қучди –  
Кўзғалди шамол.  
Мен эски бир баргдай учдим,  
Яна сен томон.

Бу шамолда жанда жисмим  
Пора-порадир –  
Фақат руҳим қолар, исминг –  
Софинг қоладир...

2

Нима бўлди? Куз саросар,  
Боғда тўзғин ҳол?  
Қоронғуни йиртмоқ қадар  
Келди бир шамол.

Деразадан қарадинг-у,  
Сескандинг ногоҳ,  
Нималарни сездинг, ёху,  
Недан сен огоҳ?

Ташқарига чиқдинг, “оҳ”ни  
Ичингта ютиб.  
Ва йифладинг – юзларингни  
Шамолга тутиб.

2001



\* \* \*

Атрофимда дунё ваҳшат солар,  
Юрагимда эса аждарҳо – оҳанг...  
Азизим,

энди фақат фожеа қолар –  
Сен ҳам кетсанг.

Дунёни ”ёлғончи“ де –  
тонмайди,  
Унда қалбим топган ёруғ чин – ўзинг.  
Сен ҳам кетсанг,  
ҳеч нарса қолмайди –  
Фақат сўзим!.. Беомон сўзим.

Жонимдан айирган ҳақиқатсан айни,  
Сенсан – Момо Ҳаводан қолган гуноҳ.  
Сен ҳам кетсанг,  
ҳеч нарса қолмайди –  
Фақат арзимас бир дунё.

2002





\* \* \*

Сенсиз

маст-алааст айландим дунёни,  
Сенсиз тонг каби хушёр кездим  
ўша маст-алаастликнинг ичинда.

Сенсиз яшадим –

бировнинг дунёсида кун кўраётгандай,  
Сенсиз ёлғиз кечдим  
одамларнинг орасида,  
Сенсиз ҳақиқат қидирдим юрагимни йиртиб.  
Сенсиз фарзандли бўлдим,  
(оҳ, уларни жон дилдан суйдим сенсиз!)

Сенсиз тўйлар қилдим

(фақат шўх қўшиқлар айтилди.  
Мақомдан кўрқади булар. Иккаламиз  
учрашмоғимиз мумкин-да бирор  
нолада!..).

Сенсиз кулдим

(ўзинг кечир, жондан севганим!),  
Сенсиз соchlаримга оқ тушди,  
сенсиз йигладим,  
ва шеърлар ёздим сенсизликдай даҳшатли –  
англадим: умримнинг қолгани ҳам сенсизлик...

энди сенсиз  
яшагим келмаяпти,  
азизим.

2002

\* \* \*

Фамингда юрагим шомдай қорайди,  
Фира-ширалиқдир борлиқда ҳолим,  
Барча ёғдузорим – ғарип торайди,  
Қандай улкан эдим – қандай камайдим! –  
Эслагин, айтгандим: сенсан – заволим.

Оҳ, оғир!.. Умрнинг қолгани – ҳижрон!  
Софиндим! Умрни вайрон этсамми?  
Сенсан – ваъдасидан адашган даврон,  
Сенсан – ёлғон дундан кўкарған армон –  
Кетсамми? Дунёнгни ташлаб кетсамми?

Қара, бу баҳорнинг рўйига қара,  
Сен каби гуллаган, сен каби тоза.  
Шамоллар бўлсамми, нурларни тараб...  
Азизим, ўлганим бўлса овоза –  
Ҳеч ким ”оҳ” урмасин бастингга қараб.

2002





\* \* \*

Дардларингнинг тошқинлари  
Дунёнинг қўпигида...  
Бу дунёнинг тўлқинлари  
Чиқмади тўпигимга.

Севасанми, севмайсанми,  
Бир асрорни ечиб кўр:  
Бу дунё – бир кўлмак дунё,  
Денгиз кўнглим кечиб кўр...

2002

\* \* \*

Булутлар қоп-қора.  
Кўринмас осмон.

Қуёш қачон ботди?  
Фира-шира. Шом.

Шам ёқдим. Хонамни  
Тутди ёлқини.

Сирли шуълазорда  
Юзинг балқиди.

Ўлтиридим бу ғаюоб  
Холни бузмасдан –

Юзингдан тонггача  
Кўзим узмасдан.

2002

\* \* \*

Узоқ яшаяпти бу баҳор. Бу иш  
тангрининг ўзидан — ҳомийлик.  
Булутлар тўзғиди. Турфа кўриниш  
йиртиғида — эски мовийлик.  
Гулларга айқашди мастон кўкатлар,  
шамол бағрига ҳам сифмади кўклам;  
ўлимдан қўрқмайди энди қўчатлар...  
Аммо сен баҳордан ҳам қўркам.  
Чорбоққа таралди  
атиргулнинг бўйи,  
капалаклар нотекис учди.  
Мен кўнглимни эркин юбордим қўйиб,  
у бориб сенга асир тушди.  
Қандай яхши маҳбуслик фасли!  
Айниқса, бу нохос бўсадан сўнг.  
Кетасанми?  
Қолсанг бўларди. Асли  
озодлик ҳам бундан кейин жўн.

2002

\* \* \*

На нозик кашфиёт билан яралмиш  
Кулгуга чайилган оппоқ юзларинг.  
Ва яна кўзингдан ёғду таралмиш,  
Ва яна лабингда сирли сўзларинг.  
Оқшом кўлкаси-ю чироқнинг нури  
Тушган қиёфангда липиллар қисмат –  
Уни ерга йиқит – кўл билан суриб,  
Гўё соchlарингни тузатган сифат.  
Бегона кунларнинг исканжасида  
Юракни яшириб яшамоқ надир? –  
Гарчи дил ҳижроннинг тош панжасида  
Жонберар сатрлар тузмоқча қодир.  
Руҳимда севгининг пинҳон сурури –  
Бебахтлик – ойдиндир, саодат – қаро.  
Ўлиб кетиш мумкин ёнингда туриб,  
Қаршимда борлигинг тилсими аро.  
... Бу дамни чулғатиб юракка судрар –  
Ариқдан сарир-у, олисдан сафир.  
Боғнинг бир четида мушукдай мудрар  
Сенинг борлигингдан кўнгли тўқ тақдир.

2002





\* \* \*

Яна бир умрни яшадим. Яна  
бу севги яратиб мени қайтадан,  
қайтадан ўлдирди. Пинҳон рисола –  
ғуссамни шамолга энди айтаман.

Кушларга қўшилиб сайрамас лабим,  
саратон тафтингиз қўлларим муздир –  
чўзсам, очилмайди ғуллар чамани –  
наздимда, жон гулин тийрамоҳ узди.

Аста бораяпман тупроққа сингиб –  
бошқа бир ҳаётга жисмим қоришиди.  
Ғуссада юрагим бораркан тиниб,  
тунингдан оғир нур ичра ёришдим.

Аммо мангуликда юракнинг додги,  
сигмайди ҳасратинг ўткинчи додга.  
Севгининг ўлимни – ўлимдан оғир:  
ҳаётга ўхшар у, айни ҳаётга.

2004





\* \* \*

Қўлимга қўлинг тегди –  
Танга таралди беҳишт.

Тушди кўзингга кўзим:  
Жон – титроқ ва энтикиш.

Лаб-у нафас айқашди –  
Бизга жам бўлди дунё.

Барча қўлка йўқолди –  
Тўлғонди икки зиё.

Қайдан бу ёвуқ ҳаво –  
О, шартми мувозанат? –

Толега соя излаб,  
Тунни чорлади қисмат.

2002

\* \* \*

Ярақлади бу дунё,  
Қуёш чиқди – бесаноқ.

Мазмуннинг бори – зиё,  
Кўлканинг бори – йироқ.

Яшасам бўлар эди  
Бу қувончнинг комида...

Тақдир келди, азизим,  
Умр тугар онида.

2002



\* \* \*

Ойдан омон қолган  
қайиқ сузаб чиқди  
урилди булутлар соҳилларига.  
Гоҳ чўқди, гоҳида қамални бузаб чиқди  
ўралиб ёғдунинг кокилларига.  
Кеча эса юмшоқ саратондан кейин,  
Жонга ором кирар  
шамолни қучсанг...  
Биламан, бу ҳолат жуда ҳам қийин –  
не дайсан,  
барибир ёнингга учсам?  
Туннинг бор ёғдуси томирига жам,  
Қанот чиқармоқда юрак – энтикиб.  
Сен эса  
хўрсиниб ухляяпсан,  
кечанинг эшигин бекитиб.

2004





\* \* \*

Жиҳозлар қалашган  
икки хона – уй  
ва жонни талашган  
ҳаёт-мамот куй,

(қофозга ҳеч тушмас,  
кўчмайди сўзга) –  
ҳеч ким қалбга кирмас –  
Худодан ўзга.

Плитада олов –  
митти гулхангул.  
Юрагингда бирор –  
эри бор-у тул.

Уни чоҳга отиб,  
қулфлаб – тинмайсан...  
Калитни йўқотиб,  
ҳар кун йиглайсан.

2004





\* \* \*

Оёғи узилган ердан уйингнинг,  
Жон сақлар тош-бетон қаватлар аро.  
Баландга осилган кирлар — қуйининг  
Ваҳмидан — хатарли чайқалар, эвоҳ.  
Рўзфоринг ичидаги даврон сурар  
Ҳеч қачон тугамас бекалик бурчи?..  
"Хайр" деган қўлимдай силкиниб турар,  
Очиқ деразангда чинорнинг учи.  
Бу фалат ҳолатдан фусса топмайсан,  
Тушмайсан ўртаниб қалб билан баҳсга:  
Деразадан ўзни зинҳор отмайсан,  
Зинадан bemalol тушасан пастга.  
Қалбни бу қилмишлар этмагай таҳқир,  
Аммо яшамоққа етмайди кучи —  
Шошиб келаркансан мудом қайдандир,  
Сен тепа қаватга чиқасан учиб...

2004





\* \* \*

Сочилди оппоқ қор устига барглар.  
Бир дам сұхбат қурди дараҳт тагида  
Куз-у қиши. Фасллар учрашган вақтлар  
Неларни сўзлашар? Нима ҳақида?  
Сўнг бор ҳам фожени, қара, йўқладим:  
Боғда – дараҳтларнинг жам ўлкасида  
Айланиб юраркан, келиб тўхтадим  
Куз-у қиши видосин нақ ўртасига.  
Арз этмоқ шартмикан аммо доғлардан,  
Зотан қисматларни дунё ечганди:  
Қувғинди бўлганди кузак боғлардан,  
Қишининг барча они мендан кечганди.  
Сен – ёшсан: ўйлайсан – юз йилдир аср;  
Фасл – тўрт; ҳафтада кунлар – еттита...  
Сени мангаликдай соғиндим ҳозир –  
Бир они қолмаган умрим четида.

2004





\* \* \*

Қаерларда эдингиз  
Шамол увлаган кеча?  
Бўри булутлар кўқда  
Ойни қувлаган кеча?

Қаерларда эдингиз –  
Йўқолганда юлдузлар,  
Ёппа қароқчи булат  
Кўкни тунаган кеча?

Қаерларда эдингиз –  
Дунёнинг бозорида,  
Севги – бир умид учун –  
Жонни тўлаган кеча?

Қаерларда эдингиз  
Юрак кўксимдан чиқиб,  
Тўғри тангри олдига  
Йифлаб жўнаган кеча?..

2004





\* \* \*

Дунёнгда боряпман соғинчга тўлиб,  
Сенсизликка кўниб, бенажот кўниб.

Сенсиз бу дунёмда сен мўлсан бироқ  
(Масалан, кечасан; масалан, чироқ;

Масалан, юракни йиртгувчи оғриқ –  
Ёлғон кундузлардан қолган чин ёруғ;

Масалан, бошимда гир айланган чарх,  
Узун куз қалбимдан учган хазон барг;

Қарасам – тупроқсан, қарасам – осмон,  
Ҳамиша – йироқсан, ҳамиша – армон;

Қарасам – оламсан, қарасам – бир гард,  
Аммо мудом дардсан, мудом дардсан, дард...).

Дунёнгда боряпман соғинчга тўлиб,  
Масалан, тирилиб, масалан, сўниб –

Соғинч таслим этган, соғинч забт этган.  
Умр “борса қайтмас” йўлларга кетган...

2004

\* \* \*

Жонни қайга кўяй – куз етган маҳал,  
Абад айрилиққа ё етди навбат?  
...Мен барча сўзларни унутдим аввал,  
Сўнг қайта кашф этдим – сенга ёздим хат.

Қалбнинг тун боғида қушлар уйғонди,  
Руҳга аралашди соңсиз мусиқа.  
Софинч сўзларимга сархуш чўлғондим –  
Учдим ҳижронларнинг қаро устида.

Нимани дунёга этгандим исбот? –  
Бунёдлик, барбодлик – бори йўқолди.  
Бори – ўткинчиидир – шунчаки исқот...  
Фақат сенга ёзган хатларим қолди.

2004





\* \* \*

Севги тўфонида,  
Ерсиз осмонида —  
Тақдирлар чалкашди.

Нажотлар узилди,  
Фожелар тузилди —  
Толелар тарқашди.

Биз — сомон сариқлари  
Шамол қаҳрида учдик,  
Армон қаърига тушдик —  
Тушларга кирди фақат,  
(Фақат тушда!) муваққат —  
Дунёнинг ёруғлари.

Умрни талаб борар,  
Қонини ялаб боқар —  
Ит қисматнинг олғири.  
Боғ ҳасратта чўмилган,  
Бахт хазонга кўмилган...

Ташқарида жим ёғарп  
Кузнинг қирмиз ёмғири.

2004



\* \* \*

Нақд – пулдорники,  
Шаҳд – шунқорники,  
Ошиқ умри – дард.

Ҳажр – хатоники,  
Тақдир – худоники...  
Нима қилай, айт?

Исминг –  
Куй авжида –  
Сатодаги тор.  
Жисминг –  
Туш мавжида –  
Ёзда ёққан қор.

Сўзинг –  
Боғлардан сўнг –  
Қовжираган чўл.  
Кўзинг –  
Доғлардан сўнг –  
Дунё чўккан кўл.  
Рўзинг –  
Фамнинг жами –  
Кўз ёшлари мўл...

Ўзинг –  
Ўлим каби –  
Борса келмас йўл.

Бизлар – икки мисра –  
Тақдир кесган байт –  
Илҳомсиз дун ичра ...

Нима қилай, айт?

2004





\* \* \*

Ваъда бер! Ваъда бер,  
Дунёга қарашга –  
Ҳатто ўлмасам ҳам,  
Бемалол яшашга.

Ваъда бер! Ваъда бер,  
Ёнишга, ёнишга!..  
Мабода ўлсам ҳам,  
Яшашда қолишга.

Ваъда бер! Ваъда бер,  
Армонни қўмишга –  
Менсиз ҳам, менсиз ҳам  
Ҳаётга кўнишга.

Кетишининг қайтиши  
Борми, билмадим...  
Йифла! - Қайтмаслигим  
Тилаб йифлагин.

2004





Дўстлар даврасини қиздирди шароб,  
 Баҳс қизғин куй чалди, диллар рақс тушди...  
 Бу эрка тошқинлар қўзимга сароб –  
 Юрагим бетўхтов сен тараф учди.

Азизим!.. Азизим, деразага боқ,  
 Токчага күш кўнди – бир ҳовуч ҳадик.  
 Иккита кўзида – иккита чироқ –  
 Сенинг ним қоронгу умрингга таҳдид.

Дундан юз бурмоқнинг олди ҳаддини:  
 Маст кузак юзтубан қотди боғчада.  
 ...Юрагинг қушликка ўрганмадими –  
 Бир парвоз – эгасиз – чиқди токчага?

Юрагим бесабр ёяр қанотин –  
 Жуфт парвоз этмоқни истовди бир бор:  
 Не кечди соғинчда сенинг ҳаётинг –  
 Юракка учмоқни этдингми бекор?

Борса келмасингдан боқасан илкис –  
 Сенинг чин сўзларинг дўзахдир беҳад:  
 – Баҳорларим ўтиб, етиб келди куз,  
 Юрак адо бўлди соғиниб, афсус,  
 Парвозини сенга қолдирдим фақат...

2004



\* \* \*

Түн илиқ,

Томлардан эриб оқди қор.  
Үйимни теграсин томчилар чертди.  
Азизим,  
биз яна кўришдик дийдор –  
Сен ёзмоқ бўлган сўз олисдан етди.

Миямни куйдириб, томирга тушди,  
Қонимни қайнатди –  
қаро бўлди рўз.  
Юракни йифлатиб, ёнурга тушди –  
Сен ёзмоқ бўлган сўз.

Менга онлар – чолғу.  
Лаҳзалар чалди  
Пинҳон юксакликни титроқ мақомда.  
Сен ёзмоқ бўлган сўз  
ушлади жонни –  
Илоҳ бошлаб борган азоб маконда.

Бу азоб ичида –  
ақлдан оздим,  
Мени ҳақ йўлига ҳар дам бурдинг сен...  
Мана, ”севаман” деб охири ёздим –  
Пичирлаб олисдан айтиб турдинг сен.

2004

---



## СЕВГИ. ИНТИҲО

Мен сезиб турибман – бу жимлик аро,  
Қоронгулик аро туғилар шамол:  
Жаранглаб турибди беовоз садо  
(Тобора – бесабр, тобора – нидо...) –  
Ва аксул ҳаракат топмоқда камол.

Жонини ҳовучлаб тушлар кезмоқда –  
Бизнинг бедорликнинг ваҳмидан қочиб;  
Рёё яралмоқда – хатар измоқда –  
Бу жимжит хавотир жоним эзмоқда –  
Мавхум зулумотнинг сирини сочиб.

Ҳа, етди мукаммал фоженинг бўйи –  
Қисмат ўз исёенин этмоқчими фош?  
Кўнглим кўзгусида Азроил рўйи...  
...Қоронгуда – ўзин жонидан тўйиб –  
Беовоз йигингдан оқаяпти ёш.

2003



---



## МУҲАББАТ ИНТИҲОСИДАН СЎНГ. ҚИСМАТ

Отилишга ҳукм қилинган одамдай –  
бош эгиб турди;

ҳалокатга учраётгандай  
ваҳимада  
тушунмади сўзингни.

Энди  
кузак кечалари  
боғингда кезиб юрар,  
деразангдан термулар кўзингга,  
юрагингта хазон баргидай қўнар,  
бошинг узра айланар лаънати қузфундай.

У  
энди  
ҳеч қачон  
кетмайди.

Сен йифлайсан:  
– Қаёқقا борсин?  
Кетишга ҳам йўли йўқ  
бу шўрликнинг...

Қисмат эса  
изиллар ташқарида:  
– Қолишга ҳам  
йўл йўқдир!..  
Йў-ў-ўл йў-ў-ўқди-ир!..

Ҳар лаҳза  
отиладиган  
одамнинг  
хиритлашига ўхшайди –  
қисматнинг овози.

2007





\* \* \*

Бахтинг – тушга югурди,  
(Худди сериалнамо! –  
Сўнгида толе – барпо...)  
Вақтинг – ишга югурди,  
Ёзинг – қишига югурди...  
Мени унутдинг, ёр-о!

Дунё – юмуш – жонсарак,  
Кўзни очирмас ташвиш:  
У – кераг-у, бу – керак...  
Умр ўтар – бетафтиш,  
Рўзгор топар парвариш –  
Азизим, қайда юрак?

Кўмилди не фоже “оҳ”  
Рўзгорнинг лаҳадига,  
Бу қабиҳ ҳолатида  
Умр чоҳдир! Узун чоҳ!  
Турмушинг санъатида –  
Армон – умрга подшоҳ.

Тишга тишлар қўйилган –  
Тошдай ғажирлар тоқат.  
Сабр мудом бешафқат –  
Ишқнинг кўзи ўйилган;  
Сенга борар йўл форат –  
Бор бўйича сўйилган.

Ваҳ!.. Алвидо! Алвидо!..  
Юракни йиртар – ёвуқ  
Айрилиқнинг пичоги...  
Сени қўлласин худо!  
Сени қўлласин худо!  
Нечун ўлимдан совуқ  
Сенсиз дунё қучоги?

2003





\* \* \*

Дилни ойдай айландинг,  
Кўмилдим ойдинликка,  
Кунларим – ёрқинликда;  
Ишқинг шундай байрамким –  
Арзийман ёлқинликка!

Ёруғман. Миямдан то  
Руҳга қадар равшанлик.  
Умримга тўқис шанлик  
Қисмат айлади иншо:  
Юрагим толе янглиғ –  
Бахтга етдимми, ёр-о?

Ўралади бўйнимга  
Ойнинг оппоқ билаги.  
Ушалди бор тилагим...  
Бахтнинг қўлидан ўпиб,  
Келаяпти йифлагим.

2003



---

\* \* \*

Ер-у осмон кўл бўлди-ё,  
Ёмғир мунча мўл бўлди.  
Лойли селлар йўл бўлди-ё,  
Оқиб ўлмоқ ўнг бўлди-ё,  
Дока рўмол ҳўл бўлди.

Дока рўмол ҳўл бўлди-ё,  
Куритмоққа қуёш йўқ.  
Жала бўлди, дўл бўлди-ё,  
“Ишқдан кечсанг – ўл” бўлди-ё,  
Чидамоққа бардош йўқ.

Кўнгли нотинч, кўнгли нотинч –  
Тақдир ҳолланиб турар.  
Ташқарига боқмоқ – қўрқинч:  
Дока рўмол, дока рўмол  
Дорда солланиб турар.

2007



\* \* \*

Кўксимдан босди – бедод  
Дунёдан кенг соғинчинг,  
На нажот бор, на ҳаёт,  
Жон – тошсукут бир фарёд...  
Магар дардим овунчинг –  
“Сайдинг қўябер, сайёд!”\*

Кун барбодdir, тун – барбод,  
Вакт – “оҳ”имда чилпарчин –  
Дунё кезар bemурod.  
Руҳ – вулқонли мукофot!..  
Воҳ! Қасдинг бор магарчи,  
“Сайдинг қўябер, сайёд!”

Ишқда не ҳожат исбот?  
Чекинар барча далил.  
Юракдаги бор бисот –  
У сени севди озод...  
Умрми? Қолди сабил –  
“Сайдинг қўябер, сайёд!”

Қафасингда беканот  
Ситамгарлик ўкинчи.  
Куним – йўлсиз бир работ.  
Яшамоқ – сабот, сабот!..  
Ёлғизгина ўтинчим –  
“Сайдинг қўябер, сайёд!”.

2003

\* Бу сатр Фурқатдан.



\* \* \*

Ниманинг бўйи бу? Қай баҳт шарпаси?  
Ҳаётбаҳш қай нафас лабингга тегди?  
Уйғондинг. Қаерда сабр қафаси?  
Озодликка навбат етдими энди?

Нени шивирладинг кўзинг очмасдан –  
“Осмон”ми, “Усмон”ми ва ёхуд “Кетма!..”?  
Кимга пешвоз чиқдинг (баҳтдан қочмасдан),  
Не ором оғудай таралди этда?

Ухлагин. Бу туғён – тушнинг исёни.  
Ёстиқ ҳўл бўлади – кўз ёшингни арт.  
Ухлагин. Кўзғатма тошдил дунёни.  
Ухлагин. Бошингда узоқ турсин баҳт.

2003



---



## СЕНИ ТАНИМОҚ ДАРДИ

\* \* \*

Шеърданми? Ҳеч нарса  
Қолмагани рост –  
Қолгани – ҳар лаҳза  
Юракка ихлос;

Зар-у зўр давр ила  
Имкон-беймкон –  
Талошда талониб  
Қолган фақир жон;

Тошдан ҳам бор-йўғи  
Сўралгандай сув –  
Фирром тақдир билан  
Ҳалол олишув;

Ҳа, шеърдан қолгани  
Ҳеч нарса эмас,  
Шунчаки... Шунчаки  
Шайтон билан баҳс.

– Сен кимсан? – сўроққа  
Тутади дунё.  
– Тангрига бандаман,  
Алҳамдуиллоҳ!..

Инсоннинг, воҳ, қандай  
Унвонлари бор...  
Шеърдан қолгани шу –  
Шу сокин иқрор.

2000

154



\* \* \*

Баҳор етди ҳар бир гиёҳга,  
Дил дунёга боқди уйғониб –  
Қуёш қулган яшил дунёда  
Бораяпман мастдай түлғониб.

Бораяпман соғиниб сени,  
Сени сезиб борлиғим билан.  
Кўкаришнинг зумрад ёлқини  
Ёмғир ювган руҳимга түлган.

Қушчаларнинг вижир-вижирі –  
Ўқилмоқда қай сирли китоб!..  
Парвардигор, келар фужурим,  
Сенга етгим келади шу тоб!

Бахт борлиги ростдир дунёда,  
Дил унутди ҳамма доғини.  
Баҳор етди ҳамма гиёҳга,  
Бораяпман сени соғиниб.

1995





\* \* \*

Кўнглимга оромли бир салқин тушди –  
Ҳоврини босгайми ҳаприққан дилим?  
Руҳимнинг иплари чин салқи тушди,  
Босди вужудимни номаълум билим –  
Ҳар битта ипига минг талқин тушди.

Кўнглим салқинида ёмғирлар ёғди,  
Товланди кўкида ҳасан-хусанлар;  
Етти ранг – қўшиқдай – бошимдан оқди,  
Кўксини жим очди файри туманлар –  
Номаълум чорбоқقا юрагим оғди.

Қанча йил оловда яшадим? Умрим  
Жизғанак саҳронинг куйган алафи...  
Салқинда бирам хуш сайрадинг, кумрим –  
Бу сайраш – куйлашнинг қайси тарафи?

О!.. Қандай безадинг, тангirim, сўнгимни!  
Бу ёлгон дунёга этмасдан парво,  
Ёлғондан ажратиб ўнг-у сўлимни,  
Бир чорбоғ ичида ётибман танҳо –  
Худди китоб янглиғ ўқиб кўнглимни.

Жонимда гувлайди довуллар – майин,  
Кўзимни чақнатар ботин чақмоқлар.  
Кўнглимни тушуниб, уққаним сайин  
Руҳимдан чекиниб борар қирғоқлар.

Номаълум бир билим нурдай қуилар  
Жунуним, тошқиним, ярагимга...

Нурдан ўзга нарса йўқдай туйилар  
Оллоҳ билан менинг оралиғимда.

*2000*





\* \* \*

Томчида дунёдан улкан кўл кўрдим,  
Заррада хаёлдан узун йўл кўрдим.  
Қалбдан йўлга тушдим пою пиёда,  
Оллоҳни – ягона, йўлни мўл кўрдим.  
Ўзим ҳам йўл каби турдим дунёда.

Оғир дардлар ўтди юракни тешиб!  
Йўл қурдим юракка – руҳимни эшиб,  
Қандай асир эдим ўзлик ҷоҳида –  
Охир бу зиндандан топдим бир эшик,  
Чиққани кўнгилнинг чексиз роҳига.

Тепамда дунёлар шовуллаб оқди,  
Мени ва ўзини юлдузлар ёқди.  
Чарх урди кўзимда минг-минг қуёшлар,  
Минг асрор кўксимни баробар қоқди,  
Минг тошлар дардимнинг мағзини чақди,  
Кўзимдан тизилди минг турфа ёшлар.

Ютди юрагимни тубсиз ўпқонлар,  
Оловли чанг каби сочди вулқонлар –  
Беҳудуд тонгларда қайта яралдим  
Худди шабнам каби. Миямда онглар  
Чексиз вужудимда нурдай таралди.

Нурли бир оғриқни сездим тўшимда,  
Наҳотки, юрагим йўлга қўшилган –  
Қанча йўл бўлишга ўзи ярадим?  
Бир қарич?.. Бир қадам?..  
Аммо тушимда  
Расулиллоҳ менга кулиб қаради.

2000



\* \* \*

Фалак, сенинг қўлингда қумман!  
Руҳ муштингдан барибир оқди.  
Ҳар заррамни беадад тунга,  
Шамолларинг бекадр сочди.

Мени йифиб олмофинг мушкул  
Изламагин – ҳийланг бесамар...  
О, сочилиди девона кўнгил,  
Ўзимдан то тангрига қадар...

1997

\* \* \*

Йиқилди дунёning суюнчиқлари,  
Тошга суюнсам ҳам ботаман фамга.  
Дунё соатлари – «Уйғон! Чиқ!..»лари  
Ҳамма оғриқларни қуиди баданга.

Сенинг сўзларингни эшитмайман мен,  
Аммо барча дардинг юрагимга жо.  
Дунёни тарқ этдим. Эшиқдаман мен,  
Шу онда қайтадан бўляпман барпо.

Юлдузлар боқади қўқдан – анграйиб,  
Исмингни, исмингни фақат айтаман.  
Мана, тоза бўлди бирдан манглайим...  
Худо қисматимни ёзар қайтадан.

1997



\* \* \*

Ой чиқди. Юксалди юракнинг сатҳи –  
Юракка кўмилдим, тамом кўмилдим.  
Фақат худованднинг муқаддас мадҳи  
Фалакдан дилимга ойдай тўкилди.  
Бу куз тунларининг йўқдир шафқати,  
Мумкинми бир жонни шунча яралаш?  
Сенга интилмоғим – танҳо шавкатим  
Дунёни тўлдирди соғинч аралаш.  
Танимнинг қолмади заррача вазни –  
Юрак, кўтаравер, толмоғинг душвор!  
Руҳнинг ғолиблиги рост экан асли,  
Тупроқ қисмимни ҳам айлади бекор.  
Яратган! - Қудратинг менда ҳам ботин,  
Мени қайта-қайта яратасан сен.  
Дилимни соғинчинг ичига отиб,  
Минг янги дардларда сайратасан сен.  
Юракни тўкмоқлик – банданинг баҳти,  
Рухсат бер, бу ҳолда мангу турмакка!  
Ой чиқди... Юксалди соғинчнинг сатҳи –  
Кўмилиб турибман нур ва юракка...

1998





\* \* \*

Худойим, қоврилдим... Тугайди қачон  
Бу гулхан юракнинг ловуллашлари.  
Бу тун яна менга бермади ором  
Қонимнинг оловли шовуллашлари.

Менчалик ёнмаган ҳеч ким... Менчалик  
Ҳеч ким ўчмоқликни этмаган орзу.  
Боряпман чақмоқнинг бўлаги янглиф  
Лаҳзалик умримни фалакка осиб.

Ҳатто вулқонларда оловлик бекор –  
Менинг ёнфинимнинг йўқдир адоги.  
Ичимда майсанинг армонлари бор –  
Ёмғирда ўсишнинг ҳасрати, доги.

О, сасинг етишди руҳ ила танга,  
Раҳмат каломларинг бунча мулойим!..  
Мени ўчирирма бирор бандангга,  
Ўзинг ў chir мени... Ўзинг... Худойим!..

1999





\* \* \*

Учдим парвардигор этганда карам,  
Синовга ташласа, сабрда юрдим.  
Қўшиқлар яратдим бир нафас билан,  
Кушлар ин қургандай қўшиқ ҳам қурдим.

Курдим азобим-у дардим омихта,  
Шеърга эриб оқди юрак – улкан муз.  
Аммо бир сир тутса, Оллоҳ ҳам пухта –  
Шеъримни ким ёзди – билмайман ҳануз.

Йиллар маромида кўнглим мавжланди,  
Мавжланди лаҳзалар шошқинлигида,  
Асрлар маъноси дамда ганжланди,  
Урилиб чексизлик тошқинлигига.

Эй, дунё! Майхона! Дайрнинг танги!  
Эски майларингдан айланди бошим!  
Телба тарозингта бўлди посанги  
Руҳу жон жамланган кўзимнинг ёши.

О, яна шеър келди! Кутиб олмоқ фарз –  
Ана, кўринмоқда оғриқда тарзи...  
Шеър нима? Кўқданми келган пинҳон сас –  
Кимнинг – Оллоҳнингми, ё маним қарзим?

1999



\* \* \*

Дил уйғонар. Бу оқшом  
Зирқираб очади күз.  
Умрим түхтайди ҳайрон –  
Дилга қарайди бесүз.

Қарар: фалак қат-қатдир,  
Ранглар сонсиз – мукаррам.  
Бу – дўзах, бу жаннатдир,  
Бу – ўн саккиз минг олам.

Ундан нари – сўнгизлик –  
Сарҳадсизлик – зим-зиё –  
Ногоҳ яна тунсизлик –  
Тундан туғилган дунё –

Бепоёнлик – аксуллик –  
Бошланди манфий олам...  
Дил уйғонди. Афсуни  
Бунча оромли, Эгам.

Тангрим, меҳрингни ҳадди –  
Шафоатинг тенгсиздир:  
Сени танимоқ дарди  
Бу дунёнгдан чексиздир.

1999



\* \* \*

Терак тинч шовуллар кечқурун,  
Уфқ жим ловуллар кечқурун –  
Кўнгиллар зирҳини хуш ечар,  
Етмоқда ажойиб бир кеча –  
Ёғмагай ёғинлар кечқурин.

Фалакка юлдузлар тўладир,  
Милтирап, жилмаяр, куладир.  
Бечора юрагим юмшаган,  
Юракни шуълалар қуршаган –  
О, яна юракми унадир?

Мулойим ўчмоқда ёлқинлар,  
Теграмда хушнафис салқинлар.  
Самоват топширап имтиҳон,  
Асрорлар лаҳзада берар жон –  
Туғилар энг тубсиз талқинлар.

Мени маст қиласи хум кеча...  
Мен каби қўзингни юм, кеча!  
Кўксимга тўлдириб зиёни,  
Кўз юмиб гар қучсам дунёни –  
Жонимни сўймагин, шум кеча?

Ниҳон бир қовжираш ўқинди –  
Бесоҳиб сомонлар тўкилди,  
Осмоннинг қоп-қора сафрига!

Бу кеча мактублар ўқилди,  
Тангрига, тангрига, тангрига.

Ким қўйди юлдузлар пойига  
Қоп-қора осмонни тўшатиб?  
Қанчалар қарамай райига,  
Жонимни бўлмади бўшатиб...

1999



---

\* \* \*

Қарадим: фалакдан  
армон тўкилди,  
Ҳар лаҳза – бетиним –  
замон тўкилди.

Гоҳ бошни бекитдим –  
тўкилди тошлар,  
гоҳ юмдим кўзимни –  
ёмон тўкилди.

Ҳар онда юлдузли  
дамларни кечдим –  
пойимга чақнаган  
осмон тўкилди.

Руҳимнинг дамидан  
синди сарҳадлар –  
ҳамма чексизликдан  
довон тўкилди.

Хазонрез оралаб  
бораман ғамгин,  
сенга – барг, ох, менга  
жаҳон тўкилди.

Кўкнинг васияти  
ҳануз ўшадир –  
Пайғамбар дилига  
Куръон тўкилди.

Кўнглингни тут бугун  
олам узраким,  
боқ, менинг қўксимга  
раҳмон тўкилди.

Қон ўлди дунёning  
ёқаси, ёраб,  
кўзидан қатра ёш –  
Усмон тўкилди.

2000





\* \* \*

Воҳ!.. Менинг юрагим төғ каби ўсди!  
Бу ёлғон дунёнинг юзини түсди.  
Бу тоғда ўлтиридим бир ўзим якка,  
Тумандай чулғаниб фақат юракка.  
Пойимда туманлар булутдай түзди,  
Чексиз адирларни тутиб этақда.

Бу тоғда – тўйгунча чексизлик ютдим,  
Қўл чўздим – Вақтни бир қуш каби тутдим –  
У қуш олиб учди мени саросар...  
Энг тиниқ шамолга қалбни тинитдим,  
Софингдан тунларни айлаб мунаввар,  
Яна бир төғ ўссин – мунгайиб кутдим.

Ўсиб-унса эди яна битта төғ!..  
Суҳбат бўлар эди у дам беадоф –  
Сукунатдан ясаб энг оғир камон,  
Юракни чалардик тинмай, беармон,  
Сўнг фалак садосин тинглашар эдик,  
Тангрини ҳис қилиб – йиглашар эдик –  
Битта ҳам тошимиз қолмас эди соғ,  
Сирқираб – сойларга тўкилиб у чоқ –  
Икки төғ – шу тарзда – мунглашар эдик.

Аммо... булат кезар ёлғиз бошимда,  
Қору совуғини урар тўшимга,  
Булатдан нарида чексизлик – қўм-қўк,  
Пастда эса тошлар музлаган – бечўғ:  
Дардим айтмолмайман пастнинг тошига...

Худовандан бошқа бирор кимсам йўқ.

1999

\* \* \*

Қаёққа борасан Сомонийўлидан,  
Вақт, сомон, кечмишда борми янгилик?  
Тинсиз шамолларнинг очиқ қўлидан  
Гарддай учиб қолди бизнинг мангуллик!  
Яралиш – мавжланар борлиққа тўлиб,  
Шопирар бу ҳолни Буюк рух – жомчи.  
Қалқиган бир қиёқ майсага қўниб,  
Қунишиб туради Ер шари – томчи.  
Яралар очиқдир – даҳшатли қийноқ  
Тоғ каби ўсади юмшоқ қўнглимдан –  
Ҳа, йўқлик ҳаётни ютмоқда, бироқ  
Тириклик яралиб келар ўлимдан.  
Олти тараф жаҳон кўринар ғариб,  
Ақлига бермасин қанча оройиш –  
Арзимас асрорин ичини ёриб,  
Бир Куч минг тарафни этар намойиш...

Кўксимда бу ҳолнинг бари жамулжам –  
Оллоҳ нега қодир – руҳимда акси –  
Замонни қўлидан ушлаб турибман:  
Замоннинг борлиги негадир баҳсли.

2000





## БЎРОН

Тўзғиб учди қорли дашт –  
Шамол вақтни қувлади.  
Маст чилладан туйиб гашт,  
Бўри ногоҳ увлади.

Шувоқларга ёпишиб,  
Биёбонлар қотди донг.  
Оппоқ қорга қапишиб,  
Бесас титради қуён.

Увлади акс-садолар,  
Увлади жонда қўрқинч.  
Кунишди кенг маъволар,  
Ялаб ўтгандай қилич.

Йўлни майда шопириб,  
Ютди гирдобли тўқай...  
Умрнинг бор охири,  
Тўфоннинг сўнгти йўқдай.

Шамол қорни кўтариб,  
Тепалардан оширди.  
Йўлчи «оҳ» урди: – Тангirim!  
Жонни сенга топширдим!

Нола этди шўр banda,  
Ноласи – тўфонда – гард...  
Ногаҳон бу ишончдан  
Жиддий тортди худованд.

Бирдан кўринди йироқ,  
Бирдан юзин очди чўл.  
Бирдан «йилт» этди чироқ,  
Бирдан... Йўл-ку!.. Йўл-ку!.. Йўл!..

Кўқдан сарвари олам  
Интиқ боқар бу кезда:  
— Мени эслагин, бандам,  
Илтимос, яна эсла!..

2000



\* \* \*

Сукунатга дунё фарқ,  
Фақат руҳнинг фувури.  
Дилга тегар хавотир –  
Чексизликнинг шивири.

Музлаган қўлларини  
Йифишириб пинжига,  
Бир юлдуз жим йиглайди  
Самоватнинг буржида.

Юрак эса етти ранг,  
Етти оҳангда қотган...  
– Соғинч етмоқда, эгам,  
Мени кимлар йўқотган.

Сукунат эса – чексиз  
Ноиложлик қафаси.  
Кўнглим сезмоқда – эссиз  
Бир соғинчнинг нафасин.

Ёлғизлик тутиб борар,  
Силқиб оқар кўнглимга.  
Олис титроқ бармоғи  
Аста тегар қўлимга.

Руҳ уринар юксакка –  
Қичқириғи – жим... Жимдир...  
Мени худди кўз ёшдай  
Артиб олмоқчи кимдир.

2000



\* \* \*

Босиб келаётир  
дим ҳаво.  
Бунча ҳувиллади бу адир.  
Тоғлар танҳо-танҳо,  
дараплар танҳо...  
Кетгим келаяпти қайгадир.

Шамоллар сойларда  
чўзилди,  
Мезонлар учдилар – бетақдир.  
Сабрнинг энг сўнгги  
ипи узилди...  
Хат ёзгим келмоқда кимгадир.

Сездими кун кетар чофини,  
Қарғалар айланди фалакда бетин...  
Қанотли чироқдай –  
мени соғиниб –  
Бирор келармикин?

Шом тушар чоғида ғам жуда равшан,  
Оқибатни аён кўради идрок.  
Ҳеч кимга кўрсатмай  
бир йиглаб олсан...  
Қоронгулик тушсайди тезроқ.

2000



\* \* \*

Парвардигор,  
вужудим куймоқда.  
Рұхим чирқирап  
олов ичида.

Үзим гуноҳкорман –  
одамни ҳам  
шу қадар севадими  
одам?

Ҳар бир заррамда азоб.

Енгиб бўлмаяпти соғинчни –  
мадад олай десам,  
пирлар ҳам йўқолган.  
Ҳар лаҳзам – дард,  
ҳар нафасим – дард,  
ҳар қафасим – дард,  
ҳар барбодим – дард,  
ҳар озодим – дард...

Мангу дардларга  
айланишдан бошқа  
иложим қолмади,  
Парвардигор...

2007



\* \* \*

Ҳаловат қолмади жонимда... Ё раб!  
Қайси чексизликнинг бовури дудли,  
Қайси йўқсизликнинг кўзига қараб,  
Қақшади қайси бир борлиқ ҳудуди?

Юраги оғриди қай коинотнинг,  
Оқди қай фалакнинг кўзидан ёши,  
Мароми йўқолди қайси ҳаётнинг –  
Тириклик ҳаддидан бораркан ошиб?

Зўриққан танимдан қутулмоқчи жон,  
Таним – таслимликда, руҳим – энтикан.  
Олий куч қай томон айлайди равон –  
Қайси ҳурлиқдаги эзгин кемтикка?

Қийноқнинг ўтида қандай покландим!  
Кўзимга боқолмай чекинди риё...  
Қайси софлик билан охир боғландим –  
Сенингча, оғрифи каммиди, дунё?

Роҳат тополмадим – ёнмоқдан ўзга,  
Тўсмадим – дунёнинг оқар йўлини...  
Шукур, ўлим дастин танимга чўзган,  
Руҳимга узатмиш ҳаёт қўлини.

2001



\* \* \*

Сабр ўтди ҳаддан... Чўзилиб,  
Ҳаракатга тушди дунёлар –  
Соҳиллардан қўли узилиб,  
Оқиб кетди барча дарёлар.  
Мангуликлар онгга жо бу дам  
Қадим армон дийдорга чоғлар –  
Бир-бирини қучгани маҳкам,  
Кўзғалдилар баҳайбат тоғлар.  
Дунё қайта яралар они  
Отилиқмас фақат вулқонлар:  
Булоқликка қайтмоқ армони –  
Тоққа юрди баҳри уммонлар.  
Гарчи уйи заминнинг таги,  
Кенг ёруғдан гарчи ҳоли танг –  
Тинглагани фалак эртагин  
Бош кўтарди ерданчувалчанг...

Етти қават осмонда тангри  
Қайта этди дунёни бунёд.  
Ҳамма нарса чараклар – янги,  
Ҳамма нарса яралар – бот-бот:  
Уфқларни қайтадан чизиб,  
Тошдан ўсиб чиқмоқда тоғлар;  
Қуёш, ана, нурларда изиб –  
Умрин ёруғ дунёга боғлар;  
Булоқ яна жўнади оқиб,  
Айлагани уммонни барпо;  
Ер қаърига боради ботиб,  
Ишchan руҳдачувалчанг ҳатто...

Бу дунёниг ҳар бир мурвати,  
Ҳар зарраси қайтар аслига –  
Жони – яна юксак қувватли,  
Руҳи – мангу баҳор фаслида.  
Ҳар заррани англаб, тушуниб,  
Оллоҳ айтар самимий калом:  
– Бажардингиз барча ишимни,  
Раҳмат, шундай этингиз давом.

Ҳамма нарса ўша йўлида –  
Фақат юксак илҳомда унган...  
Инсон қани?..

Тупроқ қўлида –  
Тангри оғир хаёлга чўмган.

2000





\* \* \*

Фуссадан уйғонмоқ нақадар оғир!  
Тикилсанг – баҳт нурсиз, саёздир – кечсанг.  
Дилни тарк этаркан кадарнинг доғи,  
Енгилсан – дунёнинг олдида ҳечсан.

Фуссамда мен қандай яшадим теран:  
Энг қаро ер ичра илдизим... Баргим  
Вазмин суҳбат қурди юлдузлар билан,  
Бузиб ўсар экан асрорлар тархин.

Фуссадан уйғондим. Парвардигор-о!  
Энди қай зинданга юрагим мазлум:  
Қайси саодатга айлайсан раво,  
Қандай сабрларга этгайсан маҳкум?

1997

\* \* \*

Худога минг шукур! Етди саботим –  
Шеърнинг тошларига чўқди ҳётим.

Тошнинг метин қаъри нақадар мунгли.  
Шу мунгда юрагим гул каби унди.

Ҳар сўзга уриниб бор умрим тушди,  
Тош ичра тирналиб, минг синиб учдим.

Умидким, бул бўлгай бироннинг шарҳи:  
– Бесарҳад эрк эрур сўзининг баҳри!

2007



\* \* \*

Берган дардларингга шукур, худованд,  
Оғриғи сингиди ҳар бир заррамга.  
Қарагин, зил осмон руҳимга пайванд,  
Қарагин, қаро ер бошимдан баланд –  
Ҳар тола титрофинг руҳу баданда  
Яшамоқ айланди улкан ярамга.

Турибман дунёнгнинг қоқ ўртасида,  
“Оҳ”имни ичимга ютиб – телбавор.  
Ичимда – фуссанинг энг ўрдасида,  
Ёлғончи дунёнинг тим кўлкасида –  
Энг оғир яралиш – даҳшатли инкор.

Ва иқрор. Торайиб бораркан таним,  
Юракликдан тошиб кетмоқда юрак:  
Худованд, дунёнг бор “оҳ”имда маним,  
Худованд, шуъланг бор роҳимда маним,  
Энг Олис боғлардан тераман чечак.

Дард билан тўлганман. Пинҳон тўлғатмоқ –  
Кўзёшсиз йиглатмоқ – улуғ шафқатинг.  
Касбим – қават-қават тушдан уйғонмоқ,  
Ҳар бир уйғонишда ҳаққа чўлғонмоқ...  
Ҳақнинг чексизлиги – буюк раҳматинг.

2001



\* \* \*

Худойим! Куйганим сайин яқинсан,  
Кўнглимда ёруғинг этади жилва:  
Шуъласан, ёғдусан, нурсан, чақинсан –  
Барча ёруғликдан чексиз ёрқинсан.  
Сен билан тўлгандир руҳдаги хилват –  
Ёлғиз сен боримга танҳо ҳокимсан.

“Оҳ”ларим нақадар ўтли!.. Нафасим  
“Худойим!..” деганда олар аланга!  
Ўша фидо учқун муздай оламга  
Менми? Ёндирайми дунё қафасин,  
Ёхуд солайинми жонни қаламга!

Мен жами уйқумдан уйғониб бўлдим!  
Алангам ловуллар барча кулликда,  
Қандай баҳт! – ёлландим сенга қулликка,  
Эллик йил тирилдим, эллик йил ўлдим –  
Ҳар тола нурингга чиқдим қуллиқقا.

Дунёнгда – мен ҳам бир ғамхона бардош –  
Ялангдин, ялангсўз... – ҳаётим яланг,  
Бир сенга қарамман, бир сенга қарам...  
Мана, кўзларимдан оқиб борар ёш,  
Фақат сени сўйдим, шафқатли эгам,  
Ва фақат ўзимни фош айладим, фош.

Кудратингни баҳор айлар намоён,  
Толедай кўкарған бу олам – гулшан:

Тангрим, шафқатингми шунча бепоён?  
Борайми сен тараф шу баҳор билан...  
Дунё ташна ўтлиғ нидога мудом,  
Ким унинг дардида йиглайди пинҳон –  
“Оҳ”ингни ким айтгай кетсам дунёдан?..

2002





\* \* \*

Руҳимда тўрт фасл бирдан юз очди —  
изғиди юракда турфа ҳаракат:  
бу даҳшат тўқнашда ўзимни очдим —  
яна қайта очдим. Сўнгсиз маҳобат —

армон тўғонида тўзғиди жоним,  
қору гул, кузагу ёзга қоврилиб.  
Фақат улкан тортди соғинмоқ они —  
бенажот шиддатнинг йўлсиз оғриғи.

Сабр бу йўлсизлик ўтган работдир.  
Жонимни ўртайди ундан-да юксак  
чиdamлар. Фамларим энди ободдир,  
фақат бир вайронлик жисмимда — юрак.

О, соғинч!.. Фамидан нур ёқсан очун!  
Абаддан узундир йилларинг, ойинг...  
Мен яна дунёдай ўзимни очдим —  
нақадар чексизман... Худойим!..

2002



\* \* \*

Тунда ой нурига чўмилмоқда тоғ,  
Оқар елкасидан ёғду селлари.  
Нурнинг ёмғирида ҳар бута-бutoқ,  
Нурда довонларнинг букик беллари.  
Даралар кўксини ёриб ташлаган  
Сой туви ваҳима – ҳайқиради дард –  
Кўк билан тушнуксиз суҳбат бошлаган –  
Тошларга урилган бу узлуксиз қалб.  
Арча кўлкасида бандланмиш жоду.  
Ойдинда учади сеҳрли шарпа.  
Ойнинг юрагидан чўзилган ёғду  
Етар илдиздаги пинҳонликларга.  
Қоронғу ўнгирда – қўналғасида  
Негадир потирлар уйқучи қарға...  
Жамики ҳолатни тутиб дастида,  
Чархни айлантирап қудратли дарга.

Мени тор сарҳадда Оллоҳ яратган,  
Берк эрур руҳимга ўзга дун йўли.  
Аммо – бу нимаси? – тоғларга чиқсан,  
Елкамда сезаман кимнингдир қўлин.

2002



\* \* \*

Кўкка боққан тангрига яқин!  
Парвозимни кўролмаган дўст,  
Ҳеч бўлмаса, қушларга боққин,  
Булутларга бир бор ташла кўз!  
Гувиллайди мовий чексизлик,  
Бесоҳиллик ичра руҳ кўркам...  
Бу дунёда йўқдир тенгсизлик –  
Тангри танҳо иккимизга ҳам...

2002

## **БАРГ**

(Елнинг гуноҳи йўқ). Банддан узилдим.  
Навдам бир тўлғонди – бор-йўқ афсус шу!  
Пирпираб ҳавода сўнг йўл чизилди,  
Гарчи сукунатнинг тахи бузилди –  
Фарёдвор мақомга етмади қайғу.

Ерда эса кутар абад интиҳо –  
Маҳвликнинг захларин бағрига жойлаб...  
Мени тутиб борар кафтида Оллоҳ  
Авайлаб, авайлаб, авайлаб.

2003



\* \* \*

Юрагимни мавжлар чулғаган:  
Ҳар заррамда уринар ҳаёт  
(Бунёд – барбод – йўқотиш – нажот...),  
Сезаяпман – ошкор унмаган,  
чўккан кифтларимга кўнмаган –  
Қанот бор... Ҳа, менда бор қанот!

Кўрганим йўқ, сезганман холос,  
учирганда танни шамоллар,  
кўринганда олис камоллар...  
Қанотдан ҳам воз кечган парвоз  
шиддат ичра айтганида роз –  
ё ҳамроҳим бўлди бу ҳоллар?

О,сен ҳақда ўйларим нафас  
каби ҳар он жондир жонимга.  
Сенсиз қолган бу жаҳонимда  
қанотсизлик билан тушдим баҳс...  
Парвардигор, судралиб эмас,  
учиб боргим келар ёнингга.

2003





\* \* \*

Менинг дардларим тошқин...  
Тошганда сўзга очдим.  
Мен киммман-у, бу ёш ким –  
Қай кўздан оқдик ногоҳ?

Дунё кўксимда жамдир,  
Жамлиги менга камдир,  
Бу дунё ҳам бир шамдир –  
Шамдан учқунман, э воҳ!

Дунё узун садодир,  
Руҳим унга сатодир,  
Шеър аччиқ «оҳ» – нидодир,  
Ботинга тушгач нигоҳ.

Фигонимдан кўчган шаҳд,  
Кўкка етмади – бебаҳт.  
Осмон-ку етти қават,  
Мен неча қават, Оллоҳ?

2002





\* \* \*

Дардда оқиб-оқиб,  
Бу умрим кетди...  
Бетасвир, бехудуд  
Азобга етдим.

Энг фарёд сукутдир  
Вужудимда куч –  
Ичимга жо бўлиб  
Ўлтираман ғуж.

Руҳим чўзилади –  
Дунё тордир! Тор!..  
Чексизлик!.. Чексизлик –  
Сен, Парвардигор!

Менми? Дунёлар жо  
Жунунвор гардман:  
Йўлингда адашган  
Азобман – дардман.

Менга меҳринг эса  
Шеърга солимли:  
Жонимни олдинг-ку,  
Фақат жонимни...

1998



## МУШКУЛОТ

\* \* \*

1

Умрида  
бир марта ҳам  
ўлмаган одам,

сен билан  
нима ҳақида  
суҳбатлашай?

2

Умрида  
бир марта ҳам  
тирилмаган одам,

сен билан-чи?

2007





## ҲОБИЛ

Меҳрибоним,  
менга ишон,  
отилган тошдан  
тоғ ўсмайди,  
чунки отилган тош – ҳасаддир,  
отилган тош – нафрат...

Меҳрибоним,  
менга ишон,  
отилган тошдан  
фақат қабр тоши ўсиб чиқар,  
бор-йўғи шу...

Меҳрибоним менинг,  
бармоқларингни ёз,  
тош ерга тушсин,  
Уни бошимга қўйиб,  
ўйлаб ётай –  
дунёнинг бахти ҳақида.  
Шу тош,  
шу бечора тош,  
тогдай сезсин ўзини,  
энг юксак тогдай...

Меҳрибоним,  
менга раҳминг келмаса,  
тошга раҳминг келсин...

Меҳрибоним...  
Меҳрибоним...



## БИР ПАСТКАШ ҲАҚИДА ЁЗГАН ШЕЪРИМ

Пасткашлик – нақадар баҳодир, ўқтам!  
Пасткашлик – нақадар тўғри сўз, камтар!  
Эзгуликка ўхшар ҳақиқатан ҳам,  
Кўрқинчли жойи шу –  
Жуда ҳам ўхшар.

2004





\* \* \*

Икки қўлимни кўтариб,  
дардисар юрибман.  
Оғир юқ бўлди менга  
иҳсиз қолган икки қўлим.  
Иҳсиз қолган қўллар  
дунёдан оғирдир.  
Юмушиз қўллар –  
худонинг қарфиши.  
Елкаларим икки қўлимдан  
безор бўлган.  
Уялиб яшайди икки қўлим  
хотинимдан,  
болаларимдан...

Кифтларимга асир бўлмаса,  
қўлларим –  
бир жуфт қуш –  
учиб кетади у дунёга  
ўзимдан аввал.

Аммо ҳозирча  
қўлларим  
икки ўқланган милтиқдай осиғлиқ  
турар  
икки ёнбошимда.

Худойим,  
наҳотки, энди  
мени ўлдиришдан бошқа  
иш тополмайди  
иҳсиз қолган икки қўлим.

2004

191



\* \* \*

Саҳродаги ёлғиз дарахт,  
На дўстинг бор, на ёринг:  
Кесилдими боғ бешафқат –  
Сенми сағир ёдгори?

Ёхуд шовқин боғни ташлаб,  
Чопиб чиқдинг саҳрона –  
Ёлғизликда айтар – бошқа  
Дардинг борми дунёга?

Саҳродаги ёлғиз дарахт,  
На дўстинг бор, на ёринг:  
Нега бунча жисминг караҳт,  
Қумга чўқдими зоринг?

Эҳтимол бир савобпарвар  
Сени бунда етказган:  
“Йўлчи ҳориб қолса магар  
Соялар” деб ўтқазган.

Йўл четида ёлғиз дарахт,  
На дўстинг бор, на ёринг...  
Қайдада ўша ҳаётга фарқ  
Хаёлкаш бунёдкоринг?

Ўзи бебаҳт қолмадими  
Ўзгаларга тутиб баҳт –

Ўша инсон... Ўша инсон...  
Ўзинг эмасми, дарахт?

Уввос солиб, қум қирларни  
Оташ селлар бузмоқда...  
Қай ёнингга ўзни экай,  
Дарахт, бирга ўсмоққа?

2004





\* \* \*

Эрталаб мошинга кўчалар тўлди.  
Улардан орқада қолмасам бўлди.

Менинг «Мерседес»им трамвайдир – жўн,  
Ўзимдай баҳоси арzon – ўн беш сўм.

Ишга етдим – болам, елдим-югурдим,  
Замон нима айтса бажарib турдим.

Ичимда турсам ҳам ўзим мунгайиб,  
Бошлиққа баҳтиладай боқдим тиржайиб.

Онангнинг туфлисин кўчганди жафи,  
Михлатиб улгурдим тушлик маҳали.

Онанг ўраб берган помидор, пиёз  
Тўғралди... Қорин – тўқ, кайфият ҳам – соз!

Сўнгра бозор тушдим. Ўйлар – калава.  
Уканг – бозор ичра тортар арава.

Катта уканг бор-ку, Эшмат – тадбиркор!  
Машина ювмоқда – ғайрати бисёр.

Уйга келсам, онанг кетди иш қувиб,  
Қўшни идорани келмоққа ювиб.

Кўлида супурги, латта-ю пақир,  
Онангга эргашди сингилчанг факир.

Уларга «тонггача...», дедим албатта,  
Қоровулман чунки кечки навбатда.

Ҳаммамиз – пултопар... Зўр экан бозор!  
Сен ҳам пултопарсан, болам мардикор!

Яқинда уйлайман... Болажон, уйлан –  
Энг баҳтли, кўнгли кенг бир қизга уйлан.

Худодан эрта-кеч сўрагин шафқат,  
Бой фарзандлар туғсин хотининг фақат.

Ва яна айлагин бетин илтижо,  
Бозорга бандасин солмасин худо...

1999





\* \* \*

## 1

— Неча сўм?...

Замона  
ҳозир талайди,  
санъат, пештахтадан  
тез тушгин бу он.

— Сотиласан, — дер у. —  
молсан... —  
алдайди.

Юрак сотилмайди  
ҳеч қачон.

Нечун хушбахт эрур,  
дунё, бозоринг?  
Жараклаган нима?  
Пулдами даврон?

Қалтираб пул олган,  
хайрият, қорин...

Юрак сотилмайди  
ҳеч қачон.

## 2

Пештахтада — аччиқ  
пешона тери,  
зиёфат бермоқчи  
меҳнат дунёга;  
маккорлик қуюни,  
алдоқнинг сели —  
тирикчилик — бунда  
минг бир қиёфа.

Бозор – бебаҳтлиг-у  
баҳтнинг кўриги,  
Чўнтағи қуруқнинг  
лаби гезарган.  
Юрак бозор аро  
борар зўриқиб,  
ҳаётнинг мантиқин  
оғриб сезаркан.

Пештаҳталар аро  
беҳуш борар у,  
савдо талвасалар  
кўчади дардга.  
Бозор – томчи ёшга  
айланар... ёху,  
Бир оғриқ бозорни  
қўшади қалбга!

Жаранглаб узилар  
қуёшнинг тори,  
Тилдан шеър узилар  
Жонни совитиб...

– Шўрлик, шунча ғаминг  
бормиди, қорин?

Йиглайди – юракни  
бўлмас овутиб.

– Нечун қисмат сенга  
айламади тенг!.. –  
Ўздан кечмоққа ҳам  
Юрак ҳозир шай.

– Сен сотилма, юрак!  
Ҳеч бўлмаса, сен... –

Қорин нола қилар  
худди юракдай...

*2000*

\* \* \*

Бешикда — чақалоқ. Ташқарида —  
ёв ҳаёт. «Болангни аста-аста  
менга берасан. Улгайгани сари  
меники бўлар фарзандинг». —  
Кўзингга тикилмай қаътий айтар у. Болангни  
бағрингта босасан. Кучоғингдан отилиб,  
ҳаётга талпинар гўдагинг. «Ҳаётга бораман» —  
қиқирлаб қулар у. «Ҳаётга бораман» —  
ҳайқириб йиғлар у. «Ҳаётга бораман» —  
ухлаб қолар у..... Фарзандинг  
дарёга ўхшайди — тутиб қолиб бўлмас,  
маҳкам қучганинг билан. Бу — меҳрдан яралган  
дарёга — тўғон бўлмоқ эса сенга нораво.  
«Нега менда узоқ қолмадинг, давомчим?  
Қандай сени юборай бу ҳаётга? Қўлимдан эса  
фақат бир иш келар — сенга ҳаётдан дарслар айтмоқ —  
*Тингла, болам, алла,*  
*Тилла болам, алла.*  
*Овунчогим, алла,*  
*Кўзичогим, алла...*  
Энди деразага қара. Кўрқмай қара”...  
Деразада эса икки кўзи ёниб турар ҳаётнинг.  
Икки кўзи ёниб турар — худди бўридай.  
*“Полвон болам, алла,*  
*Жондор болам, алла”...*

1996



## КЎРГАЗМАДАГИ ҲАЯЖОН

Сўз ўзини оқламади, балки ранг...

Сурат: Куз. Қирмизи ўрик ва шамол бир-бирига айқашган. Мовий ҳавони тирнаб борар қип-қизил ёмғир. Буларнинг барчаси яхлит ноаёнликда. Манзара – ранглардан иборат туман – ажратиб ололмайсан бир ёлғиз япроқни. Суратда ҳаётдан ҳам гўзал ҳаёт, гўё юрак тегмагандай.

Сўз ўзини оқламади, балки ранг...

Сурат – кузги боғ – аланга – учқунлаб шовуллар. Оёғим остига бир япроқ келиб тушади суратдан. Мен уни юрагимга тақиб қўяман. У – энг тирик япроқ, гўё маҳорат тегмагандай.

Сўз ўзини оқламади, балки ранг...

Фақат энди билишим зарур – суратга ҳаёт киряптими, ёхуд кириб борар сурат ҳаётга. Сурат билан ҳаётнинг бу киришувида, албатта, рассом йўқ. У дўстлари билан пиво ичар устахонанинг бир четида. Юрагида маҳорат юксалтирган оғриқ – гўё ҳаёт тегмагандай.

Сўз ўзини оқламади, балки ранг... Аввал нима бўлган эди? Сўзми? Юракка тақилган барг

оғир титрайди. Шубҳага ўрин йўқ. Сўзим қайдан бунча юракли бўлсин – аввал ранг бўлмаган эрса...

Кўргазма залини куз босди. Нима  
бўлса ҳам, йиғлатиб тур,  
худойим!  
Бу дунёнг эса кўнглимда шовуллар –  
худди инсон тегмагандай.

1996





## БОШҚА САВОЛЛАР, БОШҚА ЖАВОБЛАР ВА БИР ХУЛОСА

Ўлган одам ўлиб кетмайдими? Нега тушларимга кирасан? Нега хомуш ўтирасан тушимда? У дунёда ишларинг қандай? Нима ёқмаяпти сенга? Ҳақиқат нималигини тагига етдингми? Ёки унинг таги йўқ эканми у ерда ҳам? Фаришталар ҳақиқатан ҳам фариштами? Дўзахда кимлар ёнаяпти? Устод Дантенинг ёзганига ишонаверайми? Бу дунёдагиларга нима дейин? Қорин гами у ерда ростдан ҳам йўқми? У ерда ҳатто қориннинг ўзи йўқлигини ҳаммага айтаверайми? Руҳнинг нималигини билдим, аммо вужуднинг нималигидан гапир? Нега бош чайқайсан? Фақат савол берган икки дунёга ҳам ёқмайдими? Бўлмаса, биргина саволга жавоб бер – дўзах қайси дунёда?

Осмонда булутлар. Ёмғир ёғиб турибди. Кўз ўнгимда ўсајапти майсалар. Қандай самимий уларнинг яаш тарзи. Фақат чиндан иборатга ўхшайди бу ёлғон дунё. Ҳамма саволлар бежавоб. Яшашининг шуниси қизиқ. Қизиқ – мияга қон қуилиши. Юракнинг ёрилиши қизиқ. Ҳаммасидан қизифи – ўзини осиб қўймоқ. Ўта қизифи – бир-бирини отмоқ. Чидаб бўлмайдиган ўта қизифи – отмасдан ўлдириш. Энг қизифи эса – гўдакларнинг туғилиши. (Эътироф этинг шуниси – жуда қизиқ!). Эндиги масала – саволлар ёдимизда туришида. Жавоб муҳимдир, аммо энг муҳими – савол. Хотирамиз эса бедарак кетган. Агар у саломат бўлганида, аниқ биларди – дўзах қайси дунёда эканлигини.

Бироқ биринчي галдаги вазифа – саволларга жавоб бермаслик. Жаннатда яшайверинглар. Сен эса тушимга кирма. «Савол – ўзликни англамоққа тангри юборган иноят» деб ким айтди?

Гуноҳкор!..



## ТЕСКАРИ ВАҚТ НИҲОЯСИ

Вақт тескари оқди. Ердаги хазонбарг қўнди навдага. Сўнг яшилланди. Сўнг йифинди куртак бўлиб. Сўнг сингиб йўқолди дараҳт шоҳига. Боғбоннинг дол қадди тикланди. Қорайди сочи. Юзларидан ажинлар ариди. Энди илк бор гуллаган ниҳол тагида энтикиб турар ёш йигит. Юраги эса гулдан гулга капалакдай қўнар: «Ўлмасам, вужудим ҳам капалакдай учар; ўлмасам, шамолдай ҳам еламан; ўлмасам...» – деб ўйлади ўлмаслигига аниқ ишониб.

Аскарнинг кўксидан ўқ қайтиб чиқди. Қўшинлар ортига қайтдилар. Қабрлар ёрилди. Шаҳидлар жўнадилар уйларига. Қайтиб фойиб бўлди қорачўғларга кўз ёшлар. Қуроллар эридилар оловга кириб. Олов сўнди. Осмонга ёғдилар ёмғир-у қорлар. Кесилган ўрмонлар шовуллай бошлади. Сувдан қўрқмай яшамоқقا киришди балиқ. Хуллас, инсон душман эмас бу дунёга. Ҳамма юрак очиқ бир-бирига. Ҳамма юрак битта – Одам Атонинг юраги...

– Юр, Ҳавом, жаннатга қайтдик!

Улар ногоҳ тўхтадилар жаннат эшигига урилиб. Жаннат эшигини очмади. Чунки тескари оқишдан катъий воз кечди Вақт.

1998





## ЭНГ ҚИММАТБАҲО ТОПИЛМА

Бошимда – саратон. Бўйнимга қуёш  
йўлбарсдай осилган. Найзавор узун тишлари  
ўтиб борар юрагимга. Ҳолсизланар  
юрагим.

Пойимда – қиши. Муз қиличлаб кесар  
товоримни. Қатқалоқ устида оққан  
қон – менинг изларим. Наҳотки, мендан  
қоладиган йўл шу қонли излар? Юрагим билан  
яладим қонли изларимни.

Дарвоқе – йўл... Йўл – йўқ!

Шунча йўлсизлик тургандা, йўлдан юрайми?  
Йўлсизлик энг яхши йўлдир – туғилишдан  
ўлимга бораётган саёҳатчига – ҳеч ким кўрмаган  
кўримларни кўришни истаса... Манзил –  
хувиллаган ҳечликда. Ҳамма менга ачинади: «Шунча  
юриб, ҳеч нарса топмади бу одам». Мен кувонаман:  
«Шунча юриб, ҳеч нарса топдим охири»...

1997





## ЯНА БИР ЭРТАК

Эртак айтди: «Бу девнинг жони кабутарда. Нафас чиқарса, учеб чиқади». Мен пойладим. Нафас чиқармади, фақат нафас олди бу дев. Бутун дунё кирди нафаси билан девнинг ичига. Не-не орзулар, не-не армонлар, не-не умрлар...

Мендан бошқа ҳамма нарсани ютди.

Мен пойладим. Мени пойлади у. Бирдан сапчиб ёпишди юрагимга. Қанча қўшини, қанча маҳфияти, қанча даврони бир чангалида — юрагимни эзгилар. «Сен — кабутаримсан! Сен билан нафас оламан! Сен менинг жоним бўлмоғинг керак!» — қичқиради у.

Дев билан юрагим тенгсиз курашда. Қисирлаб синади қанотларим. Майли, учмасам ҳам яшайман. Аламидан баъзан бўзаради дев. Бармоқлари асабий қалтирас, юрагимга ботиб. Кучи етмайди...

Юрагимда парвардигор борлигини сезмайди у бефаросат.

1997





## МАҚОМ

Холи бир чорбоғда (август оқшоми)  
боғ-у кўлка билан ўзини тўсиб,  
бир қулба мусиқа тинглади. Коми  
шоҳид онларини – эҳтимол – чўзиб.

Дераза юзига пардалар тортди,  
нурларни ромларга солди – мулойим.  
Жами руҳи билан ўзига ботди –  
кулба – ижод каби – қиёмат қойим.

Мусиқа узлуксиз кабутар монанд  
учиб, қайтаётир фалакдан ҳар он:  
юрак тангри билан тузмоқдами аҳд –  
дардини юзма-юз этмоққа баён.

Мусиқа тинглади – ўртаниб – кулба,  
туннинг елкасига босиб манглайин.  
Оҳиста-оҳиста ғарқ бўлди мунгта –  
хоналар оҳангга айланган сайин.

Танҳолик дунёдай кўкарди бехуд,  
ваҳий эшитгандай оғриб уринди.  
Бу қулбада кимдир жон берди, ёхуд  
кимдир ингроқ ичра қайта тирилди.

2004



## МУСИҚА. БЕТХОВЕН

Фақат юрагимни сен асир олдинг,  
Мусиқа... Ўртанган фарофатинг соз!  
Тўлғонар, чўлғонар ёлқин ва ёнғин –  
Юрагим – минг дардли оташга ҳамроз.

Парча-парча этдинг ҳамма зирҳимни,  
Кўз – юмуқ, руҳ учар аъло аршинингта.  
У тутиб қолмоқчи барча сеҳрингни,  
Жойлаб жондан оққан митти ёшимга.

Асрлар дарди жо ҳар бир волангга,  
Томирим – эшилар, суягим – кукун.  
Тангри инъом этди сени оламга,  
Менинг гунг дардимни ингратмоқ учун.

Сени тинглаган сўнг – яшамоқ мушқул,  
Бош эгиб ҳаётнинг маломатига.  
Сен олиб келдингми ҳурликдан учқун –  
Оллоҳнинг энг улуф кароматидан?

Сўзда айтолмайман... Сўз – жуда ботир,  
Ҳаётнинг юзига айтади шартта.  
Сўйилган сўздан куй қолган нидодир –  
Мусиқа – шу сабаб – дунёдан катта.

Дил – озод, гар тилни дунё боғлади,  
Руҳнинг даштларида юрган ёзиман.  
«Нурликда яша» деб худо хоҳлади,  
Сенга асирикка аммо розиман.

1999



\* \* \*

1

Рұх билан юракдан  
Тараплан зиё –  
Санъат бу дунёдан  
Гүзалроқ дунё;

Илҳомдан бетоқат  
Учган тафаккур,  
Миллатта – шон-шавкат,  
Юракларга – нур;

Кўнгилнинг кафтида  
Титраган илҳом –  
Илоҳий тафт ила  
Инсонга инъом;

Унда бор Оллоҳнинг  
Дунёга меҳри;  
Ҳеч сўнмас зиёнинг –  
Ҳаётнинг сехри...

2

Хофиз бўзлаб қолди –  
Дардга қориши –  
Дунёнинг бир чети  
Нурдан ёриши.

Худованд нолада  
Тўлғонди бу кез:  
– Бандам, мени эшишт,  
Бандам, мени сез...

2001

207



\* \* \*

Эгаси кетарда эсга олмаган,  
ёхуд ногоҳ ташвиш – чиққан ёдидан:  
бир чироқ – кеч кузги сариқ олмадай –  
кутади кимнидир эшик олдида.

Эгаси тун чоги сачраб уйғонган –  
олис шуълалардан ловуллаб туши –  
олиснинг ишқида беҳуд тўлғонган,  
ва кетган – етаклаб телбавор ҳуши.

Эҳтимол у одам дунёнинг – дарди,  
Эҳтимол – юраги, эҳтимол – bemor...  
Бир нурли сарфайиб чехраи зарди,  
Кимнидир кутади чироқ интизор.

Ёзда боғ яширган уйнинг жуссаси  
энди фарқ дарахтлар қовурғасига,  
кимнингдир шошилинч қолган фуссаси  
ўзини бетиним айлар бахшида.

Ҳатто кундузи ҳам ўчмай ёнади,  
ҳеч кимга кўринмай – камтар-у фақир  
(“Фақат бир кишига жоним воладир,  
бошқаларга эса қуёш бор, ахир...”).

Ёнади кечқурун яна-да равшан,  
зулмат тушган сайин чароғон, нурли.  
(“Эрта-ку қуёшин ёқади олам,  
унинг бир шамга ҳам етмагай қурби...”).

Юлдузлар фалакда шивирлайди шан,  
ҳавасга тўлади яқину йироқ:  
— Қай бахтли инсоннинг тақдиди экан —  
бунчалар чиройли порлар бу чироқ!

Аммо омонлик йўқ бу соғинч ишда —  
Бироқ ким ҳам ўйлар — паймони етган?

— У чироқ қаерда!  
— Чин ўртанишда  
Юлдузга айланиб, фалакка кетган.

*2001*





\* \* \*

Кечаси уйғонсам, ит ҳуаяпти –  
аниқ; занжиридан норози.

Туннинг этагини таталаб юлаяпти  
бесаранжом овози.

Тун эса юлдузларни томоғидан тутган,  
кичрайиб қолган – қўз ёш каби – ой;  
чўчиған, барча товушни ютган –  
қўрқинчга бой,  
қўрқинчга бой.

Бу туннинг феъли жуда даҳшат –  
ухласа мангу қоладигандай бу чоғ.  
...Берган мададингга, худойим, раҳмат –  
ҳеч бўлмаса, итларинг уйғоқ.

2004





\* \* \*

Туш кўрди қуш.

Ҳаётида нифоқ –  
жисмига учмоқлик туюлмиш эриш:  
қанча силкитмасин қанотин,  
бироқ  
ердан вужудини узолмас эмиш.

Ё, Оллоҳ,

яқинми охират рўзи?  
Митти юраги ёрилгудай бу дам:  
жисми чарчадими –  
нима бўляяпти ўзи,  
тупроқقا қайтгиси келяптими, эгам?

Қуш сачраб уйғонди.

– Бағрингга ол, осмон,  
ўлим тушгандай жонимнинг қасдига...  
У жонҳалак учди.

Туши йиқилди  
(соғ-омон),  
шохи бир қалқиган дараҳт остига.

Қуш ваҳим ичра

фалакда пирпиради узоқ,  
аммо мангу парвозга қодирмас –  
У яна дараҳтга қўнди,  
бироқ  
пастга – тушига қарашга ботинмас.

Кўксида юраги бўжо урар:  
— Дараҳтнинг борлиги қандай баҳт!..  
... Уни елкасида кўтариб туар,  
Шу қўрқувдан  
    ўсаётган дараҳт.

*2001*





\* \* \*

Боғ.

Ўртасида ҳовуз.

Теграсида супа.

Тўрт тарафи толлар.

Бир четда дум-думалоқ қайрағоч.

Қайрағочнинг соясида  
ухлар бир одам.

Боғ.

Ишком-ишком узум.

Қатор-қатор олма.

Ўриклар шохларига меваларни тизиб,  
боғда бетартиб тўхтаганлар.

Навдаларга

электр чироқларидаи

ноклар осилган.

Янги ўрилган йўнгичқа.

Ариқда — сув.

Сувда синиб-синиб чўмилар қуёш.

Боғ.

Атрофи — девор.

Деворнинг теграси — сахро.

Сахро деворга кўкрагини тираган.

Боғни хуш кўрмайди бу қумзор —

баҳайбат бағрига ютиб,

кумларга кўмиб ташласа...

Бог эса  
шамолда  
бешикдай тебранар.

Супада ухлайди одам —  
богнинг энг чуқур илдизи...  
Деворнинг зиммасида улкан масъулият:  
— Одам қачон уйғонар.

1998





## ЭЛЕГИЯ

Ўша қўчаларда,  
ўша уйларда,  
ўша қиёфада  
яшар дўстларим –  
аммо мен уларни ҳеч учратмайман.

Дуч келиб қолганда сўрашамиз ҳол:  
– Сира қаримайсан!..  
– Бардамсан сен ҳам...  
Кетарда, албатта,  
тилайман иқбол, –  
аммо мен уларни ҳеч учратмайман.

Расмига қучамиз бир-биrimизни,  
туғилган кунларда этамиз табрик,  
тўйларга совфалар билан борамиз,  
аммо мен уларни  
ҳеч учратмайман.

Ахир, мен дўстларни қўп соғинганман...  
Кўзимни юмаркан,  
ё кўзга тўлган  
шаҳар боғларида кезаркан ёлғиз,  
улар етиб келар хотиралардан  
ва қизғин суҳбатлар қурамиз.

Йўқ, кўнглим ҳеч қачон тортмагай хира,  
Дунёning равишин сезганман, тангри!

Англаб етдим, тангрим,  
Биз ҳам хотира...

Ҳозирча  
Бу ҳолни  
Сезмас дўстларим.

2000





## ФОЛ. СОГИНЧ

— Йўл кўринди кўзимга,  
Ўрмалаган қияга,  
Отин етаклаб бирор  
Келаяпти пиёда.  
Ана, кўринди элас  
Уйларингнинг эшиги.  
Эшикдан чиқдинг, найнинг  
Ноласидай эшилиб.  
Сени белингдан тутиб,  
Эгарга қўйди бирор...  
— Нега бирор деяпсиз,  
Фоллар очган, опам-ов?  
— Мен фол очсан жим тургин,  
Тоқат қилгин, сингилжон!..  
Ана, отни етаклаб  
У борар уфқ томон.  
Туришингдан уфурар  
Саодатнинг сайқали.  
От устида борасан  
Қизил гулдай чайқалиб.  
Қўл чўзиб осмонлардан  
Юядузларни оласан...  
Ногоҳ йўлда бир ўзинг,  
Ёлғиз ўзинг қоласан.  
Оting боради якка,  
Бошин эгиб ғамбода.  
Дунё сен каби тиник,  
Дунё сендай озода.  
— Опажон, у одам-чи?

Қайга кетди у одам?  
У тушда қоладими,  
Тушадими у тушдан?  
— Бир сир айтай: фолимнинг  
Асрори кўқдан учган.  
Ўзинг ҳал қил — тушсинми,  
Қолсинми одам тушда?  
— Опа, сирғани олгин,  
Ола қол, мана, маржон!..  
Фолингга рози бўлгин,  
Яхши боргин, опажон!..

Дунёнинг ёлғиз ўзи.  
Саратон. Кун порлайди.  
Қиз дунёга боқар-у  
Ногоҳ тўлиб чорлайди:  
— Бу дунёда бормикан,  
Бахт сўнгига етгувчи?..  
Кел... Кела қол! Кутдирма!  
Мени ташлаб кетгувчи.

1999





## ИШХОНА. ТУН

Ишхонада чироқлар ўчган.  
Қоронғулик теграсин қучган.

Зиналарда ўлтирап баҳслар –  
Гўё дунни тушунган каслар.

Хоналарни тарк этган мақом,  
Барчаси teng – бари ҳур макон.

Бошлиқларнинг хонаси ҳам тинч,  
Очиб киргин, йўқ зарра қўрқинч.

Бир-бирига суюниб қатор,  
Кабинетлар мудраг бемадор.

Мажлис зали – нимқоронғу, кенг –  
Суқунати алаҳлашга teng.

Столларда эса юзтубан  
Ётар – ором топмай уйқудан,

Миясини йиртиб минг ташвиш,  
Одамлардан безган ҳорғин иш.

2004

---



## ЭРТАК

Бизга айтмас сирини,  
Боғларнинг дарди – елда...  
Болаларга – куйиниб –  
Гап уқтирас бир телба.

– *Кушларга ҳеч тош отманг,*  
*Күш ўлса дунё – бадбахт.*  
*Күшни соғинса, йиғлар*  
*Ўтлоғ-у ҳаво, дараҳт.*

– *Хо, телба-ю, во, телба!*  
*Гапингни айтгин елга!*  
*Дараҳт йиғласа – йиғлар,*  
*Не ташвиши бор сенга!!*

– *Кушларга тош отманглар –*  
*Умрингиз бўлгай омон!*  
*Ўтлоқ қарғаса – даҳшат,*  
*Дараҳт оғринса – ёмон.*  
*Тагин дилин оғриманг,*  
*Айниқса, бу ҳавони,*  
*У парвозни соғинса,*  
*Ғусса босар дунёни.*  
*Не қиласай? Тошингизга*  
*Тутайинми бошимни?*  
*Ахир, чумчук йиғласа,*  
*Тиёлмайман ёшимни!*  
*Раҳмингиз келсин! Қандай*  
*Кулоги йўқ боласиз –*

*Тош отсангиз... ҳайвонга  
Айланасиз қоласиз!*

Дарахтларга учар тош,  
Үчар сайроқнинг саси.  
Боғ турар кўтармай бош –  
Ичга тушиб нафаси.  
Тулки югурап боғда,  
Югурап бўри чунон!  
Тош тегдими бу чоғда,  
Лабларидা нечун қон!

– *Овқат пишиди-ҳо!..*

Она  
Фарзандларин чорлайди –  
Бир-бир бағрига босиб,  
Кувончидан порлайди.  
– *Нодон аёл!* – инграйди  
Телба ночор ўксиниб. –  
*Эҳтиёт бўл!* *Йиртқичлар*  
*Тилка этар кўксингни!*

Она негадир қучар  
Фарзандларини маҳкам...

Кушлар қайтади боқقا –  
Дарахтларга қўнар ғам.  
Бир ... Икки... О, жудолик  
Уларнинг галасида!  
Патлар беэга тўзгир  
Шамоллар орасида.  
Бўри она кўксига  
Чўзади тумшуғини.

Телба эса бошлайди  
Энг ғамгин қўшиғини:

*« — Дунёни айттолмайман!..  
Чидолмайсиз — аччиқдир.  
Кўрдир сизнинг кўзингиз,  
Менинг кўзим очиқдир!  
Она сийнаси — тилка,  
Ер шимар қон қўрини...  
Ана, лэб ялар тулки,  
Оғзи қондир бўрининг...»*

Телба йиғлайди қақшаб...  
Она эса ғазабда:  
— *Боғдан ҳайданг телбани,  
Ҳар кун тегар асабга!  
Бўриям, тулкиям йўқ,  
Қон ҳам йўқ, ҳатто тоши ҳам...*

(Болалар тошларини  
Дилларига яширган).

Телба эса кўчада  
Халқни этади гаранг:  
— *Мени қўзимни олиб,  
Тегрангизга бир қаранг.*

У хўнграйди, инграйди,  
Кас эшитмас сўзини...

— *Бўлди. Сиздай яшайман... —*

Ўя бошлар кўзини.

2000





## ТОР КҮЧА

Биноларни суриб  
Борар машина...  
Тор күча урилар  
Ҳозир бошимга –

Күча – тилка-пора,  
Бўлаг-у бўлак.  
Тормоз!.. Йўл қайдадир,  
Қайдадир йўлак?

Күча – уйқаш-чалкаш,  
Соф эмас – пиён.  
Футбол!..  
– Эсинг борми,  
Ўв, стадион?

– Ахир, бир кўчанинг  
Ўртаси-чети...  
Зарба!.. Пачоқ бўлар  
Мошина бети!

Юзини силашга  
Улгурмай, бирдан  
Ариқقا тушади.  
– Воҳ, рессоргинам...

Мотор бир инқиллаб,  
Жон берар, ўчар.

Энди сўкинайми?  
— Бу хор тор кўча...

Бу кўча... Кўчалар  
Ичра ёрқини!

Келинчак супурар  
Эшик олдини.

2000





\* \* \*

Куйдиради қуёш. Ит соя излаб, ер кавлади.  
Қўйлар бир-бирларининг пинжига бош тиқиб,  
қуёшдан асрарлар ўзларини. Шамол йўқ.  
Олисларда ёлғиз-ёлғиз қуюнлар эриниб  
айланар. Олисларда жимиirlаб кўринади тоғлар.  
Олисларда...

Менинг лабим эса қақраган. Ўроқ ўраман.  
Бармоқларим тиканга тўлган.  
Сомон йигаман. Олисларда эса...

Кетиш керак.

Саратони тугамайди бу жойларнинг. Бу  
ерларнинг суви йўқ. Бу ерлар сувини менга  
бермайди. Чанқаб ўлиб кетаман бу жойларда.  
Тупроқлик оғир. Бу ёнишда бир парча сопол  
бўлиб қолишим мумкин.

Сувга тўйдим. Сувдан бошқа менда ҳеч нарса йўқ.  
Шаклсизман. Истаган идишнинг шаклига  
кираман. Турфа ҳалқоб бўламан. Соҳиллар  
хоҳишига кўра айланаман аллақандай кўлга.  
Хуллас, суюгимдан жудоман. Суюгимни оқизиб  
юборди бу умр...

Кетиш керак.

Ҳавога кетиш керак. Қанотларимни ёйиб учтани. Аммо  
бу ҳаво дегани бунча бўш. Тутиб бўлмайди – бағри  
кенг дунёга жой берган бағридан. Аммо вазн пайдо  
қилдингми, сифмайсан унга. Ташлаб юборади ерга  
бир тош каби. Кушлар-ку, майли! Тутунларга нима

бор? Бўғилиб кетдим! Чанглар нима қилади бу ерда! Ўпкам тўлди...

Кетиш керак.

Оловга кетиш керак. Ёнгани! Фақат ёниш поклайди одамни. Фақат ёниш вужудни йўқ қиласар. Бир мен куйсам нима бўпти! Қисматдан қочиб бўлмайди! Кули ҳам қолмади вужудимнинг! Ким айтди рух учади деб. Руҳим бенажот ёниб турар алганга ичиди. Олов тарк этар мени. Мен нимага айландим? Бир, бир парча сополга...

Кетиш керак.

Ўша сахрого. Мен бир парча сопол – тупроқса кўмилиб ётай. Ҳеч нарсага умид қилмасдан... Дунёни шундай ўзимга йифиб ётайки, келгусининг хаёлкаши мени топиб олса, сўз тополмай қолсин бироз, бироз лаблари титрасин, севгилисига бу сополни сўзлаб берса, кўзлари бироз ёшлансин унинг... Сўнг музейга қўйсинглар – сув топиб тупроқ топмаган, тупроқ топиб сув топмаган мени; ҳавони юмшоқ деган, оловни бўшанг деган мени. Мени...

Сополнинг тагида бу лавҳа турсин:  
«Бу одам дунёнинг тўрт унсуридан тўймай, бешинчи унсур излади. Эҳтимол ўзи айлангандир бешинчи унсурга. Эҳтимол юқоридаги тахминларимиз фақат тахминдир. Унга меҳр билан тикилинг... Эҳтимол меҳрдан бошқа ҳеч нарсанинг кераги бўлмагандир унга».

1998



\* \* \*

Занжирини узди қайик,  
Эрк – занжир узмоқ, англади.  
Денгиз сори сузди қайик –  
Яшаш – хур сузмоқ, англади.

Қайиқчи қолсин қирғоқда –  
Қайиқчилик тутқин кордир.  
Қайиқ йўл олди йироққа –  
Қайда мангубурлик бордир?

Тўрт тараф сувдир – тўполон,  
На ором бор, на ҳаловат.  
Қайиқ йиглади: – Эй, уммон,  
Сен ҳам қул айладинг беҳад!..

Оғочлари шўр сувдан зил,  
Қайиқ кўкка боқди ўйчан:  
– Хурлик кўрмай кечдикми, дил,  
Бу денгиздан учсакмикан?

Бир күш ҳориб, этди парвоз,  
Шамолларга учди зори:  
– О, қайиққа нақадар соз,  
Ўзда йўқдир ихтиёри...

2000



\* \* \*

Ҳақиқатни  
қуёшни яширгандай  
кўксимиизга яширганмиз.

Тун ўтса бўлди.

Тонгда  
бизнинг кўксимииздан  
чиқиб келар у –

ўлмасак...

Тун ўтса бўлди.

Тонгда барибир  
чиқиб келар  
у.

Чунки  
кимдир тирик қолади-ку,  
қуёшни кўксига  
яшириб.

2007



\* \* \*

Аввал яшашга қўндим,  
кейин сўндингим,  
кейин ўлдим...

Кейин  
ўлим жонимга тегди,  
яна аста  
ҳаётга тўлдим.

Сўнг дунёга қадам ташладим,  
Илдизга айланиб яшадим.

Оқибат,  
кўкардим,  
гулладим,  
яшнадим!..

Бу дунёда неча бор  
умрни қайтадан бошладим!

Қайта айтай,  
доим обод бўлганим йўқ,  
мудом шамол каби озод бўлганим йўқ,  
не синовлар кечган бошимдан:  
қулликдан ҳам ўтганман,  
кулликдан ҳам ўтганман,  
занжирларни узганим ҳам бор,  
эркин йўллар тузганим ҳам бор.

Хуллас,  
ҳар ондан дарс уқдим,  
куйладим,  
ёшлар тўқдим.

Гоҳ ўзимдан чиқдим,  
гоҳ ўзимга чўқдим.  
Кўрқдимми?  
Кўрқдим!

Тириклай  
ўлишдан  
кўрқдим.

2007





\* \* \*

Ойбарчин бағрида-ю  
Ойбарчинни излар  
Алпомиш.

— Қайдасан? —

ўқиради у.

Бахшиларнинг эти жимиirlар,  
дўмбирааларнинг  
торлари  
узилар чирсиллаб.

Достон  
тугаган эди-ку —  
яна нимани куйлаш мумкин?

Бойсунда яшар-у  
Бойсунни соғинар  
Алпомиш.

— Воҳ, элим! —

Оҳ урап.

Донг қотади Бойчибор.  
Неча бор, ахир,  
кишанларни узиш мумкин?  
Неча бор зиндан

қутулиб чиқилар?  
Неча бор?..

Алпомиш эса  
насиҳатни тингламайди:  
фақат “оҳ” урар,  
интилар,  
соғинчларда  
ўқириб йиглайди;  
ўтга-чўқقا уради ўзини –  
жони керакмасми унга!  
Умрида роҳат йўқ.  
Достон чидайдими  
бундай яшашга!..

Чунки у англайди –  
узлуксиз  
соғинмоқ шарт;

Чунки у англайди –  
ҳар онда  
зиндандан  
қутулмоқ зарур;

Чунки у англайди –  
умрнинг ҳар лаҳзасида  
Бойсунга етмоқ –  
керакдир...

2007





\* \* \*

Тўлиб кетдим.  
Тўлиб кетдим.  
Гарчи дунё  
Ишларига  
Кўниб кетдим.

Тўлиб кетдим.  
Тўлиб кетдим –  
Чинларимда,  
Мунгларимда,  
Сўлиб кетдим.

Тўлиб кетдим.  
Тўлиб кетдим –  
Давронларда,  
Замонларда  
Сўниб кетдим.

Тўлиб кетдим.  
Тўлиб кетдим –  
Айтай десам,  
Борим ёлғон  
Бўлиб кетдим.

Тўлиб кетдим.  
Тўлиб кетдим:  
Билолмайман,  
Борманми ё  
Ўлиб кетдим.

2008

233



\* \* \*

Бу тош билан  
умр бўйи  
дардлашдим.

Суҳбатимиз –  
чексиз.

Суҳбатлашганимиз сайин –  
неча бор майсага айландик,  
неча бор қушга;  
туш ҳам бўлдик (саноқсиз марта),  
ўсдик дарахт каби  
булут монанд учдик;  
Суҳбатлашганимиз сайин –  
гуллар қиёфасида  
кўнглимиз очилди,  
Асир тушдик кузлика:  
мангуликлар тўлди хазонимизга!  
Дард тошди:  
ҳар қатрасида  
қанчалар яралдик,  
қанчалар ўлдик!..

Бир-биримизни  
кашф этганимиз сайин  
рўй бераверди шундай мўъжизалар.

Бир-биримизни  
кашф этганимиз сайин –

у қолишини  
англади  
бу дунёда,  
мен кетишими.

Ҳозир эса уқдираяпмиз  
бир-бири мизга:  
— Видо оніда  
сен яна тошга айлан!  
— Сен яна одамга...

Негадир ўйляяпмиз:  
айрилиқça  
фақат тош  
ва фақат одам  
чидайди деб...

2008





\* \* \*

Негадир бу дунёни  
кўргим келади озод.  
Негадир чин сўзлардан  
излайман фақат нажот.

Негадир юрак бериб,  
тошга тилайман рағбат.  
Негадир тупроқ билан  
кургим келади суҳбат.

Негадир инсон бахтга  
муносиб деб ўйлайман.  
Негадир занжирбандман,  
негадир ҳур куйлайман.

Негадир ўзни кечиб,  
Ўзимни изласам ҳам –  
Умримни барча билан  
кўргим келади баҳам.

2007





\* \* \*

Сочларимга оқ тушди,  
Кўзларимдан кетди нур...  
Ҳар сўзимдан “оҳ” тушди,  
Илкимга минг чоҳ тушди –  
Руҳим ўлғанда мастиур.

Фалва бозор дунёга  
Умрни этаркан харж:  
Чоҳлар билан пиёда  
Жанглар қилдим, зиёда  
Руҳимда узлуксиз авж.

“Ҳақ!” дедим – таянч ўзда! –  
Оллоҳдан таъсир олдим.  
Илҳом етган бир рўзда,  
Ҳеч бўлмаса, бир сўзда –  
Чоҳларни асир олдим.

Гарчи йўқдир гувоҳлар,  
Ҳақиқатни айтдим шан.  
Аммо баттол гумроҳлар,  
Илкимда асир чоҳлар –  
Чоҳлигин олмади тан.

Сўрадим одамлардан –  
Улар турмушдан караҳт  
Дедилар: – Ахир, бекам  
Кунимиз ўтди, укам...  
Зиндан бўлса ҳам шу – баҳт!..

Жавобни қўрдимми эп?  
Тилимда ҳалол калом –  
Эркин ёзиб, ҳалол еб,  
Шу бебаҳт одамлар деб,  
Куйлашда этдим давом!

Нима учун? Нима гап?  
Йўқдир асло сабаби –  
Худди ёзгандай Машраб,  
Худди Фарогий монанд,  
Худди Навоий каби...

2008





## ЮРАК ТҮЛГАН КУН

\* \* \*

Ой ботди.  
Тун қотди –  
Зулумот.

Тун аро,  
Мунг аро  
Бу ҳаёт.

Бесабр,  
Бекадр  
Түлғондим.

Ҳар заррам  
Минг карра  
Уйғонди.

Нима бу?  
Рухда-ку  
Күз ёши!..

Сени мен  
Яратдим,  
Күёшим.

*1999*



\* \* \*

Тўлди юрак...  
Тўлди юрак –  
тўлмоқдан сўнг  
тўкилмоқ бор.

Жонинг ҳалак –  
тўкил, юрак,  
дунёга сен  
ишқдан изҳор.

Ёмғирдай ёғ!  
Юракка кўп  
дунё зордир,  
дунё зордир.

Ёмғирдай ёғ –  
ҳар томчингда  
маним умид-  
орзум бордир.

Тўкил, юрак,  
Тўкил, юрак!..  
Тўкилмоғинг  
сенинг создир.

Бу дунёга  
тўкилгувчи  
юрак оздир...  
Юрак оздир.

1999

240



\* \* \*

Мисли қүёш  
юрак – талош  
Юрактарош  
бу кунларда.

Бу кунларда  
минг мунгларга,  
минг тунларга –  
дучор бўлдим  
(Ҳеч сабабсиз  
учар бўлдим,  
ва – сабабли –  
ўчар бўлдим).

Бу кунларда  
ғамлар – ханжар,  
ғамлар – янчар –  
бу кунларда.

Бу кунларда  
ўртанди жон,  
тўлғонди жон –  
жим турмоқقا  
ўрганди жон  
бу кунларда.

Нақдан ўзга  
дилни сўзга  
солгани йўқ  
бу кунларда.

Юрагимда...  
Юрагимда  
Юраксиз жой  
қолгани йўқ  
бу кунларда.

1999





\* \* \*

Ялангоёқ шамол чопди,  
Кузги даштни оралаб –  
Товонини нохос тикан  
Қўймасмикан яралаб?

Бола шамол, нодон шамол  
Дараларга бурилди.  
Унда мангу қолмасмикан  
Қояларга урилиб?

Гаштли шамол, шаштли шамол  
Тоғ томонга солди йўл.  
Тоғ юксакдир, ўтолмагай,  
Чўнг қоядир ўнг-у сўл.

Энди тоғни енгиш учун  
Тўфон бўласан, шамол.  
Қояларни емирасан –  
Тоғлар қолади беҳол.

Увлашингни бош эгганча  
Кекса дунё тинглайди.  
«Яна битта шамолимдан  
Айрилдим», деб йифлайди.

1999



\* \* \*

Рұхим суриб келди шиддатға –  
Харакатта зич тұлди жисмим:  
Бир силкиниб етдім қисматта!..  
Қисматсизлик, мен сендан ўтдим.

Қандай яхши, азиз қисматим,  
Сендан күрган талофатларим:  
Фақат ўзим чеккан захматим,  
Ўзим тортган маломатларим.

Ёмон бокди қай тубан, юрак,  
Қачон унга «ўзни тенг» дедим?  
Гоҳ тұхтаган, гоҳ оққан юксак –  
Юксаклик... Барибир мен эдим.

1999





\* \* \*

Юракни тош босди –  
Күш қўнди тошга.  
Сайраши – жон аччиқ,  
Қўшиғи – ёшдан.

Юракни тоғ босди –  
Тоғда ўсди гул.  
Тоғнинг дардин ёзди  
Чексизликка ул.

Дунё дилни босди –  
Руҳ отди илдиз.  
Дунёни кўтардим  
Ўша дам илкис...

1999





## УЙСИЗ ОДАМ

Деразанинг пардаси – рангин,  
Деразадан кулгу келар шаҳд.  
Одам борми? Кўчага боққин!  
Бир кўрайин – қандай бўлар баҳт!  
Деразадан оқар мусиқа,  
Қизғин гуринг, роҳатбахш кулгу.  
Кўчаларда чарчоқ кўзимга  
Баҳт деган дўст тушмади, ёху!  
Чарақлайсиз – тунда тириксиз,  
Деразалар, нечун надомат? –  
Жавоб беринг, қайси бирингиз  
Мендан кечган тансиқ саодат.  
О, кўлкалар уй ичра ғамкор –  
«Оҳ» сасими юракни эзди,  
Қай бирингиз, тун бўйи бедор,  
Уйни ташлаб ортимдан кезди?

1999





\* \* \*

Тоғларни – тун ичра – булут ямлаган,  
Олис дала-даштни босган қоронғу.  
Сүхбат юракларни очиб ташлаган –  
Нақадар чиройли юракмиз, ёху!

Қара, тоғлар ўсар – туртиб осмонни,  
Зулматни ўпириб туғилар юлдуз.  
Англаймиз, қайдадир диллар илҳомнинг  
Мавжидан руҳ ясар – дунёга илдиз.

Ҳолбуки, бир кеча оддий кечадир.  
Осмони – беюлдуз, зулмати – улкан.  
Фақат ўртамизда сұхбат кечадир,  
Фақат ўртамизда липиллар гулхан.

1999





\* \* \*

Дунёнинг кўзига боқаман тикка.  
Нигоҳим ухшайди яланғоч тифга.

Ёвлик одатини дунё бузмайди –  
У ҳам милтиқ кўзин мендан узмайди.

Узмайди!.. Пойлайди кундуз-у кеча,  
Менинг ҳам бу умрим уйқусиз кечар.

Англайман, кунларим бўлади абас,  
Кўзимни юмсан бас... Кўзни юмсан бас...

Сен нечун ҳадикда бедорсан, дунё,  
Мен, ахир, инсонман, тепамда Оллоҳ!..

Дунё хавотирда бир зум тинмайди,  
Кўзини юммайди... Бирпас юммайди...

1999



---



## ҚЎРҚИНЧЛИ ТУШ

Тонгдамас – кечлиқда – жуда кечлиқда –  
Жондан жудолигда... Вужуд – ҳечлиқда –  
Рұхим чексиз судзи сокин тинчликда,  
Худди фариштанинг нафаси каби.  
Озодликка түлган бу ҳур гучликда  
Менга ҳадя этди бу ҳолни наби...

Кўзим йўқ эди-ю – кўрар эдим мен,  
Тилим йўқ эди-ю – бор эди сўзим.  
Кулиб: «Қайда қолди шаклим?» – дедим мен,  
Фақат маъно билан тўлгандим ўзим.  
Аммо Ёлғон дунга қарап эдим мен,  
Чин дунё четидан бўйнимни чўзиб.

“ – Ёлғончи! Чин сўзим сенда қолмади.  
Алладинг, алдоқдан тилинг толмади,  
Сенда ҳақ сўз ёнди, ёлғон ёнмади...” –  
Унга неларнидир қиласдим даъво...  
Ва шунда руҳимда руҳлик қолмади,  
Ва шунда зиллашиб ўзгарди ҳаво.

Кўзидан маъюслик жим-жит оқарди,  
Уфқининг четидан менга боқарди  
Ўтган дун. Туриши – кўникув ҳадик.  
Мен эса уфқ оша бақирап эдим,  
Ҳақни гувоҳликка чақирап эдим,  
Ва ёлғон кўзига боқолмасдим тик...



\* \* \*

Дунё оғусини тутмади ошкор,  
Пинҳон зугум қилди... Зўриқиб ичдим.  
Жончиқар оғриққа айлади дучор,  
Оқди қўшиқдарё – эриган жисмим.  
Асли қурбон бўлмоқ бизга қисматдир...  
Нимадан сиқилдинг – заҳилдир рўйинг?  
Дорга осмоқ бўлсанг – бўйим баланддир,  
Кўкка осмоқ бўлсанг – етмайди бўйинг...

1998

\* \* \*

Қанчалар ўлдирдим ўзимни,  
Қанчалар ўзимни яратдим –  
Нималар ўсмоқда – чўзилиб –  
Бу маним ҳеч битмас ярамдин?

Қанчалар йиғдим мен ўзимни,  
Қанчалар ўзимдан сочилдим?  
Ботиндан бор этиб сўзимни,  
Қанчалар ўзимдан очилдим?

Умрдан бораман... аямай,  
Йўлларга ситаман ўзимни –  
Бу вужуд тобора камаяр,  
Бу руҳим тобора тўзимли...

1998



\* \* \*

Бу илон қошингда тебратади бош,  
Пинҳонми танида ваҳима қуйи?  
Қўрқинчли бу сеҳр бўлмайди одош,  
Ҳатто эголмайсан бошингни қуйи.  
Кўзингга тикилган — кўзи чақнайди,  
Ханжардай ялтирас ҳар дамда тили.  
Кўксингда — сўл томон — ногоҳ яхлайди,  
Ваҳима оҳиста ўтади тилиб.  
Бир онлик эмас бу... Йиллик ҳам эмас,  
Мангуга турмоқчи бу илон шундоқ —  
Сени қўрқинч ичра қилгунча алас,  
Вужуд-у руҳингни этгунча тупроқ.  
Мен ҳам бу илоннинг аврашидаман,  
Неча йил кўзимиз бир-бирин пойлар.  
Даҳшатли қўрқинчнинг қамрашидаман,  
Оёғ-у қўлимни бир титроқ бойлар.  
— Илон, ҳай!.. Жонимни боғлаган илон!  
Бу азоб ўйиндан топмадим маъни!..  
— Инсон, бу қўрқинчдан қутулмоқ осон,  
Кўзимдан кўзингни олсанг бўлгани...

Кўзингдан кўзимни олсам бўлгани,  
Кўзингдан кўзимни олсам бўлгани!..  
Бу жуда осондир, бу жуда осон —  
Дунёдан ўзимни олсам бўлгани...

1998



\* \* \*

Нақадар озоддир бу эркин осмон,  
Мангу шамолларга руҳи юзма-юз...  
Аммо қай ваҳмадан чўчиб ногаҳон,  
Ўққа учрагандай учди бир юлдуз.

Мовий эркинликда не сир яширин?  
Не кучга бергиси келмай измини –  
Ўзини борлиқдан отди ошириб,  
Поралаб ташлади юлдуз жисмини?

Ерда осмон каби эркин эдим мен,  
Бу жумбоқ аҳволга ўттаниб боқдим,  
Кўкка қарадим-у ҳайрон дедим мен:  
– Юлдуз! Не сабабдан ўзингни ёқдинг!

Ёниб битган еди у юлдуз, аммо  
Етди, юрагимга етди шовури.  
Англаб ололмадим – бир титкин садо  
Ўтди вужудимни шундоқ қовуриб.

Ўқсиниб юлдузнинг ҳолини сездим:  
Чархи кажрафтордир уни доғлаган –  
Барча юлдузларни қандайдир тезлик,  
Қандайдир чизиққа маҳкам боғлаган.

Ерда осмон каби эркин эдим мен,  
Эркимга оҳиста синовчан боқдим:  
– Сенинг ташвишингни мудом едим мен,  
Айт, қанча юлдузни кўксимда ёқдинг?

Юлдузлар айланди кўнглим ичида,  
Танлари минг турфа рангга чўлғониб.  
Барчаси бир мовий баҳтнинг пинжида,  
Шавқнинг эпкинида турад тўлғониб.

Аммо менда эди маъмур ихтиёр!  
Шул сабаб лабимдан бу савол учди:  
— Менинг ҳурлигимдан ким бўлди безор —  
Менинг юрагимдан қай юлдуз учди?

Эркимга бу савол туйилди эриш,  
Мен-чи саволларни этмадим канда:  
— Мумкинми барчага бир хил баҳт бериш —  
Менинг юрагимда, ҳеч бўлмагандা?

Ҳурлигим бир ёмон қаради — сездим...  
Шунда юлдуз кўрдим — дили доғланган.  
У юлдуз — юракка — менга шарт тезлик —  
Зарур айланишда маҳкам боғланган.

Қарасам, қалбимда бўшлиқлар бисёр!  
Ёруғ юлдузларнинг куллари эзгин...  
Учган! Аниқ учган! Юлдузлар афгор  
Учгандир — менда ҳам қафасни сезиб.

Ахир, мен эрк эдим ерда — муқаррап —  
Мана, бу ҳурликни севган асрда...  
Кўнглим қафасида аммо ким йиглар,  
Эрк учун олдимми уни асирга?

Энди ўзим билан суҳбат бошқача.  
Саволлар ичида ўртанар юрак —  
Руҳлар титраганча, кўзлар ёшгача...  
— Наҳот, эрк учун ҳам эрксизлик керак?

1998

\* \* \*

Дилимга бир соғинч тушди беовоз –  
Лаҳзада унутдим сўл-у соғимни.  
Юрагим сесканди, энтиқди нохос –  
Қайси нотаниш дўст мени соғинди.

Ошкор соғинишнинг ўтгандир фасли,  
Мехрим – ботинликда, манзилим – четда.  
Менга – адо айлаб ғойиблик расмин –  
Қайси юраклининг юраги етди.

Ёлғизлик ғамига интиқлик ҳамроҳ –  
Воҳ, жоним қоврилди тиниклигига! –  
Бирор соғинганин мен сездим холос  
Бугунги ёнишнинг илиқлигидан.

Юракни очгани дўсти ғариф бер,  
Энди илҳомимнинг йўриғи – сукут.  
Мен ўзим ўзимга пичирлайман шеър,  
Пинҳон садоларга тўлди бу вужуд.

Кўзимни юмаман. Сезади дилим  
Менинг азобимдан яралган байтни –  
Ҳамма фалак сендан чўчиди, гулим –  
Ўзимнинг соғинчим – ўзимга қайтдинг.

1998



\* \* \*

Туннинг тасвирига юрагим эпсиз,  
Қоғозга кўчирсам – ўчгайдир ранги.  
Осмонда тўзғиган юлдузлар – чексиз  
Мангалик қоврилган оловнинг чанги.  
Қарайман... Тиralар манглайимга тун,  
Шундоқ ҳужраларнинг кирар қатига!  
Бир қудрат – бешафқат, ханжарсўз зуфум  
Қисматимни қўшиб тунга чатиган.  
Эй, умид! Руҳимга бағишла қанот!  
Бир тизим нур, ана, кўнгилнинг роҳи.  
Кеча – кундуздан ҳам – илоҳий ижод –  
Беэшик қолгандай дунёнинг чоҳи.  
Бошимда айланар сир-синоатлар,  
Зулматнинг қаърида чексизлик ўсар.  
Тутди жон-у жисмим шан муноҗатлар –  
Фуссага тўлганман! Бўлмайди бўшаб...  
О! Замин юзидан чекингин, риё!  
Ахир, узилмоқда илдизим тандан!..  
Ахир, қандай ухлай? –  
Кўз юмсан гўё  
Ҳамма юлдуз учиб кетадигандай...

1997



---



## ШАМОЛЛИ КУН

Бу кун шамоллидир. Терак шовуллар.  
Ўрикнинг меваси тўкилар тўп-тўп.  
Деразага боқиб хуноб ҳокимлар –  
Кўчада шиорнинг йиқилгани кўп.  
Қай лашкар устида ҳилпираб борар,  
Қай ботир дастида шатирлар байроқ?  
Дунё бешигини тебратиб қолар –  
Шамол ўз касбини англайди бу чоқ.  
Кўчани супурар, яна хас сочар,  
Ҳавони тозалаб, пуркайди хазон.  
Лаҳзада тарихнинг маъносин очар –  
Худди шу тартибда ўзгарап даврон.  
Худди шу тартибда шамол кетар шаҳд,  
Ғуборли кунини бошларга ёзиб...  
Мен яна ўзимни изламогим шарт,  
Қайга учиб бордим – топмоғим лозим.

1998



---

\* \* \*

Яна дил қақради.  
Сўзни соғиндим.  
Чидадим.  
Ҳасратда ўртади сабр.  
“Жонимни ол”, дедим,  
Мудом ўртандим.  
Аммо бирор сўзни олмадим асир.  
Лабларингнинг нега ранги ўчгандир,  
Қалбингни ўртади қай нохос баёт?  
Сўзларим қалбингга кўчса, кўчгандир,  
Айтдим-ку, озоддир,  
Сўзларим озод...

1996





\* \* \*

Ботин сўз қолмади. Сўзлар айтилди.  
Гуллаган сўзларда маст бўлди бўғзим.  
Дунёнинг четига бориб қайтилди,  
Фақат юрак билан лим тўлди кўксим.

Мен бугун Анҳордай тиниқ оқаман.  
Саратон дунёни кўраман ошкор.  
Ошкор тўрт тарафга тўниб боқаман –  
Улардан сирли сўз келмоғи душвор.

Менинг тўрт тарафим – ошкора иқбол –  
Алвидо! О, ҳануз юрагим шеърда...  
Сўз излаб фалакка чиққум эҳтимол,  
Эҳтимол сўз излаб кирапман ерга...

1996





\* \* \*

Мажнунтол соchlари мажнун осилди,  
Анҳорлар оромбахш сувга тўлдилар.  
Менинг юрагимда тошқин босилди,  
Дунё, соғинчларинг тамом ўлдилар.

Бекинди боғларнинг қўйнига салқин,  
Ухлади дараҳтлар тагида соя.  
Ёзнинг кунларига чўзилдим ҳорғин –  
Оқибат топгандай улкан ниҳоя.

Аммо куйламайман... Куйлашдан қутқаз,  
Қалбни саратонда айлантири хасга! –  
Келар кунлар билан кўп курашдим... Бас,  
Ўтган кунлар билан тушмайман баҳсга.

1996





\* \* \*

Тамошабин зиналардан тушиб келар.  
Атрофда ўзга ҳаёт ёлқини.  
Юзларда шафақ.  
Кўзлар қизарган. Қанча одам  
ҳаётини таниб  
йифлади. Қанча одам  
энди бехато яшамоқчи. Қанча одам  
қайтадан қурмоқчи  
ўз ҳаётини.

Саҳна ортида еса  
артистлар  
саҳна лиbosларини ҳорғин ечарлар...

1996

\* \* \*

Дараҳтлар гуллаган. Арилар ухлар.  
Ҳаёт маст жамланган гуллар жомида.  
Шамол йўқ. Учаётган гулбарглар тўхтар –  
Тортиш кучи йўқдир ернинг онгида.

Вужудим – муаллақ. Вужудим – ҳаво.  
Ўзни йиғмоқ учун зўриқмайман қўп.  
Юрмаслик – раводир, учмаслик –раво,  
Ҳатто осмоннинг ҳам тортиш кучи йўқ.

1996



\* \* \*

Сен –  
Азроилни алдаган  
Афандининг  
ўзи.

“Эртага кел” дейсан  
Ҳақиқатга.

Қаламлар қайрайсан эрта учун,  
Нутқлар тўқийсан.  
Эртадаги жасоратингдан чўчиб,  
қочиб қолар  
бечора уйқунг.  
Тонгни оттирасан бесабр...

“Эртага...” дейсан яна тонгда.

Юрагинг зирқирап.  
Ичингда оломон –  
мажлис қуради.  
Тонггача қарор йўқ.

“Эртага...”

Ўзингни қийнама.

Жонинг соғ бўлсин!

Сен асли фақат шуни истаган эдинг.



\* \* \*

Эрксизликдан кичкинадир эрк,  
Мудом мўъжаз оромдан исён.  
Озод одам, куйма, озроқ чек!  
Эркин одам, ўйланма мудом!  
Қандай савол бердинг оламга –  
Бугунги эрк – эртаги қафас?..  
Тўйиб ҳаво олган бадандан  
Келмадими бўғзингга нафас?  
О, юракда оқмаётган эрк!  
О, сўзларда такрор озодлик! –  
Ўртамиизда қандай ёвлик берк?  
Ўртамиизда даҳшатли ётлик.  
Эрксизликдан кичкинадир эрк –  
Бу ҳақ қалом... Ўртанар дилим...  
Эрксизликдан эрк кучсиздир деб  
Рост айтмоққа айланмас тилим.

1996





\* \* \*

Яшаб бўлмас, йўқ, бундан ортиқ!  
Қайда қувонч? Қаерда орзу?  
Мен – ғам учун беисбот мантиқ,  
Мен – армонга энг гўзал мавзу.

Шеърни эса ёздим. Васият  
Ҳар бир сўзга жойланди ўқдай.  
Юрагимда шундай вазият –  
Бу дунёга керагим йўқдай.

Умр эса кезар фаромуш.  
Гуллар қани? Кулгилар қани?  
Уни мендан айирди турмуш –  
Эшигига қарол қилгани.

Қаро ер-ку, о, ҳамиша тахт,  
Кучогига маҳкам тортгани!..  
Сўнгги сатр келар бешафқат,  
Аямасдан мени отгани.

Бу чин дамда қанча зил афсун –  
Қандай фоже дамларга қолдим?  
Кимнинг айби? Ахир, не учун  
Кетмоқдаман умримдан олдин?

Замонанинг фикри зиёда,  
Ечилмайди: макри – минг тутун.  
Умрим менсиз қолди дунёда  
Не учун?  
Не учун?  
Не учун?..

2007

263



\* \* \*

Кўшин каби довул бостириди –  
Пароканда тўлғонмоқда боғ.  
Дараҳтларни эсдан оғдирди,  
Чанг-тўзонли шиддат – беадоғ.

Кўр ҳаракат чопди суриниб –  
Меваларни тўқди – увлади.  
Бир тол – сўнгги онга урилиб –  
Бор бўйича ерга қулади.

О! Илдизлар бор-ку!.. Хайрият!  
Магар улар тутмаса маҳкам,  
Баҳс тушарди қайси бир дараҳт,  
Бу ҳаволаб босган сел билан.

Боғдан қайга кетардим бу чоғ?  
Юлинмоқда навдам-у баргим...  
Мени тутиб турибди бироқ,  
Ерга ботган илдизим – дардим.

Довул эса, кўксимга урап,  
Пешонамга отар залворин.  
Девор оша ҳилпираб борар  
Чанг-тўзоннинг йиртиқ чалвори!

Шартми шунча синамоқ, тақдир,  
Нечун чўчий телба шаҳдлардан?  
Кўкарганман уриниб, ахир,  
Ерга чўккан мангу дардлардан.

Гарчи барча баргларим учган,  
Гар тўфонда қомати долман:  
Фақат, фақат – илдизни қучган –  
Суқунатнинг олдида лолман.

2007





## НОХУШ КУН

Фалакда рўй берди қандай ҳодиса,  
Қайси кенгликларга юрагим боғлиқ? –  
Қайси фазоларни айлаб андиша –  
Менинг чап кўксимда қўзғолди оғриқ.  
Қай фоже юлдузнинг учқуниман мен,  
Қай юлдуз самодан ўзин ташлади?  
Қай ўчган ёруғлик мушкулиман мен? –  
Оғриқ миям бўйлаб тўлқин бошлади.  
Қандай дунёларга боғлиқдир жисмим,  
Қай юксак имога акс-у садоман,  
Қайси пардаларда йўқолди измим? –  
Тун-у кун инграган сўнгсиз сатоман.  
Эҳтимол бу оғриқ – беадад соғинч –  
Унут чексизликнинг интиқ мактуби.  
Мени рух бўлгин деб олисдан ёқиши,  
Интизор чақириш – келгин, маҳбубим!  
О, қандай гупирав томиримда қон!  
О, ширин жонимни забт этди зугум!  
Руҳ – аниқ – кўтарди вужудга исён,  
Уни тилка-пора этмоқлик учун.  
Нохуш кун! Хушлигинг бир менга аён!  
Кўзимга кўрсатиб вайронлигимни,  
Ёдимга туширдинг яна бу оқшом  
Менинг бу дунёда меҳмонлигимни.

1996



\* \* \*

Шу қум зарраси ҳам – дунёning акси,  
Унда ҳам жо эрур фано ва бақо.  
Қумнинг шамолдаги ноилож рақси  
Нимани эслатди? Ўзимними ё?  
Қисматнинг дастида – ўжар гунгликда –  
Қай буржда, эй зарра, этарсан сайр?  
Жон ато бўлурми? Ёхуд қумлиқда  
Дийдор кўришгунча хайрми?.. Хайр...  
Бу тофлар аҳдига қилмайди вафо,  
Бу дарё кетади – соҳилни ташлаб...  
Фақат қум зарраси унутмайди, о! –  
Учар – аҳдимизни чангала ушлаб.

1997

\* \* \*

Кўлга ўргатилган бўри бу – кучук,  
Қорни тўқ – сарқитнинг ҳар хили... Ялоқ...  
Собиқ бўри, қани думингни учи,  
Собиқ даҳшат, нега кесилган қулоқ?

Бўйнингда нишонлар – обрўйинг аъло,  
Ўзлигидан кечган шунча азизми?  
– Бўри! – деб чақирдим – қилмади парво,  
Ит! – дедим... Қаради... Ишонасизми?

1995

\* \* \*

Денгиз яна тўфон отди.  
Тўфонда не жоним ботди?  
Ким соҳилда ҳоргин ётди,  
Денгизга кетган не кема?

Фарқ бўлган не – ёшлигимми?  
Ё шеър билан дўстлигимми?..  
Айтмай хайр-хўшлигини  
Денгизга кетган не кема?

Соҳилдаман – ишонч отдим,  
Қайғу отдим, қувонч отдим.  
Иzlаридан қулоч отдим,  
Денгизга кетган не кема?

Қайда кема? – корим бордир.  
Келгунича зорим бордир.  
Йўғим бордир, борим бордир...  
Денгизга кетган не кема?

Сукунат танга тўлурму,  
Соҳилда жоним сўлурму?  
Ҳижрон ҳам мангу бўлурму –  
Денгизга кетган не кема?

1996



\* \* \*

Мангу арчазорнинг шундоқ четида,  
Мангу яшилликдан тинглаб мангу куй,  
Бир уйча яшарди тоғнинг бетида...  
Кўп бўлди, бормадим... Бормикан шу уй?  
Менинг бир хаёлкаш дўстим қурганди –  
Усмон келса, дея, чиқарар ҳордиқ...  
Бир кеча у уйда даврон сургандим,  
Бордай туйилганди дунёда борлиқ.  
Гулхан теграсига дўстлар бўлиб жам,  
Шодон чеҳраларда липиллаб шуъла,  
Суҳбат қургандилар мастона, бекам,  
Кимдир айтган эди бесёз ашула.  
Даралар тун билан тўлган эди лим,  
Чўққилар тутганди кифтин фалакка.  
Бир четда фақат уй турган эди жим,  
Ҳар бир лаҳзамизни туғиб юракка.  
Бир дардда куйламоқ нақадар осон,  
Эвоҳким, кўнгилда оғриқлар фужум.  
Ўша уй бормикан?.. Жўнасам шу он,  
Ичида – бекиниб – йиғламоқ учун?  
Борсам, о, албатта ёқади чироқ,  
Тоғлардан нарига ҳайдар ғанимни.  
Менинг ёшларимни артолмас, бироқ  
Ҳеч кимга айтмайди йиғлаганимни.  
Кетарда кўзимда порлайди ёлқин,  
Уй эса хатарда қотади у дам:  
– Мен-ку тоғлар билан Бойсунда қолдим,  
Тоғларсиз қайларга кетди бу одам?  
Оқибат умримда ҳувиллаган дашт –

Ёлғизлик! Руҳимга шамолингдан қуй!  
Кўнглимда тугамай худо берган гашт,  
Бориб тўкилайин – бормикан шу уй?  
Тоғлари қум бўлган дунга баҳсма-баҳс,  
Қумдай эзилмасдан, ҳар қисматга шай –  
Дўст қурган ул уйга етай-да, бесас  
Деворига бир дам ҳоргин сுяни...

1997



\* \* \*

Дала-дашт бошида оташли замон —  
Ташналик фасли-ю сомонлик рўзи...  
Кирнинг этагида момо саратон  
Қуюнни йигириар урчуқда — чўзиб.  
Қузғундай ўлтириар қуёш елкамда,  
Юрак ёрилдими, сўлга юз бурди?  
Ёнаётган даврон, сенинг ўлкангда  
Сендан ҳам кўпроқ мен оловда турдим.  
Саксовул соясин билди бошпана,  
Ҳатто шу илонлар мендан кўра қув.  
Нажот сўрамадим сендан, замона,  
Фақат сув сўрадим, бир пиёла сув.  
Истиқболга қолар сендан қанча шон,  
Илон ҳам керакми? Наҳот, илон ҳам...  
Сувингни лабга ҳам теккизмай, ишон,  
Илоннинг қошига қўйиб кетаман.

Аммо Аросатда даҳшатли сўроқ —  
Гуноҳим довруғи оламни тутди...  
— Бу одам кўп яхши эди-ю, бироқ  
Сув берган илони дунёни ютди.

1997



---



\* \* \*

Туғилиш-у ўлим аро  
Қисмат бизни кишанлади.  
«Бу кишандан бўлдим жудо»,  
Деса инсон – ишонмагин.

Бу дунёси беш кунликдир,  
Олтинчиси – завол, завол.  
Ўтар дунё, сенга қараб,  
Оқибатни айтдим ҳалол.

Ҳалол айтдим – шаштим ичра  
Йўқдир «оҳ»у «уҳ»им маним.  
– Айт, бир кунда неча аср  
Яшаш мумкин, руҳим маним?

1997





\* \* \*

Кўшиқقا кўчмаган одам одаммас.  
Кўчадан бораман – қўшиқлар гавжум:  
Бири – кўз ёш каби – янграйди бесас,  
Бири – жонни ўрттар сукутнинг авжи.  
Бир қўшиқ – елкаси мункайган нидо,  
Кўзлари чакнайди – бир қўшиқ – жасур.  
Бир наво – пошшодир, бир садо – гадо,  
Бир оҳанг – арузда, бир баёт – мансур!  
Инсоният – маним қўшиқзоримсан!  
Миллиард оҳангларда тентиган чолфу,  
Менинг юрагимга тинмай урилсанг,  
Куйламай бу юрак не қилсин, ёху!  
Ёху!.. Куйламоқдан тўхтатдинг нечун?  
Сен – кимсан? Қўшиқقا айланмаган зот?  
Сен қандай бечора – оҳангдан марҳум?  
Сен қандай руҳдирсан – ўлган бенажот?  
Жаллодлик қилдингми, дорлик қилдингми,  
Ёхуд адолатнинг буздинг тартибин? –  
Шул сабаб қўшиқقا торлик қилдингми,  
Мусиқа тарк этди умринг таркибин?  
Ўтган йўлларингда хиралашар нур,  
Ҳаёт салқи тортар, тўхтайди шамол.  
Даҳшати шундаки, борасан мағрур –  
Худди бу дунёнинг эгаси мисол.  
Борасан – ҳаётнинг равиши қулай,  
Сени ололмайди ҳеч ким ўртага –  
Чунки одамизод куйлар пайдар-пай,  
Турфа оҳангларда, турфа пардада!

Ҳаммани куйлатгим келди баробар,  
Аммо бу фикрдан руҳим яхлади,  
Кўшиқлар «уҳ» тортди бирдан саросар:  
– Худо бир сақлади! Худо сақлади...

1997





\* \* \*

Сочилган эмасдим,  
Мудом тўп эдим.  
Ўзимдан кўп эдим  
Аммо, кўп эдим.

Дунё сўлганида,  
Авжим бор эди.  
Диллар баҳра олсин –  
Мавжим бор эди.

Замон қуриганда,  
Тошиб турганман –  
Қўрқмай юрагимни  
Очиб турганман.

Гарчи йиртиқ-ямоқ  
Кавушли эдим,  
Барча жим қотганда,  
Товушли эдим.

Ўзимни унутиб,  
Бехуш куйладим –  
Бироннинг дардидан  
Кўпроқ сўйладим.

Ўзимдан ошдим мен,  
Ўзимдан тошдим...  
“Жувонмарг ўлар” деб  
Рақиб фол очди.

Ажалми? Жонимни  
Олар... Нечун баҳс!  
... Авжларим ўлимга  
Тегишли эмас.

2007





\* \* \*

Кўп давр-у давронлар  
Ўтди мендан ҳам,

Ўтган-кетганимга  
Боққаним сари –

Куёшим ботмаган  
Туйилар баъзан,

Баъзида ҳеч қачон  
Чиқмаган каби.

1996

\* \* \*

Кумуш шудринг тўшалди тонгга,  
Ер юзига –  
жунжиккан ҳаво.

Қонли ҳасрат отди  
осмонга –  
қуёшининг пойига  
дунё.

Кўкрагимдан  
узилди юрак,  
О, оғриқдан очилди  
кўзим:  
Қандай қилиб яшашим керак –  
Тилларимдан узилмас сўзим.

1996



\* \* \*

Мен охири ишондим,  
Очилиб тўлмоғимга,  
Кечишим – маст-у аласт,  
Кўнглим – шароб – ишондим.  
Мен охири ишондим,  
Вақт етиб ўлмоғимга,  
Оқибатим бир сиқим  
Хоки туроб – ишондим.

Ишондим – адоги йўқ  
Дун беадад яралган –  
Бу ишончдан руҳимнинг  
Асослари тузилди.  
Ишондим – оҳ, руҳимга  
Илоҳ нури ўралган –  
«Тангрим, ёлғизим...», дедим –  
Кўз ёшларим тизилди...

Қаерда яшаяпман?  
Кўзларим тиниб борар.  
Кулоғимда жаранглар  
Қай дунё овозлари?  
Бир сиқим хоким – ернинг  
Қаърига кириб борар,  
Фалакка ботиб борар  
Бир гала парвозларим.

2000

278



## ЭСГА ТУШГАН ШЕЪРЛАР

\* \* \*

Сен дединг: “Куз келди. Қарагин, хазон...”.  
Мен эса уқтиридим: ”Бу қотган зиё,  
Тунда ҳам нур ичра асрамоқчи жон,  
Сезиб қаҳратоннинг шарпасин дунё”.

Сен дединг: “Бечора, қарагин, ёмғир...”.  
Мен кулдим: “У менинг суюмли ошнам,  
Тунги суҳбатларда босигу оғир,  
Кундузги сайдарларда бебаҳо ҳамдам...”

Сен дединг: “Қарагин, чорбоғда туман,  
Наҳот, туман билан қоласан танҳо –  
Ёлғизликнинг иши қуламоқ тубан,  
Совуқда дилдираб тентирамоқ ё...”

Мен кулдим: “Туманмас, танидим, булут.  
Ахир, мен самонинг ерга энчиси.  
Бу унинг қаршимда баҳт каби дўниб,  
Илҳом келмоқда деб турган элчиси!”

Туманли боғларга термулиб бирдан  
Йиғладинг: “Наҳотки, куз келди?.. Хазон...”  
Бир сўз бор баҳорни қайтарадиган,  
Сенга айттолмайман, афсус, ҳеч қачон.



\* \* \*

Тагиқари чиқаман. Синар қатқалоқ,  
Самоват үлматтоҳ. Ёғмоқда заҳар.  
“Эрта кўришгунча хайр”, дейман, бироқ  
Биламан, висол йўқ мангуга қадар.

Сирни бой бермоқлик – ожизнинг иши,  
Овозим титрамас, туришим ўқтам.  
Куламан. Негадир мақтайман қишини,  
Овозим титрашин сезиб турсам ҳам.

Мунғайган елкангда рўмолинг оппоқ,  
Хайрият, кўзингни кеча яширди.  
Ёлғизим, аёзда қоляпсан, бироқ  
Баҳорли йилларга сени топширдим.

Сенинг гуноҳинг йўқ. Сен бир фаришта.  
Бир қошиқ қонимдан – гуноҳимдан кеч.  
“Эрта кўришгунча хайр” дейишга  
Ўзингни мажбур қил. “Тўхта”, дема ҳеч.

Қайдандир адашган бир тўлқин шамол  
Манглайга сочингни юборар сочиб.  
Кетсам – бир тўғри йўл топишим маҳол,  
Қайтсам – ҳамма йўлнинг эшиги очиқ.

Ширин ўй оғудир айрилиқ они,  
Танни бурдалайди бир ўксик алам.  
“Эрта кўришгунча хайр...” дейсан, жоним,  
Йифлайсан – силкитган қўлларинг билан.



\* \* \*

”Мени тинч қўй! Бор! Қабрга бор,  
Деразадан боқмагин, арвоҳ.  
Йўқлик қўйиб юбормас зинҳор,  
Энди қайтиб келолмассан, оҳ...

Куйма! Мени севар бу одам,  
Тун умримга тонглар тўшайди.  
Рости, унга дил бердим мен ҳам,  
Чунки сенга жуда ўхшайди,  
Қара, сенга жуда ўхшайди”.

Аёл аста пардани тортар,  
Тўшагида ухлар бир одам.  
Арвоҳ тунга ўзини отар  
Ва чирқираб йиғлайди бирдан.

Юзга босиб барги хазонни,  
Хўнграб-хўнграб йиғлайди, ёху!..  
Ғўлдирайди битта каломни:  
“Ахир, менга ўхшамайди-ку!  
Ахир, менга ўхшамайди-ку...”





\* \* \*

Уйингизни топиб бормасин хатлар,  
Ёмғирлар чертмасин деразангизни.  
Сизга йўлдош бўлсин энг улкан дардлар,  
Энг митти дардлар ҳам ўртасин сизни.

Сизни бўм-бўш хона ишга кузатсин,  
Фақат стол суҳбат қурсин сиз билан.  
Тунлар кўрпангизни зулмат тузатсин,  
Ўт билан яшаманг, яшанг муз билан.

Омадли йўлларнинг изини ташланг,  
Омадсиз йўлларда юринг қоқилиб.  
Мени соғингунча сиз шундай яшанг,  
Мен шундай яшаяпман, сизни соғиниб...

1985





## ЧЕ ГЕВАРА

Дүэлпараст қитъаларини  
Кучган шўрлик дунёга боқиб,  
Ёрит, дейман, зулмат қаърини,  
Юрагимни тутаман ёқиб.

Кум соҳилда шовуллар денгиз,  
Қаерларга бошлайсан, шамол?  
Менга қийин бўлади сенсиз,  
Яхши қолгин, баҳтиёр аёл!

Кемамизни суриб кетар ел,  
Уни ютар денгиз тумани.  
Сенга, азиз дунёга, Фидел,  
Қолдираман озод Кубани.

Чангалзорнинг тепасига ой,  
Аллақайдан чиқади балқиб.  
Судралишиб, уст-бошлари лойӣ,  
Келмоқдалар қонхўрлар полки.

Ёнимдаги жасур ўғлоннинг  
Кўксига ўқ бормоқда ботиб.  
Бу хўрланган дунёга шонли –  
Жасоратни қиласман тортиқ.

Ярадорман – ётибман беҳуш,  
Боқолмасдан ёруғ оламга.  
Жаллод етар – жилмаяр ноҳуш,  
Наганини тирав чаккамга.

Ёмғирлардан кўпчиган тупроқ,  
Жирканмасдан ичар қонимни.  
Она дунё, кун кўргин порлоқ,  
Бахш этарман сенга жонимни.

Кўпайди-ку, ахир, бағрингда,  
Бир толами, ним тола зиё...  
Яна нима берайин сенга,  
Озодликни суйдирган Дунё?

1978





## ЧУМОЛИ ҲАҚИДА НУТҚ

“Меҳнаткаш” деб олганинг унвон,  
Шоирларнинг фариб хаёли.  
Менинг эса, азалдан аён  
Нафратим бор сенга, чумоли.

Фивирлайсан, терга ботасан... —  
Тирикчилик солмас не кўйга?  
Нима бўлса уйга тортасан,  
Уйга... Уйга... Қоронғу уйга!

Бошинг узра баҳор қуёши  
Таратади бир ипак зиё.  
Ҳашоратлар ичра сен — тоши,  
Баҳорга ҳам боқмайсан қиё.

Уйга... Уйга... Тинмайсан бирпас,  
Югурасан... Сенингча, юҳо,  
Оғиз қалбни очиш учунмас,  
Овқат учун яралган гўё.

Уйга... Уйга... Жавдирап кўзинг,  
Уйингда-чи чириб ётар дон.  
Ҳаёлингда ўзинг, бир ўзинг,  
Ютмоқчисан дунёни тамом.

“А” дедингми, токи “Ҳ”тча  
Ошкор айтмоқ замони етди.  
Биз ҳаммани таниб бўлгунча  
Чумолилар кўпайиб кетди.

Чорсуни-ку қўйинг (у — бозор,  
Ўйнар савдо ашуласига),

Чумолилар бормоқда қатор  
Идоралар машинасида.

Оғринишар – “чумоли” деманг,  
(– Ҳатто шоир бўлсанг ҳам жим тур!)  
Ғазаб билан улар солса чанг,  
“Қарс” синади ҳақиқат қурғур”.

Пештахтага бири ёнбошлаб,  
Бошчасини қувноқ қашийди.  
Бири эса гул каби яшнаб,  
Фарзандига диплом ташийди.

Бири бизнинг ишхонамиизда –  
Ерга жами оёғин тираб,  
Мансабини тортгани-тортган,  
Зўриққандан шўрлик қалтираб.

Бири эса: “Пахтакор халқим...  
Тасанно... ” деб тўлдирап шеърин.  
Унга халқи керакмас, балки  
Бир нишонми, мукофот беринг.

Ўраб олди махлуқлар чиндан,  
Бузиб орнинг чегарасини,  
Ҳатто она Озодлик айтган  
Васиятлар тегарасини.

Ҳаммасини топиб келиб, энг  
Олий жазо бермоқ хаёли...  
Ўйлаб қолдим – шеър ўлдирап кенг,  
Мана, ёздим: “Сизлар – чумоли!..”

Тугаяпти шеърим. Кетаман.  
Узр, жоним бўғзимга етди.  
Чумолини ўйлаб туринг, мен  
Ниначини кўргани кетдим.

1979



## **УРУЩДАН ЎТТИЗ ЙИЛ КЕЙИН ЁЗИЛГАН МАРСИЯ**

Момомнинг – ҳали у ўттиз ёш жувон –  
Қучоғи йифи ва нурга тўлади.

Момо, шу чақалоқ – шу бир парча жон  
Кирк бешда Берлинга бориб ўлади.

Үшанды сиз ўроқ ўрасыз йиғлаб,  
Күк рүмөл ўрайсиз оқ сочли бошга.  
(— Болам, қайтмайсанми додимни тинглаб,  
Болам, кетиб қолдинг ўн саккыз ёшда!).

Тинмайсиз – фүссани тинмаган енгар,  
"Воҳ, болам!.." кўкларга етар оҳингиз.  
Куёш чиқар... Ботар... Кун ўтар... Ўтар...  
Туманлар ичида бўлар роҳингиз.

Хеч ким сүз очмайди шаҳид ҳақида –  
Сиз ўчоқ бошида йиғлайсиз пинҳон.  
Хаёлда – ям-яшил дарахт тагида,  
Қор ва қон устида ётар бир ўғлон.

Норбай? - Қандай йигит еди у Норбай?  
Күрикда айтганди мүйсафид дүхтири:  
- Қолавер, уруш ҳам тугар, ҳойнахой,  
Ёш бола, сенсиз ҳам ўлганлар күпдир...

Норбой? - Қандай йигит еди у Норбой?  
Йўқ, у чекинмади имондан тониб:  
— Сиз Ватан хоини экансиз, бобой, —  
Деганди разабдан кўзлари ёниб.

Чол фамгин кулганди. Кетганди ўғлон,  
Хувуллаб қолганди Бойсун боғлари...

Моможон, қийналиб ўйлайман — ёмон  
Дилларни тарк этса уруш доғлари.

Номаълум аскарнинг мозори. Мана,  
Гул қўйдим. Бир умр ҳурматим унга.  
”Унутдинг”, деб, момо, қилманг кўп таъна,  
Сизнинг қабрингиз ҳам, биламан, шунда.

1975





## САМАРҚАНД БҮЙЛАБ ТУНГИ САЙР

*Хуршид Давронга*

Кўчаларингни кезаман.  
Саройларингда  
базмлар тинган.  
Гумбазларинг  
қайси момомнинг  
тўлиқдан кўкраги –  
Кимни соғинар бу кўкраклар  
сутга тўлиб?

Осмон,  
кўлинг бўлса,  
chanгаллаб кўр-чи,  
Нималар деб шовуллар  
панжаларинг орасидан  
оқадиган сут?

Мен эса,  
тамшаниб нидо қиласман:  
– Самарқанд, илдизинг қаерда?

Кечангни чироқлар парчалаб ташлаган,  
Тун билан нур ўртасида  
узун арвоҳлар,  
Миноралар кетиб борар  
келажак сари.

Баъзан  
оига боқиб тўхтаб  
қолишар  
(АЗон саси урулдими қулоқларига?)

Зиналарингдан  
чопонига ўралган  
сўфи эмас,  
Мен ўрлаб бораяпман  
кўнгил тоқига  
Ва ерга боқиб нотинч шивирлайман:  
— Самарқанд, илдизинг қаерда?

Мадор бўлгин энди умидларимга,  
Менинг тўрт минг йиллик боғим!  
Бир япрогингман —  
йўқотгим келмайди  
илдизларимни.

Ана, осмоннинг қурбони, шаҳид расадхона...  
Ана, тарихнинг кўмилган бешиги — Афросиёб...  
Неча аср бўлди ўшанга?  
Тупроқ, қани, ёрил!...  
— Самарқанд, илдизинг қаерда?

Юлдузлар орасида келажак йўли.  
Замон поездини,  
қалбим, ҳормай торт!  
Умид вагонига  
боболар руҳини,  
қайғу-аламини,  
шавкат-шонини,  
ушалмаган орзусини орт!

Бу кимлар?  
Қайдаман,  
Регистон, сенми?  
Нечун сенга келсам,  
кўксимни тўлдирап жумлаи жаҳон?  
Балки анов мовий гумбаз тагида ётган  
Буюк Темур  
армонининг  
шамолидир бу?

Ер қаъридан эса тинмай овозлар тараалар:

- Мен! – дейди (Спитамен, сенми?),
- Мен! – дейди (Улугбек, сенми?),
- Биз! – дейди гувуллаб бир лашкар –  
келажакка эргашиб келар  
сарбадорлар.
- Самарқанд, илдизинг...  
Савол ортиқча!

Теграмда

мен билан ўйланиб,

мен билан қийналиб,

Илдизга айланиб борар бир кеча.

1981





\* \* \*

Қақнус, сенинг учишинг баланд,  
Қанотингда асрлар юки.  
Бир кун сенга бермайдими панд,  
Патингдаги замонлар юқи?

Саволимга куласан, эй, қуш,  
Сайрашингда мангут тантана.  
Ва гуруллаб ёнасан туйқус –  
Тириласан муз кулдан яна.

Сен-чи, нега зим-зим титрайсан,  
Чорлайсанми муз бўл деб юрак?  
Туғилмоқни билдим – қўрқмайман,  
Туғилиш – бу ёнмоқлик, демак.

1981

## ДОВУЛ

Нега газабланар бу довул – бадбахт,  
Шиддат лашкарини шаҳарга ташлар?  
Илдизин сууриб югурап дараҳт,  
Кўчалар лентадай ҳилпирай бошлар.

Телба югураман мен довул аро,  
Шуурим титилар, дилим порадир...  
Қарайман – ёвузлик тураг бепарво,  
Қарайман – яхшилик учиг борадир.

1982



## ВАН ГОГ ҲАҚИДА ҲИКОЯ

Ташқарига қара,  
“севаман” деб шивирлар қуёш нурлари  
япроқлар қулогига.  
(Ичкарида хотининг тақдирини қарғар).  
Ташқарига қара,  
ҳовлида кезиб юрибди баҳор ва чумчуқлар.  
(Ичкарида – стол устида хат:  
“Олган қарзингизни тўлаб қўйсангиз!”).  
Ташқарига қара,  
Баҳор ҳавосига юзини босиб,  
беланчак учмоқда эрка майсалар.  
(Ичкарида мувозанатини йўқотгандай қийшайиб  
турар,  
уч қишдан омон қолган меҳнаткаш ботинканг).  
Ташқарига қара,  
ташқарига!..  
(Ичкарини елканг билан ҳам кўрасан...).

1977





## БОЙСУН ҚИРЛАРИДА...

*Бу шеър синфдошим Қаюмнинг хотирасига бағишиланади.  
Қаюм иккаламиз мактаб саҳнасида қўшиқ айтардик.*

Бойсун қирларида бир ўзим кездим.  
Куз эди. Дарапар туманни қучган.  
Аввал эшитгандим, ушбу дам сездим –  
Менинг бир дўстимнинг чироғи ўчган.

Осмонга тикилдим хаёлим оғиб –  
Бир парчаси булут, бир парчаси кўк...  
Вақт деган шунча тез кетдими оқиб,  
Менинг ёнимда ҳам энди бирор йўқ.

Тошларга термилдим юрагим тўлиб,  
Йўқ, улар дардини менга айтмайди.  
Ҳатто, ҳўв, газага бир лаҳза қўниб,  
Илкис учуб кетган қушлар қайтмайди.

Дўстим, қай қўшиқни айтмоқчи эдик?  
Саволим тинглар-у сесканмас замин...  
Мен куйлай бошладим ногоҳ туриб тик,  
Ўзимнинг дардим-у дўстимнинг фамин.

Елкамга оҳиста кафтин қўйди тун.  
Ўйладим: куйламоқ тобора қийин –  
Мен бугун куйладим иккимиз учун...  
Эртага... Индинга... Кейин-чи?.. Кейин...

Бойсун қирларида бир ўзим кездим...

1978



\* \* \*

Унинг қўллари қалтираб пул санайди,  
ёлғон гапиради лаблари,  
оёғи фақат бозорга боради,  
бозордан – уйга...

Бегона ёстиқда  
бегона хотиннинг  
қўнғир-қўнғир соchlари ёнида ётади,  
устарада қирилган  
тап-тақир боши.

Кўзлари фақат “ўзидан катта”ни танийди,  
“ўзидан катта”нинг машинасини,  
бола-чақасини,  
қариндош-уруфини,  
ҳатто кучугини...

Бели ҳам гаройиб –  
унинг овози майин тортса,  
биров билан суҳбатда –  
букилгани-букилган.

Кўкраги белидан ҳам ўтади –  
хўжаси мағрур бош силкиса  
бировнинг саломига,

шундай кериладики,  
шундай кериладики,  
кўринмай кетади  
устарада қирилган тап-тақир бош  
ва бошнинг устидаги  
юз сўмлик дўппи.

Кўкрагида бўлса юраги...  
Юраги...  
Юраги... Қайда?

Хукмингга бош эгиб турибман-ку жим,  
Қайси айбим учун этмайсан карам?..  
Худойим, мен сенга нима қилгандим,  
Нечун хурмат қиласар мени бу одам?

1979



---



## ХАСИС

Кузнинг сўнгги куни.  
Ерга етар-етмас  
эриб кетар илк қор учқунлари.  
Хазон қорая бошлаган.  
Одам деразадан қараб турибди.

999 ёшдан

364 кун ошган қарға  
ёнғоқ кўмаяпти эртаси учун.  
Боғнинг кўнгли баттар сиқилар  
қарғага қараб.

Қор учқунлари тезлашар –  
осмон бисотини тўқади ерга.  
Хафа бўлади деразадан боқиб турган одам:  
“Нега меники эмас ҳамма қор?”  
У кафтини тутади олам узра,  
кафтида эримас  
қор учқунлари...

1981





## АРМОНСИЗ ОДАМ ҲАҚИДА ҲИКОЯ

Баҳор келса,  
Подачи Болта  
Сигирлар еб кетмасин деб,  
Илк бойчечак бошида ўлтиаркан,  
Самарқандни бир кўрмоқни истайди.

(Узокда суворийлар уфққа от қўяр).

Ёз келганда,  
Подачи Болта  
“Оши ҳалол”ини йифиб қайтаркан  
Қишлоқ кўчасида номошом чофи,  
Самарқандни бир кўрсам деб хаёл суради.

(Узокда паравоз кимнидир чорлар).

Кузак келса,  
Подачи Болта  
Хувиллаб кенгайган дала қаршисида  
Қанотсиз қуш каби қайгули турар  
Ва ҳасрат билан  
“Самарқандни бир кўрсам” деб  
пичирлайди.

Киш келганда,  
Подачи Болта  
Эрта туққан шошқалоқ сигирининг  
Бузогини олиб киаркан иссиқ уйга,  
Юлдузлар чарсиллаган осмонга боқиб,  
“Самарқандни бир кўрсам” деб хўрсинади.

(Юлдузлар аро ракеталар милтиллар)

Яқинда,  
Яна бир баҳор келганды,  
Бутун қишлоқ иззат билан қузатди  
Подачи Болтани  
сүнгти манзилга.

Халққа хизмат қилди  
Подачи Болта,  
Бу ёруғ дунёдан армонсиз кетди...

(Балки,  
“ишли одам –  
қўли тегмас” деб,  
Самарқанднинг ўзи  
келиб-кетгандир  
Подачи Болтанинг қошига).

1975



---



## ҚИШКИ ҲИКОЯ

У – мерган. Ўлжасини  
Қийнамайди ҳеч қачон.  
(Ангиллаб бир сакрар-у  
Она бўри берар жон).  
У – чаққон. Ҳар юмушни  
Бажаради шитобда.  
(Тўртта бўриваччани  
Лаҳзада жойлар қопга).  
Кейин қурбон терисин  
Шилади, бермай азоб.  
(Қотиллик чўзилади,  
Тўлғонади фақат қоп).

Ҳар йил қайтар шу ҳолат,  
У ҳар йил овга чиқар:  
Келтириб шўрликларни  
Бир қаро уйга тиқар.  
Очликдан танлар музлаб,  
Ғурур бўлганда унут,  
Бўриваччаларга у  
Эркалаб ичирап сут.  
Фожеанинг ислари  
Турса ҳамки димоғда,  
(Очлик-да!) сут ютишар,  
Кўзлар ёнар чироғдай.  
Овчи энди гўшт тутиб,  
Суяди – сўзлар майин.  
Онасин унутишар  
Шўрликлар тўйған сайин.

Емишлар мўл, сеҳрли,  
Кунлар ўтади равон.  
Бўричаларни сийлар –  
Хўжайин кўп меҳрибон.  
Оқибатни билади –  
Йиртқичлар ҳам тош эмас.  
Хўжайин қўлин ялаб,  
Суйкалишар басма-бас.

Йил ўтар... Сайрга чиққан  
Келинлардай тизилиб,  
Гул лиbosли дараҳтлар  
Боққанида сузилиб,  
Шамолларга, Оламга  
Очганда кўнгил сирин –  
Овчи етаклаб чиқар  
Боққа бўрининг бирин.  
Бўри – бегам садоқат –  
Эркаланаар лорсиллаб...  
Титилиб кетар сукут,  
Ўқ янграйди қарсиллаб.  
Боғлар сесканиб тушар,  
Боғлар йиғлашга тайёр.  
Очилишдан бир тўхтар,  
Кўзин чирт юмар баҳор.  
Қийналиб ўтади вақт,  
Аланглайди: у – жинни.  
Вақтни бўлак-бўлаклар  
Ўқ... Икки... Уч... Тўрт... Жимлик...  
Бу ногоҳ хиёнатдан  
Умр қотса ҳам таққа,  
“Наҳот?...” – сўнг бор тўрт жуфт кўз  
Савол отар фалакка.

Бўриларнинг терисин  
Овчи қуритар дорда.

Сўнг элтиб топширади  
Қишлоқдаги омборга.  
У пул санайди узоқ,  
Пичирлайди лаблари.  
Теваракка таралар  
Юрагининг зарблари...  
Пешонаси тиришиб  
Унга жирканиб боқар,  
Червонни худо билган  
Омборчи Хол – пулбоқар.

Ҳар йил шу фоже қайтар...  
Аммо биламан аён,  
Бир бўри туғилади –  
У унутмас ҳеч қачон  
Ўлим талвасасида  
Онасининг улушин.  
Яшар совуқ ғазабдан  
Титраб, қақшаб, қунишиб.  
Семирмас, ликилламас,  
Боқмас кўзини сузиб...  
У қотил кекирдагин  
Бир кун ташлайди узиб!

Янги қабр бошида –  
Эскидан қолган одат –  
Бирор сўрар: “Бу одам  
Қандай эди, жамоат?”  
“Яхши эди...” Марҳумга  
Эзгулик раво, майли...  
Бўрини эса ҳамма  
Тушунади... Сўкмайди.

1981



## ШАХМАТ ҲАҚИДА ШЕТЬР

Пиёдалар, филлар, руҳлар,  
Аввал сиз билан гаплашамиз.  
Чунки сиз ўласиз...  
Шоҳ ҳақида кейин...  
Шеър бошланди!

Пиёда олдинга интилар,  
Пиёда ҳеч қачон чўкмас тиз.  
Пиёда ўқ ейди, ийқилар...  
Айтдим-ку, ўласиз, ўласиз!

Майдонда фил жавлон уради,  
Излайди ғолиблик йўлини.  
Шоҳ учун ўлимга юради –  
Таслим деб кўтармас қўлини.

Не учун жангдасан, нодон рух,  
Не учун курашиб-тўласан?  
Ортингдан изғийди хоин ўқ,  
Ўласан, барибир ўласан.

Подшоҳнинг ўнг қўли, эй, вазир,  
Сен ўзинг лашкарга саркарда.  
Бекорга излама зўр тадбир,  
Барибир минг яра бу танда...

Айтдим-ку, ҳаммангиз ўласиз,  
Подшоҳнинг амрига тикиб жон!  
Балки у қудратли шоҳингиз  
Хун олар ёвлардан беомон?

Пиёдалар, филлар, руҳлар,  
Сиз ўлдингиз.  
Шоҳ эса...

Шоҳ эса имиллар таҳтида,  
Тополмас нажотнинг йўлини.  
Шоҳ эса қайтади аҳдидан,  
Қўлини кўтарар, қўлинини!

Руҳ ўлди, фил ўлди, пиёда  
Кўксини чанглаб йиқилган...  
Подшоҳнинг кўшкида хиёнат:  
Оқ байроқ – чоҳ байроқ тикилган.

Пиёдалар, филлар, руҳлар,  
Сиз ёдимизда мангу қоласиз!  
Шоҳ эса...  
Шоҳ ҳақида кейин гаплашамиз.

Шеър давом этади!

.....

.....

1979





\* \* \*

Гуллар ҳидин уфурар,  
Шамол ўйнайди даштда.  
Пешонангда – юлдуз бор,  
Исминг бор – Юлдузқашқа.  
Оёфинг узун-узун,  
Қизникiday белларинг.  
Елда танинг дириллар –  
Ингичкадир феълларинг.  
Ҳали темир сўлиқлар  
Лабларингни йиртмаган,  
Ҳали михлар жизиллаб  
Туёфингга кирмаган.  
Бесабр шиддат қўзғар  
Даштларнинг чексизлиги.  
Кишнайсан, ўйноқлайсан –  
Билмайсан эрксизликни.

Ҳавода нима учди? –  
Шувуллаб кетди бу он.  
Бўйнингта нима тушди –  
Илонми, ёки арқон?  
Ўзингни ҳар ён отма,  
Кўникавер, жонивор,  
Юлдузни кўқдан узар  
Тулпор бўласан, тулпор!  
Арқон қилдан тўқилган,  
Унга кетмайди шерлик...  
Баданинг бир сесканди –  
Сафингга тушди терлик.

Аччиқ нола қилмагин,  
Кўникавер, жонивор,  
Барча отлардан ўзар  
Тулпор бўласан, тулпор!  
Икки ёнингда бу дам  
Икки соя узанди –  
Бафрингга муздай теккан  
Узангидир, узанги.  
Эрка-эрка алдоқقا  
Кўникавер, жонивор,  
Ҳеч кимга улоқ бермас  
Бало бўласан, тулпор...

Уфқ бирдан “қарс” этди,  
Бостириб кирди даштга.  
Оlam энди тор бўлди –  
Кўниккин, Юлдузқашқа.  
Тишларинг зирқиради,  
Оғзингга тушди буров.  
Юлдузқашқа, лол бўлма,  
Энг даҳшати шу – жилов.  
Одамлар ҳеч бир отни  
Тулпор этмас, қилмай хор.  
Энди жилов қайга бурса,  
Кетаверасан, тулпор...

1981





\* \* \*

Ёлғизлик ортимдан ҳувиллаб қувди,  
Токи йиқилгунча югурдим бетин...  
Бир аёл туфлиминг лойини ювди –  
Унга “севаман” деб айтмаган эдим.

Қисмат масхаралаб бизни отганди,  
Танҳолик кечасин тор қучсига.  
Билмадим, қай маҳал аёл уйғонди,  
Туфли ювмоқликнинг иштиёқида.

Асли масхаралаш қисмат матлаби,  
Аммо ҳайрат ичра ганги迪 хиёл:  
Қувониб (масалан, гул терган қаби)  
Туфли ювар экан тунда бир аёл.

Менга кўзи тушиб аёл қизарди,  
Уялди – қўллари тушди шалвираб.  
Энди у қаршимда йиғлаб турарди,  
Ёмғир қўйнидаги баргдай қалтираб.

Қўймоғим шарт эди бир жасур қадам –  
Кулаб танҳоликнинг ғариб аршидан.  
Чўчишим мен – меҳр кўрмаган одам,  
Севги туфли ювиб чиқса қаршимдан.

Кетдим... Ёмғирдайин ўтдим-у кетдим.  
Минг аср танҳолик кечди бошимдан.  
Минг аср оралаб қайтадан етдим,  
Ўша ёлғиз қолган аёл қошига.

У менга баҳт берди осмондай улкан,  
Мен-чи?... Мен қоврилдим баҳтнинг доғида...  
Бедорман-у нечун уйғонолмайман  
Туфли ювмоқликнинг иштиёқида.

1981





\* \* \*

Туни бўйи бедорлигинг  
Қандай баҳт-эй,  
Қандай баҳт!  
Шоҳларингда қушлар ухлар  
Ҳей, дараҳт-эй,  
Ҳей, дараҳт.

Шамолларга шивирлайсан  
Оҳиста-эй,  
Оҳиста.  
Сенга юлдуз кулиб боқар  
Олисдан-эй,  
Олисдан.

Кушлар жумла жаҳонники,  
Отса тонг-эй,  
Отса тонг.  
Фақат сенга ишонишар  
Келса шом-эй,  
Келса шом.

Шоҳларингда қушлар ухлар  
Тинчгина-эй,  
Тинчгина.  
Кеча – улкан. Кушлар эса  
Кичкина-эй,  
Кичкина.

1981

309



\* \* \*

...Шамол ҳам ҳеч нени ўзгарта олмас,  
Оғир дарпардага энмагай титроқ.  
Бу уйнинг танига сингиган бесас,  
Зил тошлиқ уйғоқдир, зил тошлиқ уйғоқ.

...Офтоб ҳам ҳеч нени ўзгарта олмас,  
Дилларнинг теграси ҳавомас, девор.  
Оғир “үф”лар аро кўтаради баҳс –  
Ҳорғинлик белордир, ҳорғинлик бекор.

...Кулгу ҳам ҳеч нени ўзгарта олмас,  
Азадаги каби иши хижолат.  
Бунда – жон ичида кезган бенафас  
Ҳасрат ижобатдир, ҳасрат ижобат.

...Ҳеч ким ҳеч нарсанни ўзгарта олмас –  
Узлатнинг сўнгига севги етгандир.  
Бу уйга шошилиб кирган-у ҳавас,  
Тақдир ташқарида қолиб кетгандир.

1991



\* \* \*

Жонда қотди диққинаfasлик –  
Чорасизлик руҳим ичра зич.  
Гүё тақдир кўтариб дастин  
Бошим узра  
Кезинар нотинч.  
Гүё қотил тиф аврашида  
Эсим оғиб,  
Турибман тикка.  
Кўқда ўлган күшнинг ёшидай  
“Оҳ”им учар чексиз бўшлиқда.  
Гүё кетган шонмон лаҳзалар,  
Гүё фусса фасли етгандай.  
Юрагимга солмай ларзалар  
Тангрим мени ташлаб кетгандай.  
Қадам қўйсам – қочади уфқ,  
Айтган сўзим – баҳсли, гумонли...  
Чарчадимми кўнглимни ювиб,  
Кўтаролмай дилдан туманни.  
Кечалардан бедор ўтаман,  
Чорасизлик руҳим ичра зич.  
Мен, билмайман, кимни кутаман –  
Дунё соғинч...  
Даҳшатли соғинч...

1992

---

## “ЁЗГИ БОҒ”ДАН

\* \* \*

Тушунтири, қай ўчмас гулханда қолдим,  
Ҳам руҳда қолдим-у, ҳам танда қолдим,  
Ўзин ўтга отган чаманда қолдим —  
Дилим ҳам қақроқдир, тилим ҳам қақроқ.

Дўст, қуйгин, қадаҳга шароблар тўлдир,  
Бул ғамгин ҳолатга шитоблар тўлдир,  
Дунёга бу кеча жавоблар тўлдир —  
Гарчи жавоблари йироқдир, йироқ.

Дил келсин... Дил бугун нажотдир бизга,  
Дунё ҳам бир кечада озоддир бизга,  
Бул ёз ҳам уч ойлик работдир бизга —  
Етти қават кўқдан порлайди чироқ.

Тўхта! Боф ичида бир олма тушди,  
О, дилим тун ичра бир ҳолга тушди,  
Бир неъмат шу лаҳза заволга тушди,  
Яшнаган ёзда ҳам сўроқ бесаноқ.

О, мудом талабдан мен талабдирман,  
Ёз ўзга, мен ўзга бир тарафдирман,  
Кузга кетар бўлса, мен сабабдирман —  
Чунки кажрафторнинг топгани — фироқ.



\* \* \*

Ёзга чорбоғлари  
Исён этмоқда,  
Шохга япроқлари  
Исён этмоқда.

Бу дарахт нақадар  
Яшил-у хуррам,  
Сезмас – бутоқлари  
Исён этмоқда.

Ёзниң күчоғида  
Анхорлар оқди –  
Сокин қирғоқлари  
Исён этмоқда.

Осмонда қуёш бор  
Зиёбахш, аммо  
Бу дил чироқлари  
Исён этмоқда.

Оллоҳдан ўзга бу  
Исённи кўрмас –  
Ҳақнинг Широқлари  
Исён этмоқда.

Ўзинг суқунат-у  
Ўзинг исёнсан –  
Оллоҳ, сўроқларинг  
Исён этмоқда.

\* \* \*

Ёз, қара осмонинг бунча серюлдуз,  
Биттаси пориллар, биттаси ўчар.  
Қоронгу кечада дилда кундузлик,  
Рұҳимга бир енгил шамоллик кўчар.  
Аста титранурман, аста учаман –  
Чинор баргларида бирпас олгум тин.

Кейин баргдан баргга ўйнаб кўчаман,  
Ёзги сархушликда шамоллигим чин.

Аммо осмон...

Осмон – кўксимда фулу!

Бу дунё тўлгона тўлғонсиз қолди:

Юлдузлар тарафга учсамми, ёху! –

Қалб – осмон ораси тўғонсиз қолди.

На булут, на туман... Қоронғу – ипак...  
Сезяпман, жоним ёз, йўлларинг майин.  
Учсам – йўлларингда толмагай юрак,  
Тангрининг қошига етмоғим тайин.

\* \* \*

Инъом этиб бор неъматини,  
Боғдан чиқди Ҳотамитой – ёз.  
Хаёлланиб – мурувватини  
Рад этгандай бу дунё нохос.

Кўчаларнинг асфальт бағрида  
Сароб бунёд этолмай – пурғам,  
Оташ юкин ташлаб сағрига,  
У ўлтирди қирғоқда бир дам.

Сурон солиб шўнғимади у  
Сувнинг тиниқ баданларига.  
Ўз ҳолига боқди серқайғу –  
Ўчаётган гулханларига.

(Мен ҳам ўша қирғоқда эдим,  
Ачинсам-да ёзниңг ҳолига,  
Фамда эдим, чарчоқда эдим,  
Боролмадим унинг ёнига.

Тунда сувнинг нотинч мавжлари  
Юрагимга урилди нохос...)  
Борса-келмас хотима сари,  
Наҳот, шу тун кетиб қолдинг, ёз?

1992



## “КУЗГИ БОҒ” ДАН

\* \* \*

Чорбоғлардан бир “сҳ”  
Сўраб келдим мен.  
Хазонрездан Оллоҳ  
Сўраб келдим мен.

Оллоҳим, йўқлиқда  
Чегара борми? –  
Жавобга бир гувоҳ  
Сўраб келдим мен.

Сенга етмоқликка  
Умрим етгайми? –  
Шафқатли бир нигоҳ  
Сўраб келдим мен.

Борманми оламда,  
Йўқманми, Тангри? –  
Шу саволни ногоҳ  
Сўраб келдим мен.

Барча зинданларни  
Кўрдим – Озодлик,  
Озод бўлай, бир чоҳ  
Сўраб келдим мен.

Сен қайга борасан,  
Сарғайган япроқ? –  
Сендан шу роҳингни  
Сўраб келдим мен.

\* \* \*

Ёмғир ёғди кўнглимга,  
Хазон ёшимга тушди.  
Етгандайман сўнгимга –  
Боғимни кузак қучди.

Фуссаман... Куз, ўлдирдинг –  
Жондан ўтасан оғир.  
Барглар учади жим-жим,  
Дилга ёғади ёмғир.

Изфирииннинг дастида  
Япроқдирман эҳтимол.  
Барг-у ёмғир остида  
Тупроқдирман эҳтимол...

\* \* \*

Бу кузги оламга фалакдан боқдим:  
Замин – улкан юлдуз, туриши – фусса.  
Зангор ҳаволарда тирмалаб бағрин,  
Айниқса, хазонлар сачратиб учса...

Кузакка қаро ер тагидан боқдим:  
Бир барги қанчалар дил ўртар ситам...  
Ерни титратмасдан йигладим сим-сим,  
Ё Раҳмон! Тирилгим келмади ҳеч ҳам...



\* \* \*

Сўз – кўнгилда,  
Кўз – кўнгилда,  
Кўнгилда – осмон.

Мунг – кўнгилда,  
Йўл – кўнгилда,  
Кўнгилда – армон.

Бир камол бор,  
Бир завол бор –  
Бир жамол бордир.

Бир ибтидо,  
Бир интиҳо –  
Бир жаҳон бордир.

Мангу кузак  
Аро қолган  
Ҳаётим сенда.

Бўғизимда  
Бўғизланган  
Баётим сенда.

Сўз – кўнгилда,  
Кўз – кўнгилда,  
Кўнгил – чексизлик.

Тангрим, келгин,  
Ўлдирмасдан  
Мени сенсизлик...

1992



## ВИДОЛАШУВ

Майса, раҳмат,  
ўсишни эслатиб турдинг.  
Қуш, раҳмат,  
учишни эслатиб турдинг.

Осмон, раҳмат,  
юксакликка чорладинг.  
Ижод, раҳмат,  
юракликка чорладинг.

Она, раҳмат,  
дунёмни меҳр этдинг.  
Илҳом, раҳмат,  
оламни сеҳр этдинг.

Ҳаёт, раҳмат,  
азобга ўргатдинг.  
Севги, раҳмат,  
саробга ўргатдинг.

Соғинч, раҳмат,  
қанчалар сўлдирдинг.  
Умр, раҳмат,  
ўлимга кўндиридинг...

2008

---

## МУНДАРИЖА

“Елади бедов қисмат...” .....	5
-------------------------------	---

### Кўнглим боғлари

“Юрак тортилди таранг...” .....	6
“Бу дунёниг боғларида...” .....	7
“Дунёда айланар иш...” .....	9
“Баҳор кунларининг сўзлари тоза...” .....	10
“Шоҳ отиб таралди сувлар далага...” .....	11
“Чорбоғни қийнади довул бу кеча” .....	12
“Сувланган боғчада майсалар кўм-кўқ...” .....	14
“Тошкентнинг кенг бошидан” .....	15
“Бу тонгнинг салқини...” .....	16
“Шамол мажнунтодла чалар арғанун...” .....	17
Анҳор бўйлаб сайр.....	19
Оқшом.....	20
“Эртага куз келар аниқ...” .....	21
Сентябрь.....	22
“Кузак етди...” .....	23
“Ям-яшил боғ ичра...” .....	24
“Уззукун ёмғир...” .....	26
“Қандай соз, кун ёзилди...” .....	27
“Анҳорнинг ранги – синик...” .....	28
Октябрь.....	29
Хазонрез.....	30
“Чорбоғнинг қучоғида...” .....	31

“Хазонли боғларнинг адоги йўқдир...”	32
“Ҳаво майинлашди...”	33
“Менинг кеч кузак қуним...”	34
“Узун ёмғир ёғди...”	35
“Кузак...”	36
“Худойим...”	37
“Совуқ тегиб ўтди...”	38
Кеч куз	39
Бойсунда куз	40
“Не кечди...”	41
“Олча – шафакранг...”	42
“Ёмғир торларини тун бўйи чалди...”	43
“Кундуз... Кеча...”	44
Барглар ёдимга тушди	45
“Ёмғир кечиб келар...”	46
“Жоним зулмат ичра...”	47
“Тийрамоҳ бу оқшом май ичди...”	48
“Ноябрь қаерда...”	49
“Менсизлик бу боғнинг кузлари – ёвуз...”	51
“Куз шамоли қоқди майин...”	52
“Чин хазонрез...”	53
“Кузги шаҳар чорбоғларин...”	54
“Дарз кетади...”	55
“Мен қувониб гул узатгандим...”	56
“Баланд тоғларга тушди қор...”	57
“Неча кунки тузалмайди...”	58
“Етдимми сўнгимга...”	59
“Кундуз-кундуз қордир...”	60
“Қишининг илдам шоми бирпасда тушди...”	61
Декабрь	62
“Сирғанади музда шўх шамол...”	63
Қорнинг ёғишини тасвирилашга уч уриниш	64
“Омон қолдирмайди бошпанасизларни...”	67
Қиши	68
Қишдаги соғинч	69
“Эркин-эркин ёғди қор...”	70

Қишда ёзилган хат.....	70
Қишда дарахтга ёзилган шеър.....	71
Март.....	72
“Шамол сочларида майсанинг бўйи”.....	73
“Бу нафасдан қўрқма, “томофим...” .....	74
“Қандай атир бўю...” .....	75
Бойсунда туман.....	76
“Қатор-қатор гуллади...” .....	79
“Кунлар – илиқ...” .....	80
“Боққа баҳор қайтар...” .....	82
Май. Ёмғир... .....	84
Жавзода юз берган бир баҳт хусусида.....	85

## Софинч йўли

“Юракда узун оғриқ...” .....	86
“Эй, ўзини ишга берган...” .....	87
“Ҳар лаҳза...” .....	88
“Умр шомга етиб келган чоғ...” .....	89
Суратингни чизиш.....	90
“Бу хазон дам теграмни...” .....	91
“Айрилиқхоним...” .....	92
“Йўқ, жон каби менга кераксан...” .....	94
Тунги баллада.....	94
“Кўнглим бир балони сезиб юрибди...” .....	95
“Қандай довон...” .....	96
“Кўнглим қолди сендан...” .....	98
“Ҳар лаҳзам...” .....	100
“Мен сени олисдан севиб яшадим...” .....	101
“Умримнинг ҳар турфа фаслларида...” .....	102
“Энди тун бўлмайди...” .....	104
“Дардинг мени еди...” .....	105
“Иккимиз ўртандик...” .....	106
Фамингда тўлғондим...” .....	107
“Маним ёмғирпааст севгилим...” .....	108

“Йўлларни танимай тунда бораман...”	109
“Сен – чоғир...”	109
“Ярақлаб очилди ёвуз туманлар...”	110
“Севишингни сезди ёмғир...”	112
“Юрагимга ботди беогоҳ...”	113
“Софинч йўли – қоронғу...”	114
“Сен келмадинг...”	115
Айрилиқнинг фуссаси.....	116
“Товуш ҳам, юрак ҳам сенга етмагай...”	118
“Унсиз фарёдимда-о, фақат сен бор...”	119
“Қизғин ҳаётимда...”	120
“Албатта, албатта, унутмоқ лозим...”	122
“Туну кунни тўзғиб қучди...”	123
“Атрофимда дунё ваҳшат солар...”	124
“Сенсиз...”	125
“Фамингда юрагим шомдай қорайди...”	126
“Дардларингнинг тошқинлари...”	127
“Булутлар қоп-қора...”	127
“Узоқ яшаяпти бу баҳор...”	128
“На нозик кашфиёт билан яралмиш...”	129
“Яна бир умрни яшадим...”	130
“Қўлимга қўлинг тегди...”	131
“Ярақлади бу дунё...”	131
“Ойдан омон қолган...”	132
“Жиҳозлар қалашган...”	133
“Оёғи узулган уйингнинг...”	134
“Сочилди оппоқ қор устига барглар...”	135
“Қаерларда эдингиз...”	136
“Дунёнгда боряпман соғинчга тўлиб...”	137
“Жонни қайга қўяй...”	138
“Севги тўфонида...”	139
“Нақд – пулдорники”	140
“Ваъда бер...”	142
“Дўстлар даврасини қиздирди шароб...”	143
“Тун илиқ...”	144
Севги. Интиҳо.....	145

Мұхаббат интиҳосидан сүнг.....	146
“Бахтинг – тушга югурди...” .....	148
“Дилни ойдай айландинг...” .....	150
“Еру осмон күл бўлди-ё...” .....	151
“Кўксимдан босди-бедод...” .....	152
“Ниманинг бўйи бу...” .....	153

## Сени танимоқ дарди

“Шеърданми? Ҳеч нарса...” .....	154
“Баҳор етди ҳар бир гиёҳга...” .....	155
“Кўнглимга оромли бир салқин тушди...” .....	156
“Томчида дунёдан улкан кўл кўрдим...” .....	158
“Фалак, сенинг қўлингда қумман...” .....	159
“Йиқилди дунёнинг суянчиқлари...” .....	159
“Ой чиқди...” .....	160
“Худойим, қоврилдим...” .....	161
“Учдим парвардигор этганда қарам...” .....	162
“Дил уйғонар...” .....	163
“Терак тинч шовуллар кечқурун...” .....	164
“Қарадим: фалакдан...” .....	166
“Воҳ!.. Менинг юрагим тоғ каби ўси...” .....	168
“Қаёққа борасан Самонийўлидан...” .....	169
Бўрон.....	170
“Сукунатга дунё ғарқ...” .....	172
“Босиб келаётир дим ҳаво...” .....	173
“Парвардигор...” .....	174
“Ҳаловат қолмади жонимда...” .....	175
“Сабр ўтди ҳаддан...” .....	176
“Фуссадан уйғонмоқ нақадар оғир...” .....	178
“Худога минг шукр...” .....	178
“Берган дардларингга шукр...” .....	179
“Худойим! Куйганим сайин яқинсан...” .....	180
“Рұхимда тўрт фасл бирдан юз очди...” .....	182
“Тунда ой нурига чўмилмоқда тоғ...” .....	183

“Кўкка боққан тангрига яқин...”	184
Барг.....	184
“Юрагимни мавжлар чулғаган...”	185
“Менинг дардларим тошқин...”	186
“Дардда оқиб-оқиб...” .....	187

## Мушкулот

Умрида.....	188
Хобил.....	189
Бир пасткаш ҳақида ёзган шеърим.....	190
“Икки қўлимни кўтариб...” .....	191
“Саҳродағи ёлғиз дараҳт...” .....	192
“Эрталаб мошинга кўчалар тўлди...” .....	194
“Неча сўм...” .....	196
“Бешикда — чақалоқ...” .....	198
Кўргазмадаги ҳаяжон.....	199
Бошқа саволлар, бошқа жавоблар ва бир хуласа.....	201
Тескари вақт ниҳояси.....	202
Энг қимматбаҳо топилма.....	203
Яна бир эртак.....	204
Мақом.....	205
Мусиқа. Бетховен.....	206
“Рӯҳ билан юракдан...” .....	207
“Эгаси кетарда эсга олмаган...” .....	208
“Кечаси уйғонсам...” .....	210
“Туш кўрди қуш...” .....	211
“Боғ...” .....	213
Элегия.....	215
Фол. Соғинч.....	217
Ишхона. Тун.....	219
Эртак.....	220
Тор кўча.....	223
“Куйдиради қуёш...” .....	225
“Занжирини узди қайиқ...” .....	227

“Хақиқатни...”	228
“Аввал яшашга кўндинг...”	229
“Ойбарчин бағрида-ю...”	231
“Тўлиб кетдим...”	233
“Бу тош билан...”	234
“Негадир бу дунёни...”	236
“Сочларимга оқ тушди...”	237

## Юрак тўлган кун

“Ой ботди...”	239
“Тўлди юрак...”	240
Мисли қуёш	241
“Ялангоёқ шамол чопди...”	243
“Руҳим суринб келди шиддатга...”	244
“Юракни тош босди...”	245
Уйсиз одам	246
“Тоғларни...”	247
“Дунёнинг кўзига боқаман тикка...”	248
Кўрқинчли туш	249
“Дунё оғусини тутмади ошкор...”	250
“Қанчалар ўлдирдим ўзимни...”	250
“Бу илон қошингда тебратади бош...”	251
“Нақадар озоддир бу эркин осмон...”	252
“Дилимга бир соғинч тушди беовоз...”	254
“Туннинг тасвирига юрагим эпсиз...”	255
Шамолли кун	256
“Яна дил қақради...”	257
“Ботин сўз қолмади...”	258
“Мажнунтол соchlари мажнун осилди...”	259
“Тамошабин зиналардан тушиб келар...”	260
“Дараҳтлар гуллаган...”	260
“Сен...”	261
“Эрксизликдан кичкинадир эрк...”	262
“Яшаб бўлмас, йўқ...”	263

“Кўшин каби довул бостириди...”	264
Ноҳуш кун	266
“Шу қум зарраси ҳам...”	267
“Қўлга ўргатилган бўри...”	267
“Денгиз яна тўфон отди...”	268
“Мангу арчазорнинг шундоқ четида...”	269
“Дала-дашт бошида оташли замон...”	271
“Туғилиш-у ўлим аро...”	272
“Кўшиққа кўчмаган одаммас...”	273
“Сочилган эмасдим...”	275
“Кўп давр-у давронлар...”	277
“Кумуш шудринг тўшалди тонгга...”	277
“Мен охири ишондим...”	278

### **Эсга тушган шеърлар**

“Сен дединг...”	279
“Ташқари чиқаман...”	280
“Мени тинч қўй...”	281
“Уйингизни топиб бормасин хатлар...”	282
Че Гевара	283
Чумоли ҳақида нутқ	285
Урушдан ўттиз йил кейин ёзилган марсия	287
Самарқанд бўйлаб тунги сайр	289
“Қақнус, сенинг учишинг баланд...”	292
Довул	292
Ван Гог ҳақида ҳикоя	293
Бойсун қирларида бир ўзим кездим...”	294
“Унинг қўллари...”	295
Хасис	297
Армонсиз одам ҳақида ҳикоя	298
Қишки ҳикоя	300
Шахмат ҳақида шеър	303
“Гуллар ҳидин уфурар...”	305
“Ёлғизлик ортимдан хувиллаб қувди...”	307

“Туни бўйи бедорлигинг...”	309
“Шамол ҳам ҳеч нени ўзгарта олмас...”	310
“Жонда қотди диққинафаслик...”	311
“Ёзги боғ...дан”	312
“Кузги боғ” дан	315
Видолашув	318

*Адабий-бадиий нашр*

## **Усмон Азим**

### **ЮРАК**

*Шеърлар*

Муҳаррир *Муҳиддин Омон*

Мусаввир *Акром Баҳромов*

Техник муҳаррир *Татьяна Смирнова*

Мусаххиҳ *Доно Тўйчиева*

Компьютерда саҳифаловчи *Сурайё Раҳимедова*

**ИБ № 4810**

Босишга 04.09.09 й. да рухсат этилди. Бичими 84x108  $\frac{1}{32}$ .  
Таймс гарнитураси. Офсет босма. 17,22 шартли босма тобоқ.  
20,0 нашр тобоги. Адади 3000 нусха. 29–2009 рақамли шартнома.  
275 рақамли буюртма. Баҳоси шартнома асосида.

Ўзбекистон Матбуот ва ахборот агентлигининг  
Faafur Fулом номидаги нашриёт-матбаа ижодий уйи.  
100128. Тошкент. Шайхонтоҳур кўчаси, 86.

**Бизнинг интернет манзил: [www.iptdgulom.uz](http://www.iptdgulom.uz)**